


CITAMPI CILELÈLÀ

CYÀ PAASÀKÀ

 Mu disangisha dyà bwebwebwe wà dibàndà dyà díbà, mùvwà Mwanèètù Neville mutùyiishè diyiisha dyà nkèmenu mu—mu disangisha dyà Paasàkà.

² Nènku mpindyewu ndi mumanyè ne mbìbì byà dikèma bwà kushààla biimàne kuulu, kèètù—kèètù kaaba kàà kusòmba mwab’ewu nkakesè menemene. Nènku bàdi bàfùma ku dinkonka ní bàdikù mwà kukàngula paanyimà apa bwà kusòmbesha bantu mu nzùbu wa dibàtijiila bantu emu. MÈmè ne: “Awu’s mmwaba mwîmpè bwàbò bôbò.” Awu’s wùwva mmwaba mulenga be bwàbò bôbò. Bôbò, pa nàнку nebakokè rìdô mu tusunsa tukesè emu, ne kwikala ne, ngèèla meeji ne bàdi ànu bàkiimana ku mwelelu. Ncyèna mumanyè ní bàdipù, anyi to, ndi mmòna ne ncyùlè tèntè ne màyi, pa nàнку nebiikale bu ne cyà kwimana ku mwelelu. Kàdi ndi mmòna ne bàkaadi munkacì mwà kucilongolola ndambu mpindyewu, pa nàнку pàmwàpa nebàcikàngùle mu ndambù wa tusunsa.

³ Mpindyewu, Paasàkà nditùkù dinène bwètù bônso, tudi batàmbe kunanga Paasàkà dikèma! Nènku mpindyewu netùteetè bwà kubènga kunùlama ntàntà mupitèpite bule, bwà ngiikàdìlù yìdìku.

⁴ Kàdi ndi muswè ànu kufila dimanyisha dìmwè anyi àbìdì, nènku mbwena kwamba ne masangisha ètù—ètù àdi àbanga mu dyàlumingu dilwalwà edi, mpindyewu, bwènù nwènù bàà pambèlu pàà cimenga eci. Àdi àbangila ku Bloomington, mu Illinois, mu—mu bipalu byà mu Tùlaasà tutùmbùke twà ba-Méthodistes mwàmwa. Ne neàye too ne mu, kuumukila mu dyàlumingu too ne mu dyàlumingu. Ne pashiishe nekwènzekè didyà dyà—dyà dindà dyà bambi. Ne pashiishe nèngiikalè ne cyà kwakula ne musùmbà wà balongi wà, mu tùlaasà tutùmbùke, dindà kampànda, ne kùdi ne cyà kwikala kuntwaku cyàkudyà cyà mu dindà, mmùndi mùmvwè.

⁵ Nènku pashiishe lumingu lùdì lùlonda, paanyimà, apu ndyà matùkù makumi àbìdì ne àsàtù too ne ku—ku dyàlumingu dyà ndekeelu. Anyi cìwva ncinyi aci? [Mwanèètù Neville ùdi wàmba ne: “Kùdi kabèji pa bwalu abu, ànu lwà mwab’awu, mwanèètù.”—Muf.] Kaa, èyowà’s. Èè, díbà adì’s dimanyisha dikaadi dimane kufidiibwa, mbamanyè bwalu abu. [“Nkàävwa mucimanyishe.”] Èyowà’s, mukalenge, abi’s mbilenga, bìmpè. Chicago, mpindyewu kùdi ci...pa nàнку ndi muumvwe kuumukila ku dilòlò dishààle ne, kabèena mwà kupeta

Nzùbu wa Dibàlaasà wa Lane Tech to, pa nàнку neciikalè nzùbu wa dibàlaasà wa wendesha ànu bu tusunsa dikumi cyanàànà bwà kufikaku kuumukila ku Lane Tech. Nekwikalè dikwàbò dibàlaasà, mûndi ngumvwa. Mu bushùwà bwà bwalu, pàmwàpa nebiikalè ne bimanyinu muntwamu binùfunkwina ku . . . kwikalà disangisha adi disanganyiibwa.

Pashiishe netùbande, mu Colombie Britannique. Nènku pashiishe, mu ditùkù dyàkumpàla dyà ngondo wa kashipumpùmpùmpù, too ne mu ditùkù diinâyì, mu Miami, mu Floride.

⁶ Pa nàнку díbà adi bàdi bàdikonka bwà disangisha dinène dyà mu ntentà, bwà ne bu cyòci mwà kulwa, ndi muswe bushùwà kwikalàmù bwà . . . nwènù bònsò bàdi ne mùshindù abu, mu Washington, DC, ku cimamwendè wa bukalenge, bwà di—disangisha. Ke ciikalà masangisha àanyi à ntwàdijilu à mu ntentà, nudi bamanyè's, mwaba wùdi Mukalenge mundayè ne Yèyè ùvwa mwà kutwilangana naanyi mu kaaba kakesè aku mu disangisha. Ne bàdi munkaci mwà kulongolola cyòci aci patùdi twakula apa, bàvwa batùbiikile ne batwambile, beena kantu-ku-byanza bà kuntwaku, ne mbafwànyine kwangata anyi Cibambalu cyà Mpungilu, mutùvwà baakùle, anyi kwasa ntentà munène. Nènku mmwènze ànu wamba ne “ntentà munène,” cintu kampànda cyumba cyèza bu cyàmvwidì, pàmwàpa ke mwaba wikalà disangisha, mu nzùbu wa capitol awu. Pa nàнку aci's cidi citàmbe, citàmbe bwimpè. Pa nàнку netùmonè cidi bwalu abu, ne pashiishe kunùmanyisha pashiishe ndambù, mùdi Nyumà Mwimpè ùlombola mùshindù awu amu.

⁷ Mpindyewu ndi ngèèla meeji ne bàdi ne bânà bakesè bàà mu mabòko kaaba aka, bàdi bafùmine pambèlù pàà cimenga eci, bàvwàbo baswè kulàmbula kùdi Mukalenge. Mpindyewu, eci, bantu bààbùngì batu bàbàmyamina mâyi, ne bikwàbò. Nènku aci ncipwàngàne menemene, ncyèna ne cyà kucidyuwila to. Nànsha nàнку, dimyaminangana dyà mâyi kî ndyà mu Mifundu to, bwà mwànà wa mu dibòko anyi muntu mukùlumpè, nwamònu's. Dimyaminangana dyà mâyi didi ànu mùshindù wà—wà—wà—wà butèndeledi ùkaadìbo batèèke, dyàmbedi kùdi èkèleeziyà wa Kàtòlike, ne pashiishe kuupukaci mu cyena Mishòonyi. Kàdi kakwèna Mufundu nànsha ùmwè bwà dimyaminangana dyà mâyi dyà muntu mukùlumpè anyi dyà mwànà wa mu dibòko to. Ne bu mùdibi ne tudì baswè kushàala ànu ne Mifundu, ànu ne mwètù mwònsò menemene, mu Bible bàakalwa ne bânà bakesè kùdi Mukalenge wetù, ne Yèyè wàkabàbàndisha, kubàmbulayè mu mabòkò Èndè ne kubàbènèsha, kwamba ne: “Lekèlaayi bânà bakesè bàlwe Kùndi.” Mpindyewu aci's ki citùdi tuteeta kwenza, kulonda Mikenji yà Mukalenge mu mùshindù awu. Nènku tudì tulwa ne bakùlù bàà èkèleeziyà, ne tudì twimana banyùngùlùke ne tulàmbula bânà kùdi Mukalenge.

⁸ Mwimbi wetù wa cisanji cyà pyànò yéyè mwà kwimba musambu wètù wà ne: *Bwelàayi Naabò* awu. Eyo. Ne baamaamù bàdi ne bânà bakesè abu, nebâlwe, kwimana kumpàla eku. Mwanèètù Neville ne bàmwè bàà ku bakùlù abu nebiimanè naanyi kuulu kaaba aka, bu bôbò mwà kuswà, ne netùlambulè bânà aba kùdi Mukalenge.

Bwelàayi naabò, bwelàayi naabò,
Bwelàayi naabò bàfùmina mu madimi à
mpèkaatù;
Bwelàayi naabò, bwelàayi naabò,
Lwàyi ne bânà bakesè kùdi Yesù.

⁹ Mpindyewu eci cidi ànu mmwènekeli cyanààna, wa baamaamù balàmbula bânà bààbò bakesè kùdi Mukalenge. Nènkù mu dindà dyà Paasàkà emu, ncikondo kaayi bulenga's wè bwà dibàtiiza anyi dilàmbula, mbangilu wa muvù ewu ne cikondo cyà dibùika dyà ku lufù eci. Tùwimbàyi kàbìdi pàdi bakwàbò bàtwàdija apa.

Bwelàayi naabò, bwelàayi naabò,
Bwelàayi naabò bàfùmina ku madimi à
mpèkaatù;
Bwelàayi naabò, bwelàayi naabò,
Lwàyi ne bânà bakesè kùdi Yesù.

¹⁰ Mpindyewu, balundà bàanyi, ndi mumanyè ne bôbò abu, muntu ne muntu, mmwàna wa mu dibòko mutàmbe bulenga pa buloba. Mémè ndi mumanyè nànkù. Ndi mumanyè cidi cimpè kutàmba kwamba cintu cikwàbò pa bwalu abu. Ncyà bushùwà. Nènkù ke mùshindù awu ùdìbi bikèngela nwènu kudyùmva.

¹¹ Bàdi mabanji makesè àdi Nzambì munwimikile bujitu bwà nwènu kukolesha. Ne nkàadi misangu yònsò mwambàmbe, ne mwakùle méyi à mùshindù ewu kùdi baamaamù. Tudi bamanyè, Èvànjeeliyò yinaayi, yidi mifùnda, Maataàyi, Maakò, Luukà, ne Yone. Kàdi kùdi Èvànjeeliyò mwitànù, udi kàyì mufùnda to, awu's mmaamù. Ùdi ùbàpeta kumpàla kwà Dilongesha dyà Maataàyi, Maakò, Luukà, ne dyà Yone kubàpetadi. Pa nànkù bujitu mbunwimikila nwènu baamaamù ne baataatù, bwà kukolesha bânà aba ku . . . bwà Bukalenge bwà Nzambì. Ne ndi mutwishùbwe ne ki dijinga dyà mwoyi wèbè ndyòdi adi.

¹² Tudi tubàbàndisha kùdi Nzambì, mu disambila, ne tulàmbula bânà bèènu bàà mu mabòkò kùdi Kilistò. Bakùlù ne mémè netùlwe kumpàla, ne nwènu tùpèèshaayi ànu dìnà. Nènkù mpindyewu ndi mumanyè ne mukàjàanyi ùtu naanyi mukàwu mu mudimu ewu bwalu . . .

¹³ Lisa Ann Mitchell. Kaa! Lisa Ann Mitchell, mbubanji bwà mabòko à muntu kanà yònsò ewu. Twinyikàayi mitù yètù.

¹⁴ Taatù wa mu Dyulu, twètù bu basadidi Bèèbè, nyèwù tubàndisha Lisa Ann Mitchell mutekète ewu Kùdi, mu Dìnà dyà Mukalenge Yesù. Tudi tumulàmbula ne tunana nsòmbelu wendè

bwà Bukalenge bwà Nzambi. Swâkù bwà yèyè ikalè ne mwoyi ne àkolè ne ikalè muntu mulenga wa dikèma bwà Bukalenge bwà Nzambi. Tudi twenza cyôci eci, bwalu, tudi batùmùibwe ne mudimu kùdì Mukalenge wetù. Mu Dîna dyà Yesù Kilistò mmutùdì tulòmba emu. Amen.

Nzambi àkubènèshè.

¹⁵ H. A., E. J. Junior. E. J. Junior, pàdiye mu kalù apu. Pa nànkù twinyikàayi mitù yètù.

¹⁶ Taatù wetù wa mu Dyulu, nyèwù tubàndisha mwànà mukesè ewu Kùdì; tusambila bwà ne Yesù Yèyè munènge, Wèwè neùmuvwijè musadidi munène wa Nzambi. Maamù ùdì ùmufila Kùdì. Nènku—nènku tudi tumulàmbula, mu Dîna dyà Mukalenge Yesù, bwà Wèwè kumubènèsha ne dîkù didiye mufùminemu adi. Swâkù bwà àkoleshiibwè bwa butùmùbì bwà Nzambi, patùdì tumulàmbula kùdì Yesù Kilistò apa. Amen.

Nzambi àkubènèshè, mwanèètù wa bakàjì, ne mwanèèbè mukesè awu. Ndi bu mudimùke bwà mudimu awu, bwalu ntu misangu yònsò ànu ncìina ne nkwèpì kùngààlwà kwenzela bânà bakesè bibì.

¹⁷ Nendèkelè, nudi mwà kulwa ànu mùshindù ewu. . . Ewu mmwànà mukesè. Dîna? Deborah Myers. Deborah Myers mwànà ewu, ùdì ne mesù àbàlakana mu dîndà emu. Twinyikàayi mitù yètù.

¹⁸ Taatù wa mu Dyulu, nyèwù tulwa Kùdì, ne Deborah Myers mwànà ewu, tudi tulòmba mabènèsha Èbè pambidi pàà mwànà ewu. Patùdì tumulàmbula kùdì Mukalenge apa, pàdì taatù ne maamù mpindyewu bàmufile apa, bu civùlukilu cyà Mukalenge wetù Yesù Wàkabènèsha bânà bakesè abu awu, wàkamba ne: “Bàlekèlaayi bàlwe kùNdi,” tudi tuKupèèsha, Deborah mwànà ewu, bwà nsòmbelu wa mudimu, mu Dîna dyà Yesù Kilistò. Amen.

¹⁹ Mpindyewu nganyì wa ku bânà bakwàbò batekète aba? Èyo, mukalenge. Mpindyewu nsongàakàjì wa citende ewu, Sarah Ruth, Sarah Ruth Wheeler mwànà ewu. Wheeler. Wa kalolo.

²⁰ Taatù wetù wa mu Dyulu, nyèwù tulwa Kùdì ne mwànà munanga wa mu dibòkò udibò batùpèèshe mu byanza byètù bwà dimulàmbula ewu. Nènku tudi biimàne mitù ne myoyi miinyika, bwà kuKusàkidila bwà bwalu bwèndè, ne tulòmba bwà Ùbenèshèku nsòmbelu wèndè ku nsòmbelu wa mudimu Wèbè. Tudi tumufila Kùdì mu Dîna dyà Yesù Kilistò. Amen.

Nzambi ànùbènèshè. Kwònsò nkumane kujika mpindyewu. Yèyè kutapa dîsù paanyimà, (kùndì mèmè) bu udi muswè kwamba ne: “Kùdì cikwàbò cintu anyi?” Èyo.

²¹ Kùdì mwànà mukesè wa bakàjì wa kalolo. Mpindyewu dîna dyèbè nganyì? Mica Ungren. Aka kaacintu kakesè kalenga

kaayipu's wè! Wetwàwù? Ùdi ànu ùjinga kumanya, ùjinga kumanya cidì cyènzeka mwab'ewu. Twinyikàayi mitù yètù.

²² Taatù wetù wa mu Dyulu, nyèwù tuKupèèsha mwànà mukesè mulenga ewu mu dindà dyà Paasàka edi, tulwa ne bânà bakesè Kùdi. Tudi tumulambula kùdi Mukalenge Yesù, bwà nsòmbelu wa mudimu. Enzàku, Mukalenge, bwà yèyè kushààla ne mwoyi ntàntà mule, too ne ku Dilwa dyà Mukalenge, bu byòbì mwà kwenzeka. Ne ùmuvwijè mwena mudimu Kùdi, patùdi tumulambula kùdiye. . . yèyè kùdi Wèwè apa, mu Dìna dyà Yesù Kilistò. Amen.

²³ Dìna dyèndè nganyi? Kaa, Melynda, Melynda Ungren wa kànà. Bòbò—bòbò mbaswè kukumòna mùshindù ewu, Melynda. Udi—udi mulenga be. Ekèlekèle! Twinyikàayi mitù yètù.

²⁴ Taatù Nzambì, nyèwù tuKupèèsha inàbànzà mutekète ewu, mu Dìna dyà Mukalenge Yesù. Tudi tumulambula kùdi Wèwè, nsòmbelu wèndè, bwà nsòmbelu wa mudimu Bwèbè, Mukalenge, tulòmba bwà Wèwè kumulama ne kumuvwija umwe wa ku basadidi Bèèbè bakàji bwà kuKukwàcila mudimu ne kwenza eci cidìye mulediibwe bwà kwenza. Tudi tumufila Kùdi, mu dimulàmbula, mu Dìna dyà Yesù Kilistò. Amen.

²⁵ Bânà bakesè bònsò bàà bakàji balenga aba! Tùmonàayi mpindyewu. . . Ewu, kaa, apa, ewu ki yèyè. Wetwàwù? Udi bishi mu dindà emu? Dyèndè nganyi, mpindyewu? Jane. . . Jamie Lynn Daulton.

²⁶ Taatù wetù wa mu Dyulu, nyèwù tulwa Kùdi ne mwànà mukesè wa bakàji wa kalolo ewu, ne tudi tulòmba bwà Wèwè kumubènesha. Nènku tudi tulòmba, Mukalenge, bwà Ùbenèshèku mbànà yà bânà aba. Swàkù bàkoleshiiibwè mu mibelu yà Nzambì, bwà nsòmbelu wa mudimu Bwèbè. Tudi tuKupèèsha munanga mukesè ewu, patùdi tumulambula kùdi Nzambì apa, mu Dìna dyà Yesù Kilistò, Mwànà wa Nzambì. Amen.

Mwanèèbè mukesè wa mu dibòko ngwà kalolo.

²⁷ Wetwàwù? Èè, mpindyewu, nudi bafwànyine kunkwàta, kî mmwòmò anyi? Dyèndè nganyi? Teresa Cabert. Tàngilà kunweku, Teresa. Kî nkantu kakesè kàà kîmpè anyi? Bònsò aba mbànà bàà mu mabòko bîmpè be.

²⁸ Taatù wetù wa mu Dyulu, nyèwù tuKupèèsha mwànà mukesè wa bakàji munanga ewu, udi munanga wèndè mutùtwàdilé ewu. Patùdi tuKupèèsha mwànà ewu apa, tudi tumufila bwà nsòmbelu wa mudimu kùdi Nzambì. Tudi tumulàmbula ku mudimu wà Nzambì, mu Dìna dyà Yesù Kilistò, Mwànà wa Nzambì. Amen.

²⁹ Nzambì àkubènèshè, mwanèètù wa bakàji, ne àbènesheku mwànà webè mukesè patùdi tusambila apa. Twìsù tukesè twà bleu; ne pashiishe tufiikùlùke. Dìna dyèndè nganyi? Cynthia,

Cynthia mwânà. Tàngilà *kunweku*, Cynthia. Twîsù tukesè tulenga.

³⁰ Taatù wetù wa mu Dyulu, nyèwù tuKupèèsha mwânà mukesè wa bakàji ewu mu dindà emu. Swâkù àshaale ne mwoyi bidimu byàbùngì, ne swâkù ikale musadidi Webè mukàji. Bananga bèndè mbamutèke mu byanza byànyì bwà dimulàmbula, ndi mmutwàla kumpàla kwà bakùlù ne mmutèka kumpàla kwà Nzambì, ne tumulambula ku mudimu wà Nzambì. Mu Dîná dyà Yesù Kilistò, Mwânà wa Nzambì. Amen.

³¹ Mpindyewu, ewu mmwènzè ànu bu mukesè, yèyè pèndè. Mpindyewu, Meda, uvwa mwà kwikala kunweku bwà kwambula ewu ewu. Mèmè ntu misangu yònsò ànu nciina ne nkwèpì kungààlwà kumucibula. James, James Bliss. Yèyè mmwânà mukesè wa mmwènekèlu wa lungenyi lukolè, kî mmwômò anyi? Mmwômò.

³² Taatù wetù wa mu Dyulu, nyèwù tuKupèèsha James mwânà. Swâkù bwà yèyè ikalè bu mwena kùdì dîná dyèndè difùmine awu, Yakòbò wa mu Bible, kakùyì mpatà to, wâkaleeja lungenyi mu cisangilu cyà mudimu wa Mukalenge awu. Ndi ndòmba bwà Wèwè kumubènesha, ne bwà nsòmbelu wa mudimu Kùdì. Bènèshàku dîkù didiye ùfùminamu, ne swâkù bwà àkoleshii bwè mu mubelu wà Nzambì; patùdì tumulàmbula ku mudimu wà Nzambì apa. Mu Dîná dyà Yesù Kilistò, Mwânà wa Nzambì. Amen.

³³ Ncyà bushùwà ndi munange . . . Mwânà mukesè ewu dyèndè nganyi? Bànda kunweku, munanga wanyì. Huh? Tammy Brown. Swâkù. . . Kaa, Tammy Brown wa kânà. Mamwèndè ne tatwèndè mbabàtìjìbwe mu dindà emu. Mwânà mukesè mukwàbò wa bakàji mulenga kwîsù. Twînyikàayi mitù yètù.

³⁴ Taatù, nyèwù tulwa Kùdì ne mwânà mukesè ewu. Ndi mufwànyine kwela meeji ne ciwva cintu kampànda cyà mùshindù ewu dîbà dîvwà baamaamù bàbàtwàla Kùdì, paÚvwà pànwapa, mu lwendu lwà pa buloba. Tudi tumulàmbula kùdì Wèwè, Mukalenge. Múndi ngumvwa, tatwèndè ne mamwèndè mbabàtìjìbwe mu dindà emu kaaba aka, mu Dîná dyà mushinga mukolè dyà Mukalenge Yesù adi. Dîbà adi, dîkù dyèndè nediikalè dilelèlè. Ndi ndòmba bwà Ùmubèneshèku ne ùmupèèshèku nsòmbelu wa mudimu. Patùdì tumulàmbula kùdì Nzambì bwà mudimu Wèndè apa, mu Dîná dyà Yesù Kilistò, Mwân'Èndè. Amen.

³⁵ Twasàkidilaayi. Kaa, indilaayi, numfwilaayiku luse, ncìwva mumòne ewu to. Wetwàwù? Èè, muntu wa maalu mîmpè be. Ndikù mwà kumwambula . . . Anyi nebinùtàcìshè? Mbîmpè. Dyèndè nganyi? Danny Johnson, Danny William Johnson. Kaa, ekelekele, yèyè's ùdì ùmwèka ànu bu muyiishi's, kî mmwômò anyi?

36 Taatù wa mu Dyulu, nyèwù tulwa Kùdi ne mwànà mukesè wa balùme ewu. Pàmwápa yéyè mmutámbe kwikala mwànà bwà kumanya cìdi bwalu ebu, kàdi kùdi Nzambì mu Dyulu Ùdi utàngila panshì ne mumanyè cintu eci. Tudi tumufila Kùdi, Mukalenge, mùdi maamù mumutèèke mu mabòkò ètù emu. Ku diitabuuja nkutùdi tulwa mu Dìna dyà Yesù Kìlistò, ne tumunana bu civùlukilu cyà ngàsà wa Nzambì, ne tumulàmbula kùdi Nzambì, mu Dìna dyà Yesù Kìlistò. Amen.

Àkubènèshè, munanga wanyì.

37 Tudi babàpetè bònsò anyi? Mpindyewu mmwànà wa bakàji bulenga kaayi ulwàlwa mwab'ewu ewu's! Aku's nkankanzu kakesè kalenga kaùdi muvwàle, ne kafulu kakesè. Adler, Adler, Ellen Gail Adler, nkànà kàà bakàji katekète bulenga kaayi's wè.

38 Taatù wetù wa mu Dyulu, nyèwù nKutwàdila bubanji ebu bwà dîkù edi, mwànà mukesè wa bakàji udi mulwè pa buloba. Nènku munanga ewu nyèwù mukàtwàle kumpàla eku bwà kulàmbudiiwbakù bwà mudimu kùdi Wèwè, bamanyè ne tudi ne mwoyi mu ditùkù dibì. Tudi twamba tujaadika nsòmbelu wa mwànà ewu bu citàdi cyà bucimunyi bwà Nzambì. Nènku tudi tumulàmbula ku mudimu wà Nzambì, mu Dìna dyà Yesù Kìlistò, Mwànà wa Nzambì. Amen.

Àkubènèshè, munanga wanyì.

39 Muiishi mutekète nyèyè ewu, bàbìdi bajimà. Mmapàsa anyi? Wa bidimu bitaanu ne wa bidimu mwandamukùlù. Dyà ewu nganyi? Johnny. Wa ku Richmond, wa ku Richmond, mu Virginie. Mvwa ngèèla meei ne ngaavùluku mpàla webè. Tuvwa benzè neebè pàmwè muiiiki wa bàbìdi. Pàvwà Mukalenge mwikàlepù. Nciwva mufwànyine kukuvùluka to; mvwa mumanyè mpàla webè kàdi nciyi mwà kujingulula ne wèwè uvwa nganyi to. Eyo. Èè, tudi bamanyè ne yèyè neàlwe ku nzùbu mujaalàme. Dìna dyèndè n'John, Johnny.

40 Taatù wetù wa mu Dyulu, nyèwù tulwa Kùdi ne mwànà mukesè wa balùme ewu, Johnny. Nènku nyèwù tumutentekela byanza, bwalu mùshindù awu ki uWàkacyènta. Wèwè wakabàtentekela byanza. Nènku tudi tumubènèsha ne twamba tujikula nsòmbelu wèndè bu cileeki cyà ngàsà wa Nzambì, tumulàmbula ku mudimu wà Nzambì, mu Dìna dyà Yesù Kìlistò, Mwànà wa Nzambì. Amen.

Àkubènèshè, wèwè mwànà mukesè wa balùme.

41 Lewis, ewu's n'Lewis.

Taatù wa mu Dyulu, nyèwù tulwa Kùdi ne mwànà mukesè wa balùme ewu, Lewis. Nènku taatù ùdi ùlwa nendè bwà kumulàmbula ku mudimu mu nzùbu wa Nzambì.

42 Patùdi twela meei ku matùkù àkaadi mapite, pàakapweka Anà mu ntempèlu, ne kusambila, ki Nzambì kumupàye mwànà wa mu dibòko. Ne kwalukilayè ne mwànà wa mu dibòko

awu ne kumufilayè kùdì Nzambì. Ke cìdì bantu aba bènza leelù, bàbwela ne bânà bààbò batekète, mabanji àbò makesè, bàbàlàmbula. Nènku—ne mu—mupròfetà kumwangatayè, Taatù, ne kukoleshayè kakwàcikwètù aku, ke kushààlayè mupròfeta.

Mpindyewu tudi tulàmbula Lewis mwànà ewu mu dindà emu ku mudimu wà Nzambì wa Bukolè bônso, mu Dìna dya Yesù Kilistò. Amen.

Àkubènèshè, mwanàànyì wa balùme.

Ndi mùmwè bîmpè menemene bwà kukumòna mwab'ewu mu dindà emu, muumukila ku Richmond, mu Virginie. Nzambì àkubènèshè.

⁴³ Mpindyewu twànji tùmônààyibì, ki bwónso anyì? Èyo. Kaa, s'mbànà bakesè abu! Kanwèna bamanye to, mèmè, tudi bafwànyine kwikala balàmbùle baampàndànjlà bakesè bààbùngì mu dindà emu, ne muyiishi, katwèna bamanyè to. Byónso abi bìdì bisanganyibwa mu byanza byà Wa Bukolè bwónso.

⁴⁴ Ndi muswè kumanyisha ne mu masangisha à dilòlò edi, ku tabernacle eku, nekwikalà mudimu wà mèèsà à Mukalenge. Ne pawikalà kacya kùyikù mwanji kuya mu òmwè dya ku masangisha ètù à mèèsà à Mukalenge to, tutu kàbìdì twenza dyoweshangana dya màyi ku makàsà.

⁴⁵ Mpindyewu, kùdì ndambù wa mishwalà mitèèka kaaba aka bwà mèmè kuyisambidila. Òmwè ngwà Mwanèètù Grimsley, mwanèètù wa balùme ewu ngwà mu èkèleeziyà emu. Ncyèna mumanyè ne eyi nyà banganyì to. Tudi tuyitùminangana, nkàmà ne nkàmà yàayi, pa buloba bujimà. Nènku mpindyewu netwikalè. . . Ndi muswè kuyisambidila paanyimà pàà mèmè mumanè kubanga kusambidila babèèdì.

⁴⁶ Ndi muswè kwakula dyàmbedi, ànu bwà katanci kakesè cyanààna, pa ditungunuka dikesè dya Dyiisha dya Paasàkà adi. Nènku mpindyewu kumpàlà kwà twètù kuseemena ku Dìyì dya Nzambì, tuseemenàayi kùdìYe ku disambila.

⁴⁷ Taatù wetù wa mu Dyulu, tudi ne kusàkidila mu myoyi yètù mu dindà emu bwà dindà dya butùmbi edi. Ne kumutù kwà byónso abi, tudi ne kusàkidila bwà eci cìdìci cìleeja, dibìika dya ku lufù ne cishìndiki citwìbwe citampì cyà ntèndeleeleu wetù, pàakabiikà Yesù Kilistò ku bafwè, kùkaadi bidimu bitwè ku binunu bibidì, ne kuDìleeja kùdì Èkèleeziyà Wendè, mwikalè ne mwoyi bwà kashidi. Paanyimà pàà bidimu binunu bibidì, tudi ne disànkà dyàbùngì dya kwikala ànu tusànkila bwobùmwè abu ne bayiidi bàà Kilistò mubiike ku lufù! Tudi tulòmba, Mukalenge, bwà Bwikadi Bwèndè bwikalè bùmvwikekù mu nzùbu emu mu dindà emu, too ne pìikalà muntu yónso udi kàyì musùngidìbwe ewu ne cyà kuMwitabuuja bu Musùngidi wèndè. Ne aba bàtù kabàyi bùjiibwe tètè ne Nyumà Wèndè, swàkù bwà edi diikalè ditùkù diikalà Nyumà Mwìmpè mwà kwenza

mudimu mumana kujikija pambidi pààbò. Tudi tulòmba bwà Yèyè, mu Difuta Dyèndè dinène dyà cibawu dyàkondopa babèèdi adi, swàkù bwà Àlwe pabwîpi menemene ne bantu, diitabuuja adi nedìikalè dyà musinga mukolè, Mukalenge, ne dikòòkesha kumutù kwà bupidyà, diìkalà mwà kwenza ne babèèdi ne beena ntàtu bùùmuke kaaba aka bwondòpiibwe ne basàngàle.

Tudi baswè kulòmba, Mukalenge, bwà Ûbeneshèku ewu mpindyewu udi mulayè bwà kuumvwija Dìyì Dyèbè awu, bwà dibìikà dyà ku lufù.

Nzambi, bèneshàku bambi bònsò myaba yònsò, bânà Bèèbè, basadidi Bèèbè mu matunga ònsò, pa buloba bujimà.

⁴⁸ Nènku lwàkù, Mukalenge Yesù, lùkàsàlùkàsà, bwalu tudi tumòna mavuba àlèlema mu lupeepèlè, Mukalenge, díbà adi tudi tumanya ne kùdi cintu cinène cidì cyènda cibànda. Swìkaaku cisàmbà Cyèbè mukàbà. Kaa, swàkù bwà bàngatè mwelè wà mvità wà Bulelèlà, bàvwalè cyamu cyà mvità, bàpwekeshe cifulu cyà mvità, balwàte bóbò biinè bisàbaatà byà Èvànjeeliyò ku makàsà, ne, kumutù kwà bintu byònsò, bambùle ngabu wa diitabuuja ne bayè batàngìle kumpàla. Enzàku nànkù, Mukalenge, bwalu mavuba à mvità mmalembèlèlè kwinshì. Tùbèneshèku mpindyewu leelù ewu, bwalu tudi bamanyè ne àbìdi aa, bwà ku dyètù pèètù dimanya, netùmonè Yesù àbìdi àdi panshì aa. Nènku tudi tulòmba bwà twìkalè badìlongòlòle bwà kuya pààlwà díbà adi. Swàkù bwà tulongololè myoyi yètù, bwà kujikija cyòci aci, kukòsa bwalu musangu ùmwè bwà kashidi, mu disangisha dyà mu dindà leelù ewu. Mu Dìnà dyà Yesù Kilistò, akùlàku neetù ku Dìyì Dyèbè, Dìyì Dyèbè dìdi Bulelèlà. Amen.

⁴⁹ Mpindyewu bwà nwènù bàdi baswè kubala pàmwè naanyi mu Mifundu, buulùlaayi mu Luukà, nshapità wa 24. Nènku ndi muswè kubala ndambù citùpà Cyèndè cile, bu Mukalenge mwà kwanyisha, bwà kupeta mwaba wa kushindamijila bìndì muswè kushindamijilapù ndambù wa tusunsa. Nènku mpindyewu nwènù baswè, kwòkò kwikàle luuyà, ngèèla meeji, anyì cyònsò cidìku aci, nwenzaku cyònsò cinùdìku mwà kwenza aci bwa kwikala bancyàkàme, nènku mèmè nendwijakajè ne mwànyì mwònsò.

⁵⁰ Nènku tudi baswè kwamba nùnkù, ne neyà bushùwà ne tudi twanyisha lulamatu lwènù bwà kulwa. Ne pàdìbi ne, nànsha mùdi bantu bàteeta kwamba ne Èvànjeeliyò mmujimije dikòkà Dyèndè, kàdi pàdì bantu buumùke mu ditunga dijimà bwà kwimana pa kaaba kàdi bidimba byàbò bisaama, bwà mudimu wà Mukalenge, cicìdi ànu cìleeja ne Nzambi ùdi ne bantu, ne kùcidì ànu dijinga kampànda mu mwoyi wàbò bwà kumòna Nzambi. Pààbì, Èvànjeeliyò mu bupwekèlè Bwèndè, mupwekèle ànu mùdi Èvànjeeliyò wa Mukalenge wetù Yesù Kilistò amu, kàdi pààbì's Yèyè ki bukolè butàmbe bunènè bùkaadìku butùte buloba, ng'Èvànjeeliyò wa Kilistò. Ne Èvànjeeliyò kèna ànu

mu Dìyì nkààyadi to, kàdi ku bukolè ne dileeja dyà patòòke dyà Nyumà Mwimpè. Ànyishèku bwà Yèyè kutwenzela bintu ebi patùdì tubala mpindyewu kuumukila ku mvensà wa 36 wa nshapità wa 24 wa Luukà Munsantu apa.

Nènku pàvwàbo . . .bàakula apu, Yesù yèyè mwinè wàkiimana munkaci mwàbò, ne wàkabàmbila ne: Ditalala diikalè kunùdì.

Kàdi bàkawkàcika bwôwà ne kuzakala, bàcinka ne bàvwa bamòne mukishi.

Ki yèyè kubàmbila ne: Nudi batàcishùbwe bwà cinyi? ne meeji awu adi àjuuka mu myoyi yènù bwà cinyi?

Tàngilàayi byanza byànyì ne makàsà àànyì, bwà ne m'Mémè mwinè: ndengàayi, ne nùmone; bwalu mukishi kawùtu ne misunya ne mufübà to, munùdì nwênù nummòna mémè naabi emu.

Nènku pàakamanàbo . . .kwakula, yèyè wàkabàleeja byanza byèndè ne makàsà èndè.

Nènku pàvwàbo kabàyi bânji kwitabuuja bwà disànka . . .bôbò . . .kabàyi biitàbùùje bwà disànka, ne bàvwa munkaci mwà kudikonka, kubàkonkayè ne: Nudikù ne cyàkudyà mwab'ewu anyi?

Ki kumupèeshabò citùpà cyà . . .mushipa mulàmba, ne . . .cisangi cyà bwicì.

Ki yèyè kubyàngata, e kubìdyayè kumpàla kwàbò.

Ki yèyè kubàmbila ne: Aa mmèyi angàkanwàmbila, panciwà neenù, bwà ne bintu byònsò bidi ne cyà kwula, bìvwà bifùnda mu mikenji yà Mòsà abi, ne mu baprófeta, ne mu misambu, bwànyì mémè.

Ki yèyè kukàngula . . .luumvu lwàbò, bwà bààmònakù mwà kuumvwa mifùndu,

Pashìishe kubàmbilayè ne: Bàakafùnda ne, ne bìvwa bikèngela bwà Kilstò kukèngayè, ne kubùka ku bafwè mu ditùkù diisàtù:

Ne kanyinganyinga ne dilekelediibwa dyà mpèkaatù bìvwa bikèngela kuyiishùbwabi mu dinà dyèndè munkaci mwà matùnga ónsò, kubangila mu Yelusàlèmà.

Ne nwênù nudi bantèmù bàà bintu ebi.

Nènku, mònaayi, ndi ntùma mulayi wà Taatù wanyì pambidi pèenù: kàdi shààlaayi bindile mu cimenga cyà Yelusàlèmà, too ne panwikala . . .too ne panwàrwàdikiibwà ne bukolè bwà ku dyulu.

Ki kubalombolaye too ne ku . . . Beetànyà, ki kwelayè byanza byèndè muulu, ne kubàbènèshayè.

Nènku kwenzekabi ne, pavwàye ùbàbènesha apu, yèyè kushiyangana naabò, ne wàkambwibwa mu dyulu.

Ne bàakamukuukwila, ne bàakaalukila ku Yelusàlèmà ne disànka dinène:

Nènku bàakatungunuka ne kwikala mu ntempèlu, bàtumbisha ne bàbènesha Nzambi. Amen.

Mpindyewu byòbì bikèngela bwà mèmè kucibiikila bu cyena-bwalu, ndi muswè kwangata eci nùnkù, *Cìtampì Cilelèlà Cyà Paasàkà.*

⁵¹ Mùshindù mwinè wùndì mufike ku dyela meeji ku cintu bu nànkù awu, kùkaadi bu lumingu lujimà nànkù awu mvwa mu njila, mutàngile ku Georgetown, kaacimenga kakesè lwà kwìnshi kwà New Albany eku. Nènku kùvwa nsongàalùmè miimàne mu mùsèèsù, yìsangisha milàmbù bwà bitampì byà Paasàkà. Ki mèmè kubanga kwela meeji bwà “cìtampì cyà Paasàkà.” Ki mèmè kudyàmbidila ne: “Cìtampì cyà Paasàkà ncinyi? Cyà bushùwà, cìdi ne mushinga kutàmba cìdi bânà bàà balùme aba bàsangishila milàmbù, cìtampì cyà Paasàkà.” Ki mèmè kudyàmbidila ne: “Bàdi benza cinyi ne bitampì byà mùshindù awu ebi, ne musangu ùdì wàngaciibwa kùdìbì, anyì bwàbì byòbì?” Bìdi bitèèkiibwa, mu bushùwà bwà bwalu, bitampì ebi, pa mikàndà mifùnda ne bikwàbò. Nènku cìdi mmulàmbù wà budiswile bwà bwalu bwàbò, ne neùkabweje bantu mu lùpitaadì, bàdi ne disaamà dyà cyàdì, ne bikwàbò, ne kubèèla mu lùpitaadì, mu mwaba kampànda wà diikisha, too ne pààfwàbo. Ki mèmè kudyàmbidila ne: “Cyà bushùwà, Paasàkà ùdi ne cintu kampànda cishilàngàne ne aci, cìtampì cyà Paasàkà. Ncifwànyine kumvwija cintu kampànda citàmbe kutèèka kwà muntu mu lùpitaadì, bwà kumulama mucyankàme.” Pààbì, abi’s mbilenga be, mpindyewu, ncyèna naabì cilumbù to. Aci, Nzambi àbàbèneshèku, aci’s ncintu cilenga cyà dikèma. Kàdi cìdi ànu, cìmwèka bu ne cìvwakù mwà kuya ntàntà ndambù kupità apu, bu mùvwàbì ne Paasàkà ùvwa ne mushinga wàbùngì kùdì Èkèléeziyà wa beena Kilistò ne bwà bumpyànyì bwètù bwà beena Kilistò, Cìtampì cyà dibùkà dyà ku lufù. Nènku mmunyi mùdì kaatimbre kakesè kàà ku poste, nànkù awu bwà kwangata kaaba kààCì? Kakèèna mwà kwangata kaaba kààCì to.

Ki mèmè kubanga kwela meeji pa bwalu abu ne: “Cìtampì cyà Paasàkà cìvwa ncinyi?” Nènku mùshindù awu ki wùndì mukòke mmwènenu ewu wa dyakula mu dindà emu pa Cìtampì cyà Paasàkà.

⁵² Mpindyewu Paasàkà ùdi ne, ne bitampì, ne bikwàbò, mu Bible mujimà ewu. Tudi tubisangana, mbyà kale ànu mùdì Bible emu, kwònsò eku kale wàwa mu budimi bwà Edènà tudi tucisangana. Ne pashiishe tudi tusangana ne cintu kanà cyònsò cìtùdì tusangana mwaba kanà wònsò mu Bible, cìdi cyàlukila mu Genèsè. Byònsò byàkabangila mu Genèsè.

53 Ne pashìishe mvwa ndyàm̀bidila ǹanku, c̀imvwà naaci mu meeji aci bu C̀itampì cyà Paasàkà, ki mèmè kudikonka bwà cinyi Cyàkabèngiibwa bikolè, ne mùshindù mene ùvwà bantu mwà kuCibènga. Bwà cinyi Cyàkapiìshiiibwa mùshindù awu? Ǹenku mvwa ndyambidila d̀ibà adi ne Cyòci aci kaciyèna misangu yònsò ànu cipìshiiibwe to, ne bantu bònsò kabàtu bàCìpiisha to.

54 Kàdi Nzambì mmusebe njila mùshindù awu, bwà ne muntu mmutèèkiibwe pa kaaba kàà ne yèyè mmwenzèjiiibwe ku bukolè bwà kwangatayè dipàngadika. Muntu kèna mwà kwikala ne mwoyi pa buloba kàyì wàngata dipàngadika to. Nzambì ùtu ùmwenzeja bwà yèyè kudyàngata. Ùdi ne cyà kwangata dipàngadika kampànda. Ǹenku kùdi cikondo kampànda cyùdi ne cyà kwangata dipàngadika dyà kulonga kàlaasà, udi ne cyà kwangata dipàngadika dyà uwàsèlà, ne udi ne cyà kwangata mapàngadika à bintu bishiiilèshiiilàngàne.

55 Kàdi mu budimi bwà Edènà, mùvwàbo ne b̀anà bàà balùmè ànu bàbidi, dipàngadika adi dyàkangaciibwa ku bukolè pa muntu bwà kwangata dipàngadika. Ne ndi ngèèla meeji ne mbyenjiiibwe bwà kuleeja diikala dyèndè dilelèlà, c̀idiye aci, bwà kuleeja c̀idiye munda mwèndè. Mpindyewu tudi tusangana ne cikondo cyàkalwa, pankaci pàà Kaayinà ne Abèlè, cyà ne bìvwa bikèngela bwà dipàngadika kwangaciibwadi ku bukolè, bwalu cikondo cyà dipàngadika cìvwa cikumbàne, ki nsongàalùmè yònsò kulongololayè mùshindù wà kukukwilayè Nzambì.

56 Ne bu nwènù mwà kumòna, pankaci pàà cilelèla ne cyà mafi pàdi ànu katùpà kàà mupuuyakeenu wà dishiiilangana. Ne cyà mafi, mu matùkù à ndekeelu, bìvwa byàmba mu cipròfetà ne cìvwa mwà kwikala pabwìpi menemene ne cyà bushùwà, mu mùshindù wà bifwànyine kuseeswisha ne Basungula mene bu ne bìvwa mwà kwenzeka, pankaci pàà cilelèla ne cyà mafi.

57 Mpindyewu, mu b̀anà bàà balùmè aba, pàvwàbo bàlwa ku byoshelu byàbò, ne benza dikuukwila. Mpindyewu mvwa munkaci mwà kwela meeji d̀ibà adi bwà b̀ungi bwà byoshelu mu dindà emu, mu maèkèleeziyà ne bilòngò bilenga mbiteèka pa byoshelu. Ǹenku abi's mbìmpè. Ncyèna ne c̀indi mfwilà naabi to. Kàdi aci c̀idi c̀imwèka ànu bu ne lwà ku ndekeelu kwà dikuukwila, nkutèeka ndambù wa bilòngò pa cyoshelu, anyi—anyi èkèleeziyà mulenga, anyi bilengejilu anyi cintu kampànda, ne aci c̀idi c̀imwèka bu ne c̀idi c̀icijikija.

58 Ǹenku bìvwa mùshindù awu ne Kaayinà, bwalu wàkatwàla mamuma à mu budimi, ne kwenzelayè Nzambì mudimu wèndè, ne wàkabèngiibwa bwalu kàvwa mulwè mu mùshindù mwakàne ne mushindikiibwe ùvwà Nzambì mumutùmìne diyì bwà kulwa nànsa. Kàdi ùvwà mufile mulàmbù wèndè, ne mwènzè cintu cyònsò ne butèndeledi bwònsò bu mwanààbò, kàdi wàkabèngiibwa. Ǹenku wàkabèngiibwa ku luseke lwà

nyumà, dîbà adi cyàkafikisha mukàwu ku dijuukawù munda mwèndè, bwalu ùwwa mwena lukùkà.

⁵⁹ Aci cìdi mu muntu, kèna mwà kupanga kwikala cìdiye to, bwalu yèyè mmulediibwe mu ngiikadilù awu. Muntu mmuleejiiibwe mu Dyulu bu ngènzàmpèkààtù, kùdì ngènzàmpèkààtù. Mwawa ngàakula pa cyôci aci kùkaadi cikondo kampànda, ki muntu kampànda kwambayè ne: “Dîbà adi aci kî ncijaalàme to. Byôbi bikèngela bwà mèmè kwikala muleejiiibwe kùdì cishikù cyà muntu kampànda, dîbà adi ncyèna ne mpùngà to.”

Mèmè ne: “Aci’s ncilelèlà, bwalu udi mulediibwe ngènzàmpèkààtù, kàdi udi muleejiiibwe. Udi mupiiishiibwe mu dipiishiibwa, ku dileeja dyà mpàla.”

⁶⁰ Èè, dîbà adi, aci cìdi cìmwèka cyà lwonji lwà menemene. Kàdi cikùdimùne ku luseke lukwàbò, dîbà adi tudi balongolwela Mwoyi wà Cyendèlèlè, ku dileejiibwa. Kùwva uwwe mulèje mpàla wetù, ku lufù; Mukwàbò wàkaleeja mpàla wetù ku Mwoyi wà Cyendèlèlè, pa nàнку cìdi cìtwàluja cyàkàbidì kumpàla kwà—kwà Nkwasa wa butùmbi kàbidì. Muntu yònsò ùdi wàlukila buludì pa kaaba kàmwèkàmwè aku, bwà kwenza disungula dyètù.

⁶¹ Kàdi lukùkà lùtùku misangu yònsò alu, cìmpè ne cibì, bubì bùteeta kutònkola bwakàne. Cyàkabanga mu Edènà, ne ncilwè munda mwà bikondo. Ncilwè too ne mwàkabwelàci mu maalu àà ditunga. Ncibwèlè mu maalu à èkèleeziyà. Ncibwèlè mu nsòmbelù wa mu lubànzà. Lukùkà, lùteeta bwà kukòokeshà anyi kubùtula, lùteeta kwikala ne bukolè kumutù, kusàkila pambèlù. Nènku tudi tumòna cintu aci munkaci mwà kukwàta mudimu myaba yònsò, ne bitu ànu nàнку misangu yònsò, cintu cìmwècìmwè aci, bàteeta kukòokeshà anyi kutàmba lùbilu.

⁶² Mu Dipungila Dikùlukulu, Nzambi, mu matùkù à bapròfetà, kale wàwa. Ndi naabi byàbùngì bifùnda kaaba aka, bìndì ncìyi mwà kupetela dîbà dyà kufika ku byôbi nànsha. Kàdi, Nzambi, mu matùkù à bapròfetà bàà kale abu, munkaci mwà bintu byònsò ebi, ànu mwàkenzàYe mu budimi bwà Edènà amu, pàakapiishiibwà Dìyi dilelèlà dyà Nzambi ne dikuukwila dilelèlà dyà Nzambi, ne kupàtudiibwa ne kushipiibwa, mu budimi bwà Edènà, ne Dìyi dyà Nzambi ditènkakaja kùdì lukùkà ne mukàwu, bìwva mùshindù awu mu èkèleeziyà kwònsò eku, bàteeta bwà kupùwisha Dìyi dilelèlà dyà Nzambi.

⁶³ Kàdi bu nwènù mwà kumòna, pàvwà dìyi dyà Abèlè dipùwa apu, mu lufù, Nzambi wàkajuula Setè bwà kwangatayè kaaba kèndè. Cìvwà kacìyi cìnga cintu to kàdi cidyanjididi cyà Pasààkà, cidyanjididi cyà dibiiikà dyà ku lufù, anyi dipingana dyà pa kaaba kumpàla kwà dibiiikà dyà ku lufù kulwadì. Aci cyàkaya bwà katanci, kupicila mu Dipungila Dikùlukulu tudi tucisangana cyènda ciya. Bapròfetà, Nzambi wàkashàala

mulamè Dìyì Dyèndè ne mwoyi pàmwè ne bapròfetà. Bàvwa bààkula Dìyì dyà Nzambì; kàdi bààkabààsa mabwe. Ne pàvwàbo ànu bààse umwe mabwe ne bamuumushe, Nzambì ùvwa ùjuule mukwàbò. Ne bàvwa mwà kwasa mukwàbò awu mabwe ne kumwipata, Nzambì ùvwa mwà kujuula mukwàbò. Yèyè ùtu misangu yònsò ànu mushààle mulamè ntèmù Wendè ne mwoyi. Munda mwà bikondo Yèyè mmùlamè Dìyì Dyèndè ne mwoyi kumpàlà kwà bantu, kuumukila ànu ku Edènà kwàka.

64 Nènku mpindyewu tudi tujandula ne, Kaayinà mmwenzè ànu ùjingulula ne ùvwa mwenzè cyàkenzàye aci, èè, wàkapàtuka mu Bwikadi bwà Nzambì, ne wàkatwìbwa cìtampì kule ne Nzambì, ku cimanyinu cyàkatèèkiibwa pambidi pèndè. “Wàkapàtuka,” mùdi Bible mwàmbè, “mu budimi bwà Edènà, kubangila ku biibi byà budimi, ku esètè wa Edènà,” kupàtukayè, mutwiibwe cìtampì, mutwiibwa cimanyinu, kupàtuka mu Bwikadi bwà Nzambì. Cintu kaayipu’s wè!

65 Mbwalu bukòlè kaayipu’s wè, mùvwà Kaayinà, bwà mukawu, ne bwà dipanga budiswile bwà kupungishiibwa ne Nzambì ku njila umweumwe musungùlùke wakalwila mwanààbò awu. Nzambì wàkambila Kaayinà ne: “Bu wèwè mwà kukuukwila bu Abèlè, s’newènzè bimpè.”

66 Kàdi mu ngakwilù mukwàbò Kaayinà kwamba ne: “Cìndì musangìshe ncyòci eci. Cìndì naaci ncyòci eci, cìndì mufile ncyòci eci. Udi ucyàngata anyì ucilekela, cyònsò cy’Ùdì muswè kwenza aci, Dìsungwile.”

67 Mpindyewu aci cìdi ànu bu lwidi lwà bantu díbà dyònsò, mu nsòmbelu wa èkèleeziyà, mu nsòmbelu mukwàbò. “Byòbi ne . . .” mùdìbo bàmba, “mémè ntu nya mu èkèleeziyà. Ntu—ntu—ntu nkwàcisha èkèleeziyà, ntu—ntu ngèza cikampànda. Nzambì Yèyè kàyì mwà kwitaba aci to, ki cìdi citàmbe bwìmpè cìndì mwà kwenza ncyòci aci.” Nwamònu anyì? Kàdi nànsha nànkù kì ng’aci cìdi Nzambì ùlòmba to. Nzambì kàtu ùlòmba aci to.

68 Nzambì ùdi ùlòmba nji—njila mulongolola. Yèyè mmulongòlòle njila, ne Yèyè ùdi ùkulòmba bwà kwitaba cìdiYe mulongòlòle, nwamònu’s. Yèyè kèna dijinga ne dikwàcisha dyètù mu diMwambila dyà cyà dyenza ne mwà kucyènza to. Yèyè mmutwènzèle mùshindù wà twètù kwenza, ne bintu bìvwa bìkèngela twètù kwenza, ne mùshindù mwinè ùvwàbi bìkèngela twètù kubyènza, ne Yèyè kèna dijinga ne mmwènenu yètù mu cyòci aci nànsha kakesè. Katwèna ne cyà kulwa mùshindù awu to. Kàdi tudi tusangana ne bantu bàdi badifile ku dyenza cyòci aci, mu bikondo byònsò. Kàdi Nzambì wàkashààla mulamè Dìyì Dyèndè ne mwoyi pàmwè ne bapròfetà Bèndè, ne bikwàbò, munda mwà cikondo cyònsò mwàkalwàYe amu. Nènku tudi tucisangana leelù ewu.

69 Nènku tudi tucisangana mu cidiidi. Ndi ne ndambù wa bintu bitèèka mwab'ewu bwà bwalu bwà cidiidi, bwà mùshindù utwikalà mwà kusangana ne nànsha mu ditùkù ditùdi edi, ne bantu mbasumbishe makenji à bwanààbutè bwàbò ku cidiidi. Nènku piikalà muntu nànsha umwe wa kunùdi mwikale ànu ne mukàbà wa mèyi wùndi mwakùlepù, mu Middletown mwàmwa, mu Ohio awu; mu dyalumingu, kùkaadi lumingu lujimà; pa bidì bitàngila Izàbèlè ne Aakàbà, ndi njinga bwà nwènu kuwùtèèlejaku musangu kampànda. Ne mùshindù mwinè udi ditùnga, bwà lukùkà, ne ndambù wa ndola misakidila, ne—ne mmwènenu mutàmbe kumanyika munkaci mwà bantu, kakùyì mpatà to mbasumbishe Kilistò ànu mwàkènzà Yudààsà kùkaadi bidimu binunu bibidi amu, ku binjànjà byà mfranga makumi àsàtù. Kaa, s'ncintu cilenga cyà dikèma, pa kwela meeji ne ngiikàdilù udi wenzeka mu ditùnga edi ne bantu aba leelù ewu! Pa kwela meeji ne kùkaadi bidimu byàbúngì, kabàvwakù bafwànyine kwenza cintu bu nàнку to. Kàdi leelù ewu bàdi ne lukùkà lwàbúngì be, bàteeta kupeta mfranga yàbúngì, bàteeta kupeta bikondo byà bitàmbe kupeepela bikolè. Mpindyewu aci, mu bushùwà bwà bwalu, n'gewu udi kàyi mwena Kilistò.

70 Mwena Kilistò kèna ùlòmba bintu bipeepèle to. Katwèna . . . Kùdi milayi búngì cyanààna leelù ewu myenza munkaci mwà beena Kilistò, bambi bààbúngì bàtu bàlaya bantu cintu cyà mashimi ne: “Bu wèwè ànu mwà kulwa kùdi Kilistò, ntàtù yèbè yònsò mmijikè.” Ndi nzwàmabila ne, paùdi ulwa kùdi Kilistò ki díbà didìyi yìbanga ndyòdi adi. Ki díbà dyùdi ùlwàta nsukùtù ne wambula cingoma, ne ubwela mu cyalu cyà mvità. Njila wa bwena Kilistò ewu kí mbulàalu bulengeja ne bilòngò byà maalu mapeepèle to. Cintu mmvità ànu ku díbà dyùdi ubangilakù, too ne mùdi nyumà webè ùlekediiibwa kùdi lufù. Kwènà ku pikinikì to. Wèwè udi mu byalu byà mvità. Ne pa nàнку tudi balayìibwe bintu.

71 Nènku ndi ndwa, misangu mikwàbò, ntu ngùmvwà bingenza bibi bwà kwamba eci, kàdi ndi ncyàmbilamù byùmukila munda mwà mwoyi wànyi, ne ndi nshààla ndubakana pàndi ntèèleja diitabuuja-dilenga-dilaya dyàbúngì, ntèndeleeu mulenga-mulaya. Ne cintu cyònsò leelù ewu ncishààle ànu cintu ci—cilenga cilaya. Mmu—mmuntu mulenga-mulaya. Nènku ntèlèviziyò mmukangule njila ku bayi bàà mu mabùlungù, ne bikwàbò, ne musumbà wà bintu bikùtakàne, bilenga-bilaya. Kaa. Nènku bàdi bàpàtula too ne mu dyondopa dyà kùdi Nzambì leelù ewu, dyondopa dilenga-dilaya. Mpindyewu, Nzambì kàtu ne bintu byà mùshindù awu to. Bàdi bàlwa ne bantu, misangu yàbúngì, ku cibumbà cyà ku cyambilu, ne bantu bàdi ne mapà, kakùyì mpatà to, kàdi biikàle ne dyumvwà dibì dyà Èvànjeeliyò, bàbèèla maanyi, ne bàsambila, ne biimàne mwaba awu, ne bàbànyùkusha too ne pàdi cintu kampànda cyènzeka; bwòndopiibwa. Ne pàmwàpa mwinè

muntu awu wènda mu mpèkaatù, ne wàlukila pambèlu ne usangana ne cidi cyàlukila cyàkàbìdì pambìdì pèndè. Pàmwápa ùvwa mu disaluka mu cikondo aci, ciinè aci cívwa ndiitabuuja dyà Nzambì òvwa mukùngwije òvwa dimwòndòpe, kàdi pàdiye bàya kule munkaci mwà beena bupidyà, s'didi dyàlukila cyàkàbìdì. Necicyènzè musangu wònsò.

Cidi citùkèngelà leelù ewu ndyondopa dyà kùdì Nzambi, mmapàngadika à makezùke bwà Kilistò! Cyà bushùwà.

⁷² Mvwa mbala mukàndà mumfùndila ànu àbìdì àdì panshi aa ùvwa muntùmina kùdì Nsangilu wa ba-Luthériens, mu Allemagne, kùvwa mwa—mwanèètù kampànda musòmbèle mu Allemagne, ne wènzamù mudimu wà dyondopa, mwikàle ne ditùulà dyà mfranga dyà kùdì èkèleeziyà wa ba-Luthériens ne beena Mpenta, ne bakwàbò. Nèku mu mukàndà ewu bàvwa bafùndemù ne: “Ki yèyè kwamba ne: ‘Wèwè udi uyiisha ne dyondopa dyà kwà Nzambi; ne cyònsò cidìbo ne cyà kwenza, nkubàtentekela byanza, ne bòbò nèumvwè cintu kampànda, ne kwondopiibwa.’ Yèyè ne: ‘Ncyà bushùwà ne ndi mpangakana neebè.’ Yèyè ne: ‘Kàdi bishi bwà Deborah Stadskev pàakafwàye kuntu kwàka apu? Mwànà mupwàngàne, ne mubidi tumatuma dīngà ditùkù, ne ndambù wa mèbà àkalondà ùvwa mulààle mufwè. Nèku nwènù bònsò kubànda kuntwaku, ne nwènù kusambila, ne nwènù kumunyùkusha, ne nwènù kumulaaba maanyi, ne bikwàbò byònsò, bwà dyondopa, kàdi kakùvwa mwoyi nànsha ùmwè to. Mwànà awu uvwa mulaadika mwaba awu.’ Kwambaye ne: ‘Pashiishe kubiikilabò Mwanèètù Branham ku nshinga, ne yèyè kàakambakù cintu nànsha cìmwè to ànu toz ne pàakapetàye dipàngadika dīmpè dishìndàme dyà kùdì Nzambi, ne pashiishe kulwayè mu Dīnà dyà Mukalenge Yesù, bwà kwamba—kwamba Dīyì.’”

⁷³ Mpindyewu ke cidi citùkèngela ncyòci aci, kupeta dipàngadika dishìndàme dyà kùdì Nzambi. Ki bwà cinyi bìdì bikèngela bwà twètù kulwa. Ki bwà cinyi tudi tubàtiiza mu Dīnà dyà “Yesù Kilistò,” ndipàngadika dishìndàme dyà kùdì Dīyì dyà Nzambi. Ki bwà cinyi tudi tushààla ne bintu bitùdì twenza, bwalu m’Mèyì matùma à Nzambi ne Èvànjeeliyò wa Nzambi. Nèku tudi ne cyà kushààla Nendè ànu mùshindù ùdiYe mufùndiibwe awu. Nànsha mwitabùùjìibwe, nànsha wèwè mukìnyìibwe, anyi ni ncyinyi cyenzèka, aci kaciyèna ne dipetangana nendè Yèyè to. Nzambi mmuswè mapàngadika mashìndàme. Kàdi mmunyi mùdì mwà kucyènzà paùdì mumanyè ne udi mupiile ànu kwine kwònsò aku? Kwèna mwà kupeta dipàngadika dishìndàme dyà kùdì Nzambi to. Mmunyi mùdì mwà kulwa kulòmba dyondopa dyà kùdì Nzambi paùdì mumanyè ne mwoyi wèbè kī mmujaalàme kumpalà kwà Nzambi, bwà kuMukwàcila mudimu? Nwamònu’s, udi muswè kwalukila ne kenza bintu byà pa buloba. Kwena mwà kwondopiibwa mmùshindù awu to, nwamònu’s. Udi ne cyà kulwa mukezùke

kumpàlà kwà Nzambì, ne kulàmbula nsòmbelu webè ne mwoyi webè kùdi Nzambì, ne pashiishe Nzambì neòndopè. Nènku didi dinènga díbà adi, bwalu diitabuuja dyèbè dívwa dyèlè lwongo.

⁷⁴ Mpindyewu mu, tudi tusangana ne lukùkà, nànsha nàнку, mu èkéleeziyà, ne cidìidì, ne mu maalu à ditùnga. Ditùnga dimwè, tàngilàayi mu Àfrikè mpindyewu, ncinyi cidi munkaci mwà kwenzeka. Tàngilàayi, bwà lukùkà, tàngilàayi nùmonè cidi cyenzèke kwàka mpindyewu mu Àfrikè; kí ng'anu amu nkàayamù to, kàdi pa buloba bujimà, myaba yònsò, bwalu muntu mmuswè kwikala kampànda. Bòbò, eci ki cyàbò cyònsò cidibo naaci, cidi ànu pa buloba apa, anyi, ki cidi sombelu wabò ùleeja.

⁷⁵ Bu ne eci ki cyònsò ncímwà naaci, nùнку's ndi muntu mwena dikènga. Ndi ngènda nkèba Cimenga cidi Mwibaki ne Mwenji mwikàle Nzambì. Mwaba awu ke wutùdi tutèekela mabanji ètù, bwà kiipàcilà aku.

⁷⁶ Bàna bàa Kaayinà, anyi bàna bàa balùmè bàa Sàtaanà's wè, mbàna bàa Sàtaanà bwalu Kaayinà ùvwa mwànà wa Sàtaanà, ne pa nàнку, ki bwà cinyi, bàna bàa Kaayinà leelù ewu. . . Kàdi wèwè udi wamba ne: "Udi mutwishiibwe bwà bwalu abu anyi, Mwanèètù Branham?" Èyowà, ndi mutwishiibwe. Ndi mutwishiibwe bwà cyòci aci. Bwalu. . . tèelejàayi.

⁷⁷ Yesù, pàvwàYe pànu pa buloba, Wàkambila balombodi bàa butèdeleedi pa lùkàsà ne: "Nudi bàa tatwènu, dyabùlù." Kàdi bàvwa ne difwànà dyà Nzambì, ne bàvwa batèdeleedi, ne bàvwa bamanyi bàa mabàla, ne bavwa ne nzùbu minène, bàvwa ne èkéleeziyà minène, ne bàvwa ne mamanya manène à tùlaasà tunène, ne bwakwidi, ne malondyanganyi, ne bikwàbò, kàdi bààkapanga kujingulula ne Kilistò ùvwa Nganyi. Bààkapanga kubàkula ditùkù dyàbò.

⁷⁸ Ne ànu mwàkenzàbo musangu awu amu, ki mùdìbo bènza mpindyewu, ànu mùshindù ùmwèùm wè awu menemene. Bàdi bàpanga kumanya ditùkù ditùdi ne mwoyi, ne bintu bìdi Nzambì munkaci mwà kwenza. Mpindyewu tudi tumòna ne ki bwà cinyi, bàdi mwà kutèeka. . . Mu balombodi bàa ntèndeleeleu abu. . .

⁷⁹ Mpindyewu s'ki cyòci eci! Piikalàbi ne balombodi bàa ntèndeleeleu abu mu ditùkù adi bààkabìkidiibwa ne mbàna bàa dyabùlù, tudi bamanyè díbà adi ne dyabùlù, ku cibangidilu, ùvwa ng'ewu wàkasonsola Kaayinà bwà kukèngeshayè mwanààbò ne kumushebeya. Ki cintu cimwècimwè aci cyàkenzeka kùdi balombodi bàmwèbàmwè bààkakèngeshà Yesù Kilistò ne kuMushebeyabò. Bàvwa benzèjiiibwe ku bukolè bwà kwangatabò dipàngadika ànu mùvwàbo benzèjiiibwe ku bukolè kale wàwa mu budimi bwà Edènà amu. Bàvwa benzèjiiibwe ku bukolè bwà kwangata dipàngadika ne: "Èè, kàdi bìshi bwà Eci?" Bàna bàa Kaayinà, bàna bàa Sàtaanà.

Wèwè udi wamba ne: "Aci cidi bwà matùngà anyi?"

⁸⁰ Pàakabàndà Sàtaanà ne Yesù ku lusongo lwà mukùnà bwà diteeciibwa apu, wàkaMuleeja makalenge ónsò à pa buloba. Mpindyewu, ki cyónsò cìvwàku ne cyónsò cìvwà cifwànyine kwikalakù aci, makalenge ónsò à pa buloba bujimà awu. Ki yéyè ne: “Ngàanyi mémè, ne ndi ngènta naawù cyónsò cìndi muswè. Ndi mwà kuàfikisha ku dilwangana mvità, ndi mwà kuàfikisha ku dyenza *cikampànda* anyi ní ncinyi cyónsò.” Wàkamba ne makalenge ónsò à pa buloba ngèndè, pa nànkù dîba adi tudì mwà kumòna mùdì lukùkà ne citù bibwela mu cidìidì. Nwamònu anyi? Tudì mwà kumòna dîbà adi mwaba ùdìci mu èkèleeziyà ne mu balombodi bàà èkèleeziyà, mwaba ùdì lukùkà ne citù bibwelela mu èkèleeziyà.

⁸¹ Mpindyewu tàngilàayi lukùkà lùmwellùmwe lwà kale lwàkatwàdijà mu budimi bwà Edènà, lwàkatwà muntu kampànda citampì cibì alu, ne Citampì cilelèlè pa mukwàbò, kupwekabi buludì mu bikondo byà Mukalenge wetù Yesù. PàvwàYe pànu pa buloba, Wàkalumbulushiibwa ku cyàkabìikidiibwà ne “mbwakàne,” tubàdì twà bwakàne. Ndishimakaja dibì kaayi's wè! Kakùvwakù cintu nànsha cimwè cìvwàbo mwà kupeta bwà kuMudyula naaci to. Ki cìvwà luseke lwà cidìidì ncyòci aci. Kabàvwà mwà kupeta cintu nànsha cimwè cyà kuMudyula naaci to. Mu mùshindù mene wà ne Pilaatù mene, yéyè mwinè, kwamba ne: “Ncyèna mpeta cilèmà nànsha cimwè mu Yéyè to.”

⁸² Pashìshe èkèleeziyà kulwayè. Mbenzèjìibwe bwà kwangata dipàngadika kampànda. Paanyimà pàà beena cidìidì bamanè kuMulekelela, bwà kukwàcishangana mudimu ne nyumà umweumwe uvwa mu èkèleeziyà awu, aci cìvwà mu cidìidì; bwà kuleeja ne pìikalà Sàtaanà mucìmùnyìibwe mu eci, ùcìvwà ànu ne cintu kampànda cilaminyina, ùvwà mwà kwalukila buludì mu èkèleeziyà. Ki kuMupoopelabò pa nkùrusè, bwalu bàvwà benzèjìibwe ku bukolè bwà kwangatabò dipàngadika. Ki bôbò kwamba ne: “Tùpèèshèku Baalàbààsà pamutù pàà Yesù.” Nudi numòna mwàkacyènzàbo anyi?

Cidi ànu kumpàla kwètù leelù ewu, cintu cìmwècìmwè aci, ne citù ànuku ne necìkalàku misangu yònsò, benzèjìibwe ku bukolè bwà kwangata dipàngadika!

⁸³ Mpindyewu, pààkenzàbo dipàngadika ku bukolè, Pilaatù wàkamanya mu mwoyi wèndè ne pàakabàlekelelaye ku... pààkalekelelaye Yesù kùdì èkèleeziyà, s'ùvwà mumanyayè ne èkèleeziyà ke uvwa muMufile bwà kwediibwaYè ku nkùrusè; ne bu yéyè mwà kuMusùlula kumwaluja kùdì èkèleeziyà, èkèleeziyà s'ùvwà mwà kuMupoopela pa nkùrusè. Pa nànkù, Pilaatù kèna mufwidìibwe luse nànsha! Yéyè wàkangata màyi ne kuteeta bwà kwowa ku byanza bwà kuumusha Mashi à Kilistò pa byanza byèndè, kàdi kèna mwà kucyènta to.

⁸⁴ Kubangila ànu pa diinè dîbà adi, lwà mu Suède emu, anyi

mu Suisse's wè, mwàkajikijilà Pilaatù bidimu byèndè pashishe, kujimijayè lungènyi, kupaalayè, kukadyèlayè mu dijiba dyà mâyi bwà kufwà. Kùdi mwanu mwela ùtù wàmba ne: "Pa díbà isàtù wa mapingaja, mâyi à bleu àtu àpweka àfùmína panshì pàà dijiba adi." Bantu bàtu bàkùngwile mwaba awu bàfùmína pa buloba bujimà bwà kubandila cintu aci. "Pa díbà isàtù, mâyi à bleu awu, àdi àmwèka à diikala dyà bleu wa mufiike bikolè àdi àpàtuka mwinshì mwà mwaba kampànda, ne àvwànduluká pamutù pàà mâyi apu ne àlukila kàbìdì lwà mwinshì amu, bwà kuleeja ne mâyi nànsha àmwèkaena mwà kusukula Mashi à Yesù Kilistò ku byanza byà muntu nànsha umwe to." Yèyè mmupiile!

⁸⁵ Ne muntu yònsò paùkaadìku ne Kilistò mutèèka pa byanza byèbè, kakwèna cintu nànsha címwè cìdì mwà kucisukula ne kucyùmushapu to. Kùdi cintu ànu címwèpelè cyà kwenza, nkuCìitaba, kuCìitabuujá.

⁸⁶ Bàná bàà Sàtaanà, bàná bàà Kaayinà, bàdi bàkèngesha bàná bàà Nzambì, kubàshebeya. Ki cyàkenzelàbo Abèlè ncyòci aci. Ki cyàkenzelàbo Yesù ncyòci aci. Ki cyàkenzelàbo baprófetá ncyòci aci. Ki cìdì munda mwàbò bwà kucyènzabo kàbìdì, ne nebàcyenzè pàdì ànu njila ùkàngudiibwa bwà bòbò kucyènza.

⁸⁷ Vùlukààyi ne, tudi benzè ànu bu bàdi bakadibwejàkàje ne benza maalu àà lukutukutu, ne bapàtùle bantu mu njila wa Èvànjeeliyò ne wa maalu-malonda, bwà cìdì ne cyà kwenzeka. Nènku's ki twètù aba bakùngàmàngàne naaci cyàkàbìdì, ànu kaaba aka mene mu ditùngà dyètù, ne katwènakù ne citùdì mwà kwenza pa bwalu abu to. Kàdi udi wamba díbà adi ne: "Mwanèètù Branham, kèèbè kabingilà kaùdì ucìdyuwila nkàà bìshi?" Ànu mmùndì nciyi mwà kwimanyika mpèkaatù nànsha; kàdi ndi mwà kwamba dyànyi dìyi bwà kucilwisha. Nènku ki cyòci aci menemene cìndì ngenza mpindyewu bwà kulwisha mpèkaatù, ne cìbèngangana ne cintu cibì. Tudi benzè bibì, ne netwikalè mwà kunowa citùdì bakùne, ànu menemene.

⁸⁸ Kacya ànu ku Middletown, bàvwa ne—ne cisangilu. Batwàle nsaserdòsè, muyiishi wa ba-Baptistes, ne muyiishi wa ba-Presbytériens, bònsò pàmwè, kubàkonka bwà mfranga ya mu tùlaasà eyi. Ki nsaserdòsè kwitabayè ne beena Mishòònyi bàvwa bafutè bitàdì byà mwomùmwè ne—ne beena Kàtòlikè, ne—ne yòyi mfrangà ayi yìdì ne cyà kufidiibwa ku nseke yònsò yìbìdì, ki yèyè ne: "Cìvwà cikèngelà bwà twètù kwenza nkwasá cilongelu ànu címwèpelè, cilongelu cyà Kàtòlikè." Kaa, bushùwà's, kupeta bàná abu pàcìbo batekète's. Kaa, kaa, cintu kaayìpu's wè!

⁸⁹ Nènku mmunyi mùdì bantu basòmbe mwaba awu, batwàla cintu eci ànu bwà cìdìdì! Mbìshi's, ncyènà ncyùmva to. Kàdi's ki twètù aba, kaaba aka mene mu dindà dyà Paasàkà edi. Nènku cintu mene eci, kavwidilà kèètù mene mu ditùnga emu, kushààla beena Àmèrikè, kàvwa bwà budìshikaminyi bwà ntèndeleeleu bwà kubènga ndongolwelu wa Izàbèlè awu,

kàdi twètù kucyùnguluka ne tucyèlela tukàndà kuciteeka pa cibùmbà cyà ku cyambilu cyà ku Maison Blanche. Cintu mene citùdi bavwidile munwemu bwà kwikala basùùlùdiibwe ku cyôci aci! Kaa, cidi—cidi ngiikàdilù wa dikèma utùdi basòmbèlemu mpindyewu, nudi bamanyè aci; èkèleeziyà wa nyumà, bwalu wàkadisùmbisha.

⁹⁰ BàakaMushebeya, kuMushebeyabò ànu mwàkenzàbo Abèlè wa lulamatu amu. Bwà cinyi Abèlè, wàka . . . wàkashipiibwa? Bwalu mu mwoyi wèndè ùvwa ne dibuulula dyà diitaba dyà Nzambi dyà cyàkakèngela bwà kupikula muntu ku mpèkaatù. Ki bwà cinyi bàakashebeya Yesù, bwalu munda Mwèndè mùvwa dibuulula dyà civwà cikèngela bwà Nzambi kukezulaye mpèkaatù. Ki kabingilà mene kàdi kenza leelù ewu ne bàdi bàbèngangana ne Èkèleeziyà mulelèlè wa Nzambi udi ne mwoyi, bwalu Civwa ciyiisha dikezudiibwa ku mpèkaatù, bintu bidì byènza ne bantu bèndè bishiilàngàne, bènze maalu bishiilàngàne.

⁹¹ Nènku paùdi umubweja buludi mu—mu èkèleeziyà utùdimu ne mwoyi leelù ewu, mu bisùmbu byètù byà beena Mpenta ebi, mbaalùkile buludi cyànyimà, ne bènza bintu bimwèbimwè bìvwàbo bapikùdiibwe ku byôbi bwà kabàbyenjì abi. Cidi cileeja ne kùdi cintu kampànda cibì mwaba kampànda. Bwanga bwà mpèkaatù! Ùdi ùbwela bipeepèle menemene, ùdi ùdifindamù ànu bu mùdi, èè, ànu bu mu didyàlula's mu ntèndeleele mulelèlè wa cyena Mpenta. Kàdi cyôci kaciyi cipàtula kaabwalu kàà mùshindù awu to, cyôci kaciyi cipàtula bintu byà mùshindù awu abi to, kùdi cintu cipampàlámùke mu cyôci mwaba kampànda.

⁹² Mmunyi mùdi mudibu wà mawòji mwà kukwàma bibimbi? Kacyèna mwà kucyènza to. Mmunyi mùdi mwônji wà mvinyo mwà kukwàma bimuma byà pèche? Kawèna ùcyènza to. Piikalàwu ùkwàma bimuma byà pèches, nànkù kùdi mwoyi wà mucì wà pèche mu mwonji wà mvinyo amu.

⁹³ Nènku ki citùdi bamanyè leelù ewu ncyôci aci. Èkèleeziyà, nànsha yèyè ùjikula bishi ne ùdi Èkèleeziyà wa Nzambi udi ne mwoyi, yèyè kàyì ùkwàma Nzambi ku lupàndu lwà cyena-kale to, wàluja bantu ku—ku lupàndu lulelèlè lwà Nzambi (ne ciinè aci cidìleeja munkacì mwàbò, Nzambi mwikàle ne mwoyi munkacì mwàbò), dìbà aci ncintu cyà mafi, kí—kacyèna—kacyèna cikwàma Mwoyi ùvwa Yesù mwambè ne neCikwamè to.

⁹⁴ Kilistò wàkafwà ku Kàlvariyo. Mùshindù mwinè wàkayàYe ku nkùrusè awu's wè! Mvwa mbala kakàndà kakesè mwab'ewu ànu àbidì àdì panshì aa, kàà ne bu—bukèbikebi kampànda, nènku mu bukèbikebi ebu mèmè kusanganamù cintu kampànda cyà citàmba kukèmeshà. Mèmè kusòmbela panshì, ne kutèeka mukàndà panshì, mèmè kwela byanza byànyì muulu ne kutùmbisha Nzambi, kujuukila kuulu ne kutwàdija kunyùnguluka ndambù, ki mèmè kusòmbela panshì e kuwùbala

cyàkàbìdì. Mémè kudyàm̀bidila ne: “Kaa, mmwòmò anyì, bwà ne pa kakùnà kàm̀wèkàm̀wè kàvwà Yesù mupoopèdiibwe pa nkùrusè aku, Adàmà wàkafwilapù ne wàkajiikibwa pa kakùnà kàm̀wèkàm̀wè pàakafwilà Yesù apu, ne wàkajiikibwa pa kakùnà kàm̀wèkàm̀wè pàvwà Adàmà mufwile apu; wàkafwila pa Gològòtà, ne wàkajiikibwa pa Gològòtà anyì?” Ki mémè kudyàm̀bidila ne: “Ndinwàngana kaayi edi, nànsha byòbì byà bushùwà anyì kabìyi byà bushùwà.”

⁹⁵ Twambè ne bìvwa bilelèlè. Dìbà adi, Adàmà wa kumpàla wàkafwà ne wàkajikiibwa, ne ùcìvwa ànu mu lupwishi amu, bwalu yèyè ùvwa ùleeja bàà pa buloba ne bantu, bwà kwenza mpèkaatù. Kàdi Adàmà Mwibìdì, bu mùdiye Nzambi wa mu Dyulu, pàakafwàYe ku Gològòtà aku, kakùvwa buloba bùngì bukùmbàne bwà kuMulama mwaba awu to, Wàkabiika ku lufù mu ditùkù diisátù ne ùdi ne mwoyi bwà kashidi. Kàdi bwalu bwà mpèkaatù bwàkajika!

⁹⁶ Nzambi wàkajikija bwalu bwà mpèkaatù ku Kàlvariyo kwàka, ki kwàkafuciibwà dibànzà. Pàakafwà Adàmà ewu, Adàmà Mwibìdì, Wàkafuta dibànzà dyà mpèkaatù bwà bukwàbantu.

Ki bàà pa buloba kuMwelabò mu lukità, ne kuMukàngila mu lukità amu.

⁹⁷ Ne bòbò's mbafwànyine kwenza cintu cìmwècìmwè aci leelù ewu. Bàdi bateeta kwenza cintu cìmwècìmwè aci leelù ewu. Ncyèna muswè bwà eci cìnùpìtè to. Bàà pa buloba bàdi bateeta, ne nebàtambè kubiipa dìbà dyònsò, bwà kukàngila Kilistò mu lukità cyàkàbìdì. Bàdi bateeta kuMuvwija Nzambi wa maalu-malonda, Ewu wakenda mu matùkù awu, ne kupèèsha bayiidi bukolè bwà kwondopa babèèdì, ne kwipata badémons.

⁹⁸ Kàdi cyàkenzàbo ncinyì? Mbenzè ànu beela meeji ne mbajikije bwalu Bwendè, ànu mwàkenzà Kaayinà pàakeelàye meeji ne wàkajikija bwalu bwà Abèlè, bààkaMukàngila mu lukità, ne kuMwelamù.

⁹⁹ Kàdi leelù ewu bàdi bateeta kulamina Kilistò mu lukità. Kàdi, kaa, cyàkenzàbo kùdì dindà dyà Paasàkà's wè! Dindà dyà Paasàkà dyàkanyangakaja tèlòlòjì yàbò yònsò nkòong. Nènku pàakalwà dindà dyà Paasàkà bwà cisàmbà, Èkèleeziya ewu, bidimu cinunu ne nkàmà citèemà pashiishe, kàdi kunyangaci tèlòlòjì wabò awu. Yèyè kí mmufwè to, Ùdi ne mwoyi bwà kashidi! Kabèèna mwà kuMulamina mu lukità nànsha lùm̀wè to. Udi mwà kuMwela mu lukità lwà ba-Méthodistes, anyì lukità lwà ba-Baptistes, anyì lukità lwà ba-Presbytériens, anyì cyònsò cyùdì muswè aci. Kàdi Yèyè—Yèyè mmubiike mupátùke mu lukità alu, ne ùdi ne mwoyi leelù ewu! Mwua ne lukità lwà ba-Baptistes, ne wèwè uvwa mufwànyine kwikala ne lukità lwà ba-Méthodistes, kàdi dīngà ditùkù Yesù wàkabiika kupátukamù,

kuumuka ku Nzambi wa maalu malonda, kuya ku Nzambi udi ne mwoyi, mwikàlepù, mwikàle ne mwoyi bwà kashidi.

¹⁰⁰ Cintu kampànda cyàkenzeka mu dindà dyà Paasàkà adi. Cìvwa Cìtampì, Cìtampì cisànkishìibwe. PààkaMwangatàbo ne kuMwela mu lukità, ne kutèèkabò cìtampì cyà cyena Loomò pamutù pààlù apu, kàdi pààkajuukà dîbà adi, pààkalwà dîbà adi! Yéyè wàkashàalamù bwà katanci, ncilelèlè, Wàkashàalamù munda mwà matùkù àsàtù à muunya ne à bufùku awu. Kàdi pa dîbà dilongolola divwà Mifùndu myàmbè adi, Àlèluuyàh, mu cikondo cyàkambàYe ne: “Shimbùlaayi mubidi ewu, ne tu ditùkù diisàtù Mémè nèngùjuulè!” Dîbà adi kawkèna cidì mwà kwimanyika Mufùndu awu to, Cìdi ne cyà kwenzeka! Ne cìtampì aci cyàkakòshìibwa, ne Yéyè wàkabiika ku lufù, Yesù umweumwe awu, ùdi cyàkàbìdi ne mwoyi bwà kashidi!

¹⁰¹ Nènkù munda mwà bidimu bitwè ku cinunu ne nkàmà citèemà, anyì pàmwàpa nèngàmbè ne bidimu cinunu ne nkàmà yinaayi anyì cinunu ne nkàmà yitaanu, maèkèleeziyà àvwa maMukàngile kule. Kàdi Yéyè mmwàmbe ne: “Nebyènzekè ne mu matùkù à ndekeelu, mùdi Nzambi wàmba.” Kakwèna cintu nànsha cìmwè cyàcìimanyikà to! “Nekwikalè Bukènkè ku ibaamulòlò! Byenzedi bìndi ngèza, nenùbyènzè pèènu. Nekwikalè Bukènkè ku ibaamulòlò!” Mémè ncyena ncyùka bùngì bwà bitampì byùdi uteeta bwà kubwikilapù to, Nzambi neàkosè cìtampì cyònsò. Yéyè wàkakòsa cibwikilu cyà lukità. Yéyè wàkakòsa cibwikilu cyà ifernò. Wàkakòsa cibwikilu cyà lufù. Wàkakòsa cibwikilu cyà lukità, ne kubiiika bwà kashidi, ne kucimunaYè lukità, lufù, ifernò, nkità, ne cintu cyònsò cikwatakaja kùdi bantu cìvwàku aci, bwà kuleeja ne Yéyè ùvwa Nzambi ne kèna mwà kubwikidijiibwa kàbìdi kùdi bantu to. Nzambi, bwà kashidi! Cintu nànsha cìmwè kaciyèna mwà kuMulamakù to; lukità kalùvwakù mwà kuumbwibwa mu ndòndò mukumbàne to, ifernò kàvwakù mwà kwikala ne luuyà lukolè lukumbàne to. Kaa, cintu nànsha cìmwè kacìvwakù mwà kuMulama to! Yéyè wàkakòsa cìtampì cyònsò ku Cìtampì cinènè cyà Noël aci, anyì, kì n’Cìtampì cyà Noël to, kàdi Cìtampì cyà Paasàkà cìvwàYe mubwikidiiibwe naaci aci. Ne Yéyè kwamba ne: “Cìtampì cìmwècìmwè cìndi muvwàla aci, nenùcìvwalè pèènu, bwà ne . . . Ne Cìtampì cìNdi muvwàla eci, necyènzè bintu bimwèbimwè abi paùdi mutwibwe cìtampì. Bwalu ewu udi ungiitabuuja Mémè, byenzedi bìNdi ngèza yéyè neàbyènzè pèndè; nènzè mene ne bitàmbe bunèna ku ebi, bwalu Ndi nya ku Taatù.”

¹⁰² Mmunyì muwàCìbwikidija? Neùcyènzè bìshi, bantu nebàpìte naaCì bìshi? Udi mufwànyine. . . Udi mwenzèjiibwe ku bukolè bwà kwangata dipàngadika kampànda, bwà kwangata dipàngadika dyèbè dyà ne cidì cikèngela kwenza pa bwalu abu ncinyì. Ncyà bushuwà menemene.

¹⁰³ Mpindyewu, tudi tusangana ne Yéyè. . . cibwikilu nànsha

cimwè kacivwa mwà kuMulama to, Yèyè wàkapàtuka. Nzambi wàkakòsa cibwikilu, cibwikilu cyà lukità, wàkakòsa cibwikilu cyà lufù, kukòsa cibwikilu cyà ifernò, wàkakòsa cibwikilu cyà lukità, ne kupàtuka ne bucìmunyi. Cyàkenza ncinyi? Cìtampì cinènè cívwa munda Mwèndè aci. Bàvwa mwà kubùtula mubidi awu, kàdi kabàvwa mwà kubùtula Cìtampì aci to. Nzambi wàkapèèsha Èkèleeziyà Cìtampì, dîbà adi, aci kacivwa mwà kubùtudiibwa nànsha. Pààkabùtulàbo Abèlè, Wàkabiisha Setè. Pàvwàbo bàbùtula mupròfetà kampànda kùvwa kùjuuka mukwàbò. Bààkatùngunuka ànu ne kubùtula. Kàdi Nzambi wàkabapèèsha cintu kampànda, dîbà adi, cidìbo kabàyi mwà kubùtula to. N'Nyumà mutàmbe-mfùkulu awu; n'Nyumà Mwìmpè Yèyè mwinè, ne Kèna mwà kupangila ne Yèyè mwinè kèna mwà kubola nànsha. Kèna mwà kubùtudiibwa to. Neàtungunukè ne kwikala ne mwoyi, ne ku tootooto, ne ku ndandanda. Ne bwalu Yèyè ùdi ne mwoyi, tudi ne mwoyi pàmwè Nèndè bwalu tudi batwìbwa cìtampì bakàngila mu Mubidi wà Mukalenge Yesù Kilistò. Kakwènakù mùshindù to, kakwènakù mùshindù wà kubùtudiibwa to, katwèna mwà kujimina to, kàdi tudi ne Mwoyi wà Cyendèlèlè. Amen. Nzambi ke mukùmbaji munènè wa bitampì abi.

¹⁰⁴ Yèyè wàkakòsa kàbìdì cìtampì cikwàbò cìndì muswè kwakula kaaba aka, cidì cìsanganyiibwa mu Ekèsòòdè amu. Kàdi ncyàkupeta dîbà dyà kufika ku Mifundu to, kàdi Yèyè. . . Wùdi ùsanganyiibwa lwà mu Ekèsòòdè amu. Pàvwà muntu mwenzè mpèkaatù ne mutàpùlùke ne Bwikadi bwà Nzambi, ne kulwayè bwà kukuukwila Nzambi, kùvwa cibwikilu cívwa cilembèlèle pankaci pàà mwaba wà cijila ne Mwaba mutàmbe cijila. Munda mwà Mwaba mutàmbe cijila mùvwa Butùmbi bwà Shekinàh. Kabàvwakù baanyìshìibwe bwà kubwelaMù to. Kabàvwa nànsha ne dyanyisha dyà kuWùtàngila to. Ne muntu uvwa ubwelamù, ùvwa ne cyà kwikala mulaabiibwe musangu ùmwèpelè ku cidimu, muvwàlè bìmpè, mwikale ne mashi, ne mashi mu byanza byèndè, mashi mu dilòngò, bwà kumyamina ku Nkwasa wa Ngàsà. Butùmbi bwà Shekinàh bùvwa bunène menemene mu mùshindù wa ne yèyè wàkajimija dikombo dyèndè muntwamu cidimu kampànda, e kupàtukaye kàyì (musangàne; mushiyè) mutwàlè dikombo dyèndè to. Nènku pààkalukilàye, cintu aci cikaavwa cyalùkile ku mwoyi, ne cívwa cìsampire, cyèlè bilòngò pambidi pààci pajimà apu, bwalu cívwa cìsanganyiibwa mu Bwikadi bwà Butùmbi bwà Shekinàh. Kàdi kùvwa cibwikilu cívwa cilembèlèle pankaci apu, bwalu kùvwa mpèkaatù pa bantu.

¹⁰⁵ Kàdi, kaa, mwanèètù, pààkacìmyaminàbò ditùkù adi ne Mashi à Yesù Kilistò, Nyumà wa Nzambi ngwàkapanda cibwikilu aci kuumukila kuulu too ne kwinshì, ne kwaluja muntu. Kàyì ànu mumulame kule ne Bwikadi bwà Nzambi cyaanàna to, kàdi Yèyè kumwaluja mu Butùmbi bwà Shekinàh,

kumubeja mu Bwikadi bwà Nzambi; bwà ne yêyè, mwoyi wèndè mufwè awu . . .

106 Yesù wàkamba ne: “Pìikalàbo benzèle Mucì mubishi cyôci eci, cyenzelàbo mùmè ncinyi’s?” Nènku pìikalàbi ne bààkaMwenzela nàнку, mwikale Mucì mubishi ne Mwoyi, nebìikalè cinyi bwà mucì wà kale mufwè wà mmwènekelu wa kwìsùkwìsù wùdì kawùyi ne Mwoyi, nwamònu’s, mpindyewu pàdì ciji cikolè cyà Nzambi cipòngolodiibwa apa? Mmuniyè mùdìku mucì wà kale mufwè wà mmwènekelu wa kwìsùkwìsù mwà kucìtwàla, pàdìbi ne Mucì mubishi awu, s’cyàkajimija mene ne Mucì mubishi awu, ne kuWùtùma mene, ne mu ifernò? Ciji cikolè cyà Nzambi cyàkapòngoloka bwà dipanga kutùmikila, dyà mpèkaatu, kutuma Mucì mubishi mu ifernò, newènzèle mucì mùmè cinyi pàdiwu ùwùlenga? “Pìikalà mwakàne mwà kusùngidiibwa mu lutàtu, ngènzàmpèkààtu ne udi kàyì ùneemeka Nzambi nebàmwènekelè penyì?” Muntu udi ubènga Njila awu, muntu udi mumanyè cidi cimpè awu, muntu udi mubuulùdiibwe kùdiye awu, kàdi yêyè ùcidi ànu ùbènga bwà kwendela mu Njila wa Nzambi, cìikalà mwà kwenzekela muntu awu ncinyi? Necìikalè cinyi?

Èyowà, Yêyè wakakòsa cibwikilu civwà citùpangisha bwà kufika pabwipi ne Butumbi bwà Shekinàh aci, bwalu mpèkaatu ùvwa mujike mpindyewu.

107 Nènku mpindyewu citampì ncimanyishilu cyà mudimu mujikija. Nènku tudi bamanyè ne citampì kampànda, byenze bu panùyaaya katwà citampì ku dikaadikà, èè, bàdi bèèlamù mudimu wònsò, ne batentakaja cintu ne cintu cyònsò, ke kushìishabo kutwà citampì too ne kùyaayaaci kafika. Citampì kanà cyònsò eci’s mmudimu mujikija. Paùdi ufùnda mukàndà kampànda, pashìishe ùdi ùtwibwa citampì ku ndekeelu. Kawèna mwà kutwibwa citampì pàdiwu kawùyi mujikè to.

108 Mpindyewu, mashi à mbùji ne à nkùngùlù yà ngombe, ne bikwàbò, kaàvwa mafwànyine kuumusha mpèkaatu to. Kàdi pàakajikà eci ku Kàlvariyo, cyàkuumusha mpèkaatu. Mpindyewu tàngilàayi.

109 Mu budimi bwà Edènà, bwà kupangisha bantu bwà kabàalukidi ku Mucì awu, Nzambi kutèekaYè Mwanjèlò mwaba awu bu citampì, ne mwelè wà mvità wùnyinguluka nseke yònsò, bwà kulama Mucì awu. Nènku pààkenzàye dikuukwila dyèndè adi, ne kupwekayè . . . Mpindyewu vùlukàayi ne, Úvwa ku Mucì awu n’nganyi? Úvwa Mucì awu n’nganyi? Úvwa n’Yesù.

110 Mucì wà lufù ùvwa mamwèbè, wàkakatwàla apa mu mwoyi wà mu bufùki awu. Kilistò udi Dilediibwa ku Mwoyi wà Nyumà. Ewu yònsò udi ne mwoyi ku mukàji awu, ùdi ùfwa; ewu yònsò udi mulediibwe kùdi Mulùme awu, ùdi ne mwoyi. Yònsò udi ulwila kùdi mukàji, ngwa mu bufùki; yònsò udi ufùmina kùdi

Mulùme, ngwa Nyumà. Kí mmulùme udi apa *ewu* to; Mulùme Kilistò Yesù!

¹¹¹ Kàdi tàngilàayi Muci awu, mulama; kawèna mwà kwalukila cyànyimà to, bwalu kakwènakù mulàmbù musungùlùke bwà kuumusha mpèkaatù to. Pa nàнку ki bwà cinyi pàakalwàbo kukuukwila, Butùmbi bwà Shekinàh bùvwa paanyimà pàa cibwikilu aci, busokòkìibwe kùdìbo. Bùvwa buumùshìibwe kùdìbo, kwangacila ànu ku budimi bwà Edènà.

¹¹² Kàdi pàakalwà Ditùkù dyà Mpenta, mwanèètù, pàakafwà Yesù ku Kàlvaryò kwàka ne kujikija mudimu awu, Kàakatwa muntu citampì kumukàngila pambèlù to, Yèyè wàkatwa muntu citampì kumukàngila munda Mwèndè. Nènku mpindyewu tudi batwìbwe citampì, ne bakàngila mu Bwikadi bwà Butùmbi bwà Shekinàh. Katwèna ànu batwa citampì bakàngila munda cyanàànà to, kàdi tudi batwa citampì bakàngilamù Cyendèlèlè. Amen! Kaa, ndi munangè aci, batwa citampì bakàngila munda mpindyewu! Ki Cìtampì cilelèlè cyà Paasàkà ncyòci aci ne: “Bwalu ku Nyumà umwèpelè nkutùdì bònsò batwìbwe citampì mu Mubidi wùmwèpelè.”

Wèwè udi wamba ne: “Nyumà Mwìmpè n’Cìtampì anyi?”

¹¹³ Efèsò 4.30 mmwambè ne: “Kanùbungamiji Nyumà Mwìmpè wa Nzambì unùdì batwìbwe nendè citampì too ne ku ditùkù dyà bupikudi bwènù to.” Ki Cìtampì cishùwashùwàlà, cilelèlè cyà Paasàkà ncyòci aci. Cìleeja ne mpèkaatù mmumana kufucila mushinga, bwèbè wèwè, ne Nzambì mmukwitàbe, ne udi mutwìbwe citampì mu Kilistò ku Nyumà Mwìmpè. Mpèkaatù mmujike. Bwà Cìtampì cyà Cyendèlèlèlè mbujikè.

¹¹⁴ Mpindyewu tudi babiìshìibwe ku lufù leelù ewu. Bwà cinyi tudi mwà kupeta cikondo cyà bwena aci pa bintu byà Nzambì? Bwalu tudi babiìshìibwe ku lufù. “Aba bàakadyànjlàYe kumanya, Wàkabàbìikila; aba bàakabìikilàYe, Wàkabàbingisha; aba bàakabingishàYe, mMubàtùmbìshe.” Dìbà adi tudi mpindyewu babiìshìibwe ku lufù. Tudi babiìshìibwe ku lufù kuumukila munda too ne pambèlù, kí nkuumukila pambèlù tubwela munda to. Kaa! Nudi numòna anyi? Kí nciwila citampì pambèlù, mùshindù *ewu* to, kàdi citwila munda. Kaa, èkèlekèlè, bu èkèleeziyà mwà kucimòna’s wè! Nwamònu’s, katwèna batwila citampì pambèlù to, tudi batwila citampì bakàngila munda. Mu matùkù awu, pàvwà—pàvwà mpèkaatù mwikàlè cinyangu kumpàlà kwà Nzambì, ne kakùvwa dikùmbanangana bwà kuumumusha to, tuvwa bakàngila kule naaci. Mpindyewu pàakapandiibwà citampì aci bipese bìbìdì, ne citampì aci cikòshìibwe ku mulàmbù wà mpèkaatù mufidiibwe kutùdì, mpindyewu tudi babàtìjìibwe munda, ne batwila citampì munda. Tudi babiìshìibwe ku lufù. Tudi mpindyewu babiìshìibwe ku lufù, bamanè kubiìshìibwa ku lufù. Mmunyi mùdì umanya? Bible’s ngudi mwambè nàнку! Amen. Tukàadi

babiìshìibwe ku lufù mpindyewu. Tudi mpindyewu babiìshìibwe Nendè ku lufù mu dibiikà dyà ku lufù dyà mu nyumà. Mwakù ewu *mufiùlùlùdìibwe* wùdi wùmvwija cinyi? *Mufiùlùlùdìibwe* mbwena kwamba ne “dibiikà dyà ku lufù.” Ncyà bushùwà. Tukàadi bamanè kubiìshìibwa ku lufù, mpindyewu mene, basòmbè pàmwè mu myaba yà mu Dyulu mu Kilstò Yesù, tusànkila Cìtampì cyà Paasàkà. Amen. Ki Cìtampì cilelèlà cyà Paasàkà cyà Nzambi ncyôci aci. Tudi munyi? Ku Nyumà umwèpelè babàtìiìbwe mu Mubidi, ne Batwìbwe cìtampì bwà Cyendèlèlè. Tudi mpindyewu babiìshìibwe ku lufù, mu nyumà. Tuvwa babiìke ku cinyi? Ku mwoyi wà mpèkaatù, tuvwa musangu kampànda ànu bangènzàmpèkàatù ne banangè bintu byà pa buloba.

¹¹⁵ Mpindyewu, kùdi bantu bààbúngì bàdi bàmba ne mbabiìshìibwe, kàdi nsòmbelu wabò ùdi ùjaadika bishìilàngàne. Nsòmbelu webè ùdi ùjaadika cyùdi. “Ku mamuma àbò nkunwàbàmanyinà,” mwàkambà Yesù. Ki bwà cinyi katwènakù bafwànyine kwitaba byà ne pàdi muntu wàkula mu myakulu mbwena kwamba ne yèyè ùdi ne Nyumà Mwìmpè to. Katwèna twitabuuja aci to. Kakwèna Mufundu bwà aci to. To, mukalenge. Bantu bàdi bààkula mu myakulu ne bàtùngunuka ne kwenza maalu mafwànàngàne ne àà bàà pa buloba. Ne bakàji bààkula mu myakulu ne bàbebula nsukì yàbò, bàlaaba bilaabu kwìsù. Huh! Wèwè kwèna mufwànyine kwamba ne cìvwa n’Nyumà Mwìmpè to. Nànsha kakesè, nànsha kakesè, nànsha kakesè. Muntu ùnwa bifwankà, ne ùya pambèlù apa ùkashààla ne mukàji wa mutumba nendè, wènda nendè masandi, bèna maalu à lukutukutu, nwambà ne aci n’Nyumà Mwìmpè? To, to. “Ku mamuma àbò nkunwàbàmanyinà. Mucì mubi kawèna mwà kukwàma mamuma mìmpè to, nànsha mucì mwìmpè kawèna mwà kukwàma mamuma mabi nànsha.”

¹¹⁶ Tudi batwìbwe cìtampì kùdi Nyumà Mwìmpè, Cìtampì cilelèlà cyà Paasàkà cyà Nzambi. Tudi bakàngila mu Mubidi wà Kilstò, batwìbwe Cìtampì bwà Cyendèlèlè. Kì ncìtampì bwà cipòlò kampànda cyà cikondo to; kàdi bwà Cyendèlèlè. Nènku mpindyewu muntu udi mupetè aci awu, mmubiìshìibwe ku bafwè, muumùke ku nsòmbelu wa mpèkaatù. Ncinyi aci? Nyumà Wèndè mmubiìshìibwe ku lufù, twipàcìlà twèndè—twèndè ntubiìshìibwe, mwoyi wèndè mmubiìshìibwe ku lufù, yèyè ncfìkìbwa cipyàcipyà. Ne yèyè ùdi ùdisanga pàmwè ne beena-mwàbò, bu mutùdi mu dindà emu, bwà kusambidilangana muntu ne mukwèndè, ne bwà kukwàcishangana muntu ne mukwèndè, bwà kukànkamikangana muntu ne mukwèndè, ne kusòmba ne kudisanga mu myaba yà mu Dyulu mu Kilstò Yesù, batwìbwe cìtampì kùdi Nyumà Mwìmpè. “Bwalu nwènu nudi bafwè, ne mwoyi wènu mmusokoka mu Kilstò, kupicila ku Nzambi, batwìbwe cìtampì kùdi Nyumà Mwìmpè,” mùdi Mufundu mwàmbè. Ki Mufundu ngwòwò awu. Mpindyewu nudi

numòna ne tudi batwibwe citampì kùdì Citampì cyà Paasàkà. Citampì cyà Paasàkà cyà dibiiikà dyà ku lufù, cìvwà cishindike ne mwoyi Wèndè ne cìvwàYe mwambè bìvwa bilelèlè. Mpindyewu tudi tujandula ne mmudimu mukùmbànàngàne, ncintu cyenza cilaya. Dibiiikà dyà ku lufù dyà Nzambi ncintu cyenza cilaya. Nyumà Mwimpè ki Citampì cyà Nzambi cyà cintu cyenza cilaya.

117 Mpindyewu tudi tulwa kùdì Kìlistò. Cintu cyà kumpàlà citùdì twenza, tudi tulwa babingishiibwe mu kuMwitabuuya Yèyè. Patùdì twenza nànkù, díbà adi tudi tumanya ne tudi benzè bibì, tudi tulòmba Nzambi bwà kutùjidila, aci ki cìdì citùkezulà ku nsòmbelu wetù wa mpèkaatù. Martin Luther, dibingishiibwa, ke mukenji wèndè. Pashiishe kulwakù Wesley, ne dijidiibwa. Ne pashiishe pààjikà byònsò, ne Èkèleeziyà Wèndè mukùmbànàngàne cishiki, cintu cìdì cilondà ncinyi? Mudimu mwenza mujikija. Mudimu mujikija nCitampì, cyà ne Èkèleeziyà mujikijiibwe.

118 Bu mùdì cipaapu cyà musàkà. Mònaayi pa kabèjì kàà ndola umwe. Mvwa muleedilekù. Ncyèna mumanyè ne mvwa mucyenze mu tabernacle emu, anyì to. Nudi numòna pa kabèjì kàà ndola umwe, cìdì cibiiikidiibwa ne “citampì cinène.” Mpindyewu mmunyi mùdiku mufwànyine kwamba ne États-Unis mmufwànyine kujingulula ne mu Èjiipitù mwàmwa bàdi ne citampì cinène, kàdì citampì cyà États-Unis ncyòci eci ku luseke lukwàbò eku, mukankù? Bwà cinyi bàvwa mwà kwenzejiibwa ku bukolè bwà kwenza aci citampì cinène, citampì cinène aci? Bwalu, bu nwènù mwà kumòna, ànu lwà paanyimà apu, lwà kuulu menemene kwà cipaapu cyà musàkà aku kùdì kaadibwe kakesè, ne kaadibwe kakesè aku nkaadibwe kàà mùsongà, ne dibwe dyà mùsongà adi kadyàkatèèkiibwaku pa cipaapu cyà musàkà aci to. Nku lusongo kutupù, ní nukààdikù bafikèku. Ku ngàsà wa Nzambi, mèmè nkààdi mufikèku. Pa nànkù kakwèna—kakwèna lusongo pa cipaapu cyà musàkà to. Ncinyi aci? Henòkà wàkaciibaka kumpàla kwà dipàasalala dyà màyi adi. Cìvwa nci—ncivùlukilu, ki bwà cinyi kacyàkabùtudiibwakù mu cikondo cyà dipaasalala dyà màyi adi to. Kakwèna cintu nànsha cìmwè cyàkacibùtula to, bwalu ncivùlukilu.

119 Mpindyewu nwènù mwà kumòna bìmpè, lwà kwìnshì eku ncibaalùlùke, ne pashiishe cìdì cyènda cikèèpela ndambù ku bunène, ne pashiishe ndambù mukwàbò, ne pashiishe tùyààya ku dibwe dyà mùsongà. Ki cikondo cyà ba-Luthériens ncyòci aci, dibingishiibwa mu Èkèleeziyà; dijidiibwa; pashiishe dibàtiiza dyà Nyumà Mwimpè. Kàdì ànu mùdìci cyènda cìsongoloka citàngìle ku lusongo amu, cìdì citùngunuka kuumukila ku cikondo cyà beena Luther, citàngìla ku cikondo cyà Wesley, cìbwela mu cikondo cyà beena Mpenta. Kàdì cyòci cimanè kuumuka mu cikondo cyà beena Mpenta, cìdì ànu cyènda cìsongoloka too ne mùdìci cikafika ku dishààla mu mùshindù wà ne mabwe ónsò awu akalamakana mu mùshindù wà ne nànsha

kapaaya . . .

¹²⁰ Àdi ne bujitu bwà binunu ne binunu byà kilò, kuntwaku. Mmunyi mùvwàbo baàbàndishe kuulu kwàka, aci cìcìdi ànu Mmunyi-busokoka kùdi muntu. Kàdi bàngata, ngàta mupimbu wà kapaaya aka, ne kuteeta kupkàpicishamù, nènku mmatàmba kulamakana bikolè mu mùshindù wà ne kwènà mwà kutèeka mupimbu wà kapaaya mwaba ùvwà bitoci ne cyà kwikala awu to. Kì mùshindù ùdi mabwe matèèkiibwe pàmwè bipwàngàne nànkù. Nènku mpindyewu pàdi dibwe dyà mùsongà edi, didi mabwe ànwàngana mùshindù *ewu* edi, matentàmàngàne, byenza bu mu mùshindù wà matumba bwà ne dibwe dyà mùsongà nedibwelè mu lusongo, ne kusòmba kujaalamamù. Kabyàkukèngela bitoci nànsha bikesè, nedisombè bipwàngàne.

¹²¹ Mpindyewu ki cìdi Nzambì munkaci mwà kwenzela Èkèleeziyà Wendè ncyòci aci. Ùdi munkaci mwà kusonga bantu, ne ùcìvwija mu mùshindù mupwàngàne wà ne, pàdi Dibwe dyà mùsongà, Kilistò awu, ùlwa, cìdi cipetangana ne nzùbu yònsò, ne pashiishe dibìishiibwa dyà ku lufù dyà cintu cyònsò mu kaabujimà, Èkèleeziyà mumane kubànda. Dibwe dyà mùsongà!

¹²² Mpindyewu tudi basòmbè pàmwè mu myaba yà mu Dyulu mu Kilistò Yesù. Mpindyewu tudi bamanyè ne Yesù, mubidi wà Yesù, wàkambwibwa kuumukila ku dibìikà dyà ku lufù. Mpindyewu tudi bamanyè ne Bible ùdi wàkula bwà maulu àsàtù. Tudi bacimanyè, dyulu dyà kumpàla, dyulu diibìdi, ne dyulu diisàtù. Ngèèla meeji ne ùvwà m'Pòlò wàkamwibwa too ne mu dyulu diisàtù awu ne kumònaye bintu bìvwàye kàyì mukùmbàne bwà kubyàkula to. Mpindyewu dyulu dyà kumpàla didi dibìikidiibwa, mu Mifundu, bu mùdi mavuba; mu ngaakwilù mukwàbò, kwìnshì eku, pa citampì cyà pa buloba. Mpindyewu pàdi Cyuyüya aci cìfùmina kuulu kwà mavuba aku cibwela mu Èkèleeziyà, aci's mmwaba wà mu Dyulu. Pashiishe maulu miibìdi àdi àbadiibwa bu ndongolwelu wa dîba ne mabùlungè. Ne maulu miisàtù àdi àsambuka dyàmwàmwà.

¹²³ Mpindyewu byenzèkì ànu ne twelà meeji, anji tàngilàayi aci bwà kasunsa kàmwè. Mpindyewu, Einstein wàkajaadika, ku maalu à mamanya ne, bu bintu bibìdi mwà kulwa cintu kùdi cikwàbò, bu mùdi tùshinyi tùbìdi tùtuutakeena mu njila, nènku bu twòtù tülwa ne lùbilu lukolè (mpindyewu tùvwà tukengela kwikalatu tùya lùbilu lukolè, bu lwà mùliyàlà wà kilòmèètà ku kapwishipwishì kàà kasunsa) kàdi tùvwà mwà kubwelakanangana kàmwè ne kakwàbò ne katùyì mwà kunyangakaja cintu to. Biteshì mbifwànyine kucyènza, kutùpicishila aka mu kakwàbò katùyì tùnyangakaja cintu nànsha cimwè.

¹²⁴ Mpindyewu, mpindyewu bu nwènù mwà kumòna, mvwa mwimàne kaaba aka ànu àbìdi àdi panshì aa ku Mukùnà wà Palomar, mu Californie, nènku mvwa munkaci mwà kumòna

mwaba awu tulòndù atu tùdì mwà kumòna ntàntà wa bidimu miliyò lukàmà ne makumi àbìdì byà lùbilu lwà bukênkè. Mpindyewu elàayi meeji, lùbilu lwà bukênkè lwà bidimu miliyò lukàmà ne makumi àbìdì, n'kilomèètà búngi kaayi yìdici cifwànyine kwikala bu twètù bakudimuna. Nwamònu anyi?

¹²⁵ Kàdi nànsha nàнку Dyulu didi ntàntà wa miliyàlà ne miliyàlà ne miliyàlà yà—yà lùbilu lwà bukênkè kupita apu, mu mùshindù wà kaciyi nànsha mwà kwediibwa meeji nànsha. Mmunyi mutùdiku bafwànyine kufikaKù? Ndwendu, neciikalè ànu bu meeji, àdi àya lùbilu lukolè, necitambè kwikala cyà lùbilu lukolè menemene. Bu wèwè mwà kwela meeji ku Dyulu, mùshindù awu ke wúdi mufwànyine kufikamù ne lùkàsà lwònsò. Yesù, paanyimà pàà Yèyè mumanè kubiishiibwa ku lufù, mulwè buludì mu bimanu, mupicile mu biibi, ne mwimàne, ne mudyè mushipa musàbisha, ne bwìci. Àlèluuyàh. Lubilu! Mwoyi wúdi ànu wùpàtuka mu mubidi ewu, tudi mu Bwikadi bwà Nzambi, dyàmwàmwà. Tudi bamanyè ne nànsha bibànda, nànsha bipwekè, ne bikwàbò byònsò, tudi mu ndongolwelu muswikila ku buloba ewu. Kàdi patùumùkà pànwàpa, mwanèètù, kaa, ekèlekèlè, ncikondo kaayipu's wè!

¹²⁶ Mvwa ngàakula dilòlò adi pa, Abraham ne Dimiinu dyèndè paanyimà pèndè, mùvwà Nzambi muleejile kùdi Abraham amu. Mùshindù mwinè wàkabingishàYe Abraham, nshapità wa 12 wa Genèsè. Ne ku . . . eci too ne kwìnshì eku, nshapità wa 16, mùshindù mene wàkashindikàYe cipungidi kupicila ku dijidiibwa. Ku nshapità wa 17, ùdi ùmulekela wàmwa dibèlè Dyèndè, ùpwita Nyumà Mwímpè. Nènku pashìishe Yèyè wàkashindika, anyi wàkamutèèka pa kaaba (ànu bu munwàkuumvwa mèmè nyiisha diyiisha dyà ne *Mutèlèjaayi*), kupàtula Abraham ne kushintulula dìnà dyèndè dyà Abram kudishiya Abraham, kumupèèsha citùpà cyà Dìnà Dyèndè, Elohim, h-a-m. Pashìishe tudi tujandula ne, paanyimà pàà cyòci aci, Yèyè wàkamwènekela Abraham.

¹²⁷ Mpindyewu kùdi Dimiinu dyèndè, tàngilàayi mùdiYe mwenzè Dimiinu mùshindù wùmfwèwùmfwè awu. Dimiinu dyà Abraham ndipicile mu dibingishiibwa, dijidiibwa, dibàtiiza dyà Nyumà Mwímpè; dimwèneshiibwa dyà Dìnà Dyèndè, dibuulula dyà ne Yèyè ùdi Nganyi (dibuulula dyà ne Nganyi? Yesù Kìlistò), dibàtiiza mu Dìnà Dyèndè, ne bikwàbò byà mùshindù awu, dibuulula adi, wàbanyangana Dìnà Dyèndè ne Èkèleeziyà Wendè, mubàbìkile bwà kupàtukabò. Pashìishe cyàkenzàYe ncinyi? Mu Èkèleeziyà umweumwe uvwaYè mubiikile ku Dìnà Dyèndè awu, Dìnà dyà Yesù, cyàkenzàYe ncinyi? Wàkamwèneka mu mmwènekèlu umweumwe wakamwènekaYè kùdi Abraham awu, mwikàle mukumbàne bwà kujingulula nyumà uvwa paanyimà Pèndè awu. Nwamònu anyi? Wàkamwèneka mu Dìnà dimwèdimwè adi, mu cintu cìmwècìmwè aci, mu mmwènekèlu umweumwe awu! Tukàadi ànu ku ndekeelu kwà njila.

128 Mpindyewu mōnaayi cyàkenzekà. PàakenzàYe cyōci aci, ki cìvwa cimanyinu cyà ndekeelu cyàkapèeshàYe Èkèleeziyà kumpàla kwà dishintuluka kulwadi mu Èkèleeziyà, kùdi Abraham ne Sarah. Mpindyewu pàakambà Mwanjèlò bwalu busokoka abu, mukàji (Èkèleeziyà, uvwa uleejiibwa awu), kàvwa mwà kuciitabuujà to nànsha kakesè, wàkasekela ànu mundamunda. Nwamònu's, ùkaavwa ne bidimu lukàmà, kàkùcivwa mùshindù wà yèyè ne Abraham kwikalabò bu mulùme ne mukàji nànsha. Nudi buumvwe cìndi muswè kwamba aci anyi, malanda à mu dikù, pàmwàpa bidimu makumi àbìdi kumpàla; èè, bòbò bàvwa bafwè mùshindù awu. Sarah; Abraham bafwè ànu bèètù bàà menemene aba, difù dyà Sarah difwè dyònsò nkòong. Kàdi cyàkenzeka ncinyi? Cyàkenzekà ncinyi? Mukàji kwambayè ne: "Mmunyi mùndiku mwà, mununu bu mùnkaadi emu, ne mukalenga wanyi, katwèna ne... mùshindù awu ùkaadi mwimàne, tukàdi biimànyike kwenza kwà mùshindù awu kùkaadi bidimu byàbùngi, byàbùngi menemene. Kabyèna mwà kwenzekakù bwèndè yèyè to. Kabyèna mwà kwenzekakù to bwànyi mémè. Mmunyi mùndi mwà kucyènzà?" Ki yèyè kusekela mundamunda.

129 Ki Mwanjèlò awu kwambayè ne: "Bwà cinyi wàseki? Bwà cinyi wàdyelèdi meeji munda mwà mwoyi wèndè? Bwà cinyi wàm̀bì nùnkù?" Mpindyewu tàngilàayi, aci cìvwa ncimanyinu cyà ndekeelu kumpàlà kwà cintu kampànda kwenzekelaci Sarah ne Abraham.

130 Mpindyewu mvwa muyiishe kaaba aka musangu kampànda, ne munwàm̀bile ne Nzambì wàkabààluja nsongàalùmè ne nsongàakàji. Bwà kucijaadika, kuyayè kuntwaku, bàakenza kaalwendu kakesè ne kupwekabò ku—ku Guerar, ki Abimèlèkà, mfùmù wa beena Peleshèètè awu, kunangayè Sarah, ne kujingayè bwà kumusèla. Bwalu, ùvwa mupingàne ku bunsongàakàji, mulenga kumòna. Kàdi mōnaayi ne, bìvwa bikèngela bwà Yèyè kwenza cintu kampànda, bìvwa bikèngela bwà Yèyè kumushintulula. Yèyè kàakamwaluja ànu ku bunsongàalùmè ne bunsongàakàji to, yèyè ne mukàji, Yèyè kàakacyènzà to; bwalu, bu bòbò biikàle ànu nànkù, cintu cimwècimwè aci's cìvwa cifwànyine kwikalakù. Nwamònu's, bàvwa bafwànyine kulwa buludi... bwalu wàkamusèla pàcivwàye ne bidimu bitwè ku dikumi ne bisambòmbò, kàdi yèyè ùvwa ànu nsongàalùmè wetù ewu, nènku bàakashààla ne mwoyi matùkù àbò ònsò kabàyi ne bânà nànsha. Bu Yèyè ànu mwà kubààluja paanyimà, èè, nùnkù's mbènze ànu cintu cimwècimwè aci cyàkàbìdi. Kàdi byàkakèngela bwà Yèyè kwenza cintu kampànda cyà cishiilàngàne, byàkakèngela bwà kubàshintululayè bwà bààmòna mwà kupeta mwànà mulaya ewu, mwànà mulaya uvwabò ne cyà kwakidila awu. Kàdi byàkakèngela bwà Yèyè kushintulula ndongolwelu wabò mujimà awu, ne kubàkùdimuna bansongà ne kubàshintulula,

bwà kupetabò mwànà wa balùme.

¹³¹ Cintu cimwècimwè aci ke cyènzàYe musangu wàlonda! Paanyimà pàà cyòci aci, nènku vùlukaàyi ne, paanyimà pàà cimanyinu aci cimanè kumwèneshiibwa mu kaabujimà kùdi Abraham ne kasumbù kèndè, pashiishe cintu cìvwà cìlondà cìvwa ndishintuluka adi. Nwamònu anyi? Mpindyewu tukàadi bamòne bintu byònsò ku dibingishiibwa, dijidiibwa, dibàtiiza dyà Nyumà Mwímpè, ditèèkiibwa dyà mwànà, ne bimanyinu ne maalu à kukema byà kùdiYe, mwikàle mu Bwikadi Bwèndè bwà kujingulula meeji à mu mwoyi, ne bikwàbò, bu mwàkambàYe ne: “Ànu mwàkadibi mu matùkù à Sodomà, ki mwikàlabi kàbìdi ku dilwa dyà Mwànà wa muntu.” Tudi tumòna cyòci aci cyènzeka mpindyewu mene! Cintu cìvwà cìlondà cìvwa ncinyi? Dishintuluka dyà mubidi adi. Mpindyewu, cileeja ne citùdi bindile aci, Mwànà mutèkemena awu. Butùmbi’s wè! Ncyà bushùwà anyi? Katwèna mwà kutwilangana Nèndè mu mibidi eyi to. Twètù bashintùlùke baalùkile ku bunsongàalùmè ne nsongàakàji, katwèna ànu mwà kutuutakeena Nèndè to, bwalu bìdi bikèngela bwà twètù kutuutakeena Nèndè mu mpeepèlè. Kùdi ne cyà kwenjiibwa cintu kampànda pa kuumusha dishintuluka dyètù bwà kwalukila ku bunsogàalùmè ne bunsongàakàji, bikèngela tùshintulukè ne twàngaciibwe muulu mu lupeepèlè bwà kutuutakeena Nèndè. Nènku cintu cìdi cìlonda pashiishe n’Dyambwibwa dyà Èkèleeziyà, ne dishintuluka dyà mibidi yà bansantu bàdi balààle tulù, bwà kutwilangana ne Mukalenge Yesù mu mpeepèlè.

¹³² Kaa, civùlukilu cyà Paasàkà, aba bàdi batwìbwe citampì kùdi Nyumà Mwímpè abu’s! Mpindyewu ku ciibi cyà Edènà, muntu mukàngila pambèlu kule ne Nzambi, ku Mpenta yèyè ùvwa mutwà Cìtampì mukàngila munda mwà Nzambi Cyendèlèlè. Ùdi ùbwela munda anyi kàyi mwà kupàtuka kàbìdi, ùdi Muntwamu bwà kashidi! Tàngilàayi! Nyumà umwe: “Tudi babàtìjìibwe mu Mubidi wùmwpèlè, ku Nyumà Mwímpè.” Ncyà bushùwà anyi? Dìbà adi tudi batwìbwe citampì too ne ku dìbà kaayi? Too ne ku ditùkù dyà bupikudi bwènù! Kacyenà ùpàtuka bwà kulonda maalu à pa buloba kàbìdi to. “Bwalu wèwè udi mufwè, ne mwoyi wèbè mmusokoka mu Nzambi kupicila ku Kilistò, mutwà citampì kùdi Nyumà Mwímpè.” Kaa, Mufùndù bulenga kaayipu’s wè, mutwà citampì mu Kilistò kùdi Nyumà Mwímpè!

¹³³ Pashiishe pàakabiikà Yesù ku bafwè, muntu wàkenzejiibwa ku bukolè bwà kwangata dipàngadika dyèndè ne: “Yèyè wàkabiika ku lufù, anyi Yèyè kàakabiika ku lufù anyi?” Kàdi bàakenza cinyi? Bàakenza cintu cimwècimwè cyàkenzàbo ku cìlumbù bwà kumusekabò aci, cidìidi ne èkèleeziyà kaaba kàmwe; bwalu cidìidi ne batèndeledi mbadisange pàmwe ànu bu mwàkenzàbo musangu awu amu.

¹³⁴ Ànu mùshindù wùmwèwùmwè wènzàbo mu matùkù

àcilwalwà awu, ne mùdibo munkaci mwà kucyènza mpindyewu mene, cididi ne ntèdeleelu! Aakàbà ùvwa muntu mwìmpè be, kàdi Izàbèlè, yèyè mulùme ùvwa mumusèle. Ncyèna ngàmba ne Mfùmù wa ditùnga Kennedy kí mmuntu mwìmpè to, kàdi mmusèle ndongolwelu wa Izàbèlè awu. Kí ng'Aakàbà wàkacyènza to, ùvwa ny'Izàbèlè paanyimà pàà nkwasà wa butùmbi, wàkadi ucikòntonona awu. Ndongolwelu wa Izàbèlè awu kí wíkala mwà kwenza dinyangakaja dyà maalu kaaba aka. Yèyè ngudi ne cyà kwenza, bwalu mmumusèle. Bikèngela àcyàngatè, bikèngela àcyènzè, yèyè mmumusèle. Kaa, ekèlekèle! Nwènù bantu, kanwènaayikù mwà kumòna cidì Mifùndu munkaci mwà kwenza anyi? Kanwènaayikù mwà kumòna mwaba wutùdi biimànyine kaaba aka mu matùkù à ndekeelu emu anyi?

¹³⁵ Mpindyewu mònaayi muntu paanyimà pàà dibìikà dyà ku lufù. Nudi numòna cilumbulwidi cyà dimuseka aci, cyàkàkùdimukila èkèleeziyà, mumanyè cívwa èkèleeziyà mufwànyine kwenza. Nèku cyàkenzèkà ncinyi dìbà dìvwa bàsàlaayi bakwàcike bwòwà ne bènda bànyemakana adi? Èkèleeziyà wàkafuta bàsàlaayi abu, ne bàkapèèbwa mfrangà, bwà kuya kamba ne “Bayiidi Bèndè mbalwè ciibufùku ne kuMwambulabò kuya Nèndè.”

¹³⁶ Dìbà adi ndi muswè kunùkonka. Bu bayiidi bóbò balwè ciibufùku ne baMwangàte bayè Nèndè, bwà cinyi kabààkangata mùzàbì wùvwa pambidi Pèndè awu? Pìikalàbi ne bàvwa bìvi, ne munkaci mwà kwiba, bwà cinyi kabààkangata mùzàbì awu, kàbìdi? Kàdi cilàmbà cyà lin aci cívwa cishààla ànu mwaba awu, ne cilàmbà cyà pa mèèsà ciMubwikila mumpàlà, cilàmbà cyà lin cishààle mwaba ùvwàci ciMubwikila pambidi awu. Yèyè wàkapicila mu byònsò abi, e kubànda mu dibìikà dyà ku lufù. Kàkùvwa cintu cisalakaja to; ànu mùshindù ùvwaYe mulààle awu, Ùvwa mulààle mùshindù wùmweùmwe awu, kàdi Ùvwa mupàtùke mu bilàmbà byà lin abi. Amen.

¹³⁷ Nwamònu's, kàdi cilumbulwidi cyà dimuseka kàbìdi, di—di—difùndà dyà cilumbù dyà mafi. Bwà cinyi? Bàvwa benzejùbwe ku bukolè, bàvwa benzèjùbwe ku bukolè bwà kwangata dipàngadika. Bívwa bikèngela bwà muntu kwangatayè dipàngadika. Bívwa bikèngela bwà Èkèleeziyà àmbè ne: “Yèyè mmubiike ku bafwè,” anyi ne, “Yèyè kí mmubiike ku bafwè to.” Amen.

¹³⁸ Kaa, tùtekààyipù meeji ètù mpindyewu, lwàtaayi cyumvwilu cyènù cyà nyumà mpindyewu. Mònaayi ne, mbifike ku cintu cimwècimwè aci. Bantu bàdi bàteeta kulonda, bu mùdì masangisha ètù, ne bàmba...Nkààdikù muumvwè nànsha maèkèleeziyà, Église de Christ, wa ku dìnà awu, bàmba ne: “Nèmfilè ndola cinunu bwà muntu kanà yònsò udi mwà kuleeja cileeji cimwèpelè cyà dibìshiihwa dyà ku luf-... anyi muntu kampànda ukààdikù mwondòpiibwe.” Nkààdi

muyààyàye ne bangàngàbukà kùdìbo, kàdi bôbò kabàyi nànsha mwà kwitabuuja to. Bwà cinyi? Mbenzèjìbwe ku bukolè bwà kwangatabò dipàngadika. Mbadikàngìle pambèlu, ne Kaayinà, ne tusumbù twà ntèndeleeleu. Èkèleeziyà mukesè mulelèlè wa Nzambì awu ùtu wa banyààbanyà, kàdi ùvwa misangu yònsò ànu ùtentemuka mùshindù awu, kàdi nekìikalè. . . Mmuniyì mwàkakèngà Ye mu bidimu cinunu ne nkàmà yitaanu mijimà byà cikondo cyà mîdimà abi?

¹³⁹ Bàdi bàmba ne: “Èkèleeziyà wa beena Loomò!” Cyà bushùwà, èkèleeziyà wa beena Loomò ùvwa dyàmbedi èkèleeziyà wa mpenta, ke civwà èkèleeziyà wa Kàtòlikè awu. Wàkabanga ku Mpenta, kàdi pashìishe wàkaswà kudìvwija bulongolodi.

¹⁴⁰ Nènku bu èkèleeziyà wa beena Mpenta ewu mwà kushàalakù mwimane munda mwà bidimu bikwàbò binunu bibìdì, nebìikalè mwà kutàmba kubìipa kupìta mùdì wa Kàtòlikè mpindyewu emu. Bàdi bàtàmba kuya kule menemene ne cintu cyònsò! Bàvwa bangeelà nkonko ditùkù adi ne: “Neùyiishe pawikalà mulwe mwab’ewu, pa bìdì bitàngila bakàjì bàdì bàdìlaaba bilaabu byà kwìsù, ne kabìvwa bikèngela kwikalabò bàvwàla tùpùtulu to, kabìvwa bikèngela kwikalabò bàvwàla bintu ebi anyi?”

Mémè ne: “Kùndombikù dîbà adi to. To, mukalenge. Kùndombi bwà mémè kulwa to.”

“Neùcìyiishè anyi?” Bàvwa bàmbè mene ne: “Ciinè aci mbwalu bwèbè anyi?”

Mémè ne: “Abu’s mbwalu bwà Mukalenge, ne mémè ndi ku mudimu Wèndè.” Ncyà bushùwà menemene. Menemene! Pa nàнку mémè kwamba ànu. . .

“Cyùdì ucyènzela ncinyi ne dînà? Kakwènakù bintu bikwàbò byà kwamba anyi?”

Mémè ne: “Èyo, kàdi bàlekèlaayi bènzè nàнку, nènku pashìishe netwàkulè pa bintu bikwàbò, nudi numòna’s. Nwamònu anyi? Nwamònu’s, tù—tù—tùtekaàyi cishimikidi.”

¹⁴¹ Ki bwalu mbwòbù abu. Wèwè udi uteeta kutupika kuya kumutu kwa cibàndilu, pààbì’s bìvwa bikèngela wèwè kwanji kubangila kwinshì aku. Nwamònu anyi? Kwanji kubangila lwà kwinshì *eku*, kudikezula ne kutwàdija bimpè, nènku dîbà adi tuvwa bafwànyine kwibakilapù. Byòbì kabìyi nàнку to, kwèna mwà kwibaka to, bwalu cishimikidi kanà cyònsò cidi kacìyi ciibakila pa mèyi makùlù à Kilistò to ncyùpukè. Ne Bible, mMwambe ne: “Ncinyangu bwà muntu mukàjì kuvwàlayè civwàlù cidi cyakànyine muntu mulùme.” Kì ncishintùlùke nànsha katòba kàmwè to ànu mùdì Nzambì kàyi mushintùlùke nànsha. Yèyè ngwa Cyèndèlèlè, ne meeji Èndè makèèlèlè awu àdi àmwèàmwè ne mùdìwu leelù ewu emu, ne neyìikalè nàнку kashidi. Nyumà Wèndè ùdi umweumwe awu makèèlèlè, leelù, too ne kashidi. Byenzi Byèndè bìdì bìmwèbìmwè abi makèèlèlè, leelù, too ne kashidi. Bupikudi Bwèndè bùdi

bùmwebùmwe abu makèèlèlè, leelù, too ne kashidi. Ne Yèyè ùdi umweumwe awu makèèlèlè, leelù, too ne kashidi. Kakwèna mùshindù wà kucicinguluka to. Mpindyewu cishindikiki cyà bulenga bwà musàbù mpaùdi uwùdyà. Tudi bamanyè nàнку. Kí mmwòmò anyi? Nzambi mmwambè ne mmùvwàbi.

¹⁴² Muntu ùvwa mwenzèjìibwe ku bukolè bwà kwangatayè dipàngadika. Cìvwàbò benzèjìibwe ku bukolè dyàmbedi mu matùkù à Kìlistò ncinyi? Cìvwàbò benzèjìibwe ku bukolè bwà kwenzabò ncinyi? Bàvwa benzèjìibwe ku bukolè, dyàmbedi, bwà kuMwitaba. Wàkabàleeja cimanyinu Cyèndè, Citampì Cyèndè, Yèyè ùvwa Maasiyà awu! Yèyè wàkacìleeja munyi? Ànu menemene ku cìvwà Bible mwàmbe ne Neènzè aci. Yèyè ùvwa Mupròfetà, ne Wàkajingulula meeji mu mutù wàbò. Kì kwambabò ne: “Yèyè ndémon, Beelèzèbulà.” Bàvwa benzèjìibwe ku bukolè bwà kwangatabò dipàngadika. Kabàvwa mwà kudipangisha kàbìdì to.

¹⁴³ Ne nànsha èkèleeziyà wa beena Mpenta, anyi wa ba-Baptistes, anyi wa ba-Presbytériens kabèèna mwà kucikànda to! Nyumà Mwìmpè ùdi ne. . . Kìlistò ùdi mubiike ku lufù, ne Yèyè ùdi mu Èkèleeziyà. Kàdi bòbò bàdi bàmba ne: “Muntu ewu ùdi ùbàtiiza mu Dìnà dyà Yesù. Ùdi witabuuja ne kabyèna bìkèngela bwà wèwè kwakula mu myakulu bwà Nyumà Mwìmpè to, ne bintu byà mùshindù awu, aci kì ncìleeji cyà mbangilu to. Yèyè udi witabuuja bakàjì, bakàjì bèètù bònso baleepèshe nsuki yàbò mùshindù awu. Ndi ngèela meeji ne kacyèna ne bwalu ne ciine aci to.” Kàdi Nzambi ùdi munkaci mwà kushindikika ne Eci m’Bulelèlè bwà cinyi? Jandulaayi mwaba ùdici.

Bàakabènga buMaasiyà Bwèndè pàakabàleejàYe ne Yèyè nguvwa Maasiyà awu. Bàvwa benzèjìibwe ku bukolè bwà kwamba cintu kampànda.

¹⁴⁴ Ne ànu nàнку ke mùdìbo leelù ewu, bàBùdyombola, ne kabàyi baswè kuBùtwa mpànda to, bàBùùmusha pa byanza byàbò. Mbabenzeje bwà kwangatabò dipàngadika ku bukolè. Kakwèna pà kufinukila to! Tukaàdi ku cìkondo cyà nshìikidilu. Muntu mmwenzèjìibwe ku bukolè bwà kuCyàkidila anyi kuCibènga. Bìkèngela ùCìtàbè anyi ùCìdyombòlè. Mbenzeja Àmèrikè ku bukolè. Mbenzeja Branham Tabernacle ku bukolè. Bàdi bàcyènzeja beena Mpenta ku bukolè, bàcyènzeja ba-Méthodistes. Bàdi bàcyènzejàngana ku bukolè myaba yònso. Bìkèngela ùCyàngatè anyi ùCìlekèlè. Nzambi mmushindikiki Diyì Dyèndè, uleeja bimanyinu Byèndè, bishindikika mudimu Wèndè wà bwambi, bìleeja ànu menemene cìdìYe, pa kujaadika ne Yèyè ùdi Nzambi. Yesù wàkamba ne: “Mémè ncìyi ngèza byenzedi byà Taatù Wanyì to, dìbà adi kanùNgiitàbùùji to.” Ncyà bushùwà. “Kàdi Mémè ngèza byenzedi byà Taatù, dìbà adi nwènù nwitabuuje byenzedi.” Kì bwalu mbwòbù abu’s. Nwamònu’s, kabèèna mwà kucyènza to, kabèèna—kabèèna—kabèèna mwà kupeta cintu nànsha cimwè mu Cyòci aci to, bwalu

Acì ncilelèlè. Kàdi mbwà cinyì bùdìbo kabàyi baCyàkidila? Mbwà dingumba. Kabèèna mwà kuCyàkidila to, pa nànkù bàdi benzèjìibwe ku bukolè mpindyewu bwà kwenza diteetangana dyà makàndà.

¹⁴⁵ Nènku mu Ohio kùkaadi matùkù makesè, èkèleziyà yimwèyimwè yivwa yintùdila mfranga kùkaadi cidimu cijimà; bwalu mèmè ngàakacibùndula, ne ndeeja ne civwa cyà mafi, kakuvwaku nànsha umwe wa kùdìbo to, ànu èkèleziyà umwèpelè, Mwanèètù Sullivan, ke uvwa mufwànyìnekù kukwàcishangana naanyi mu mudimu. Mémè ne: “Ncidi ànu ne cianza cìmwècimwè aci, ncidi ànu ne makàsà àmwèamwè awu, Ncidi ànu ne Mukenji ùmwèùmwe awu, ncidi ànu Mwanèètù Branham. Mbwalu kaayi ebu kùndìs?” Kí mmèmè to. Nyumà Mwímpè ùcidi ànu wàkula, Nyumà Mwímpè ùcidi ànu wènza byenzedi bimwèbimwè abi, Yèyè ùcidi ànu ùbìleeja. Kàdi udi mwenzèjìibwe ku bukolè! Ncyà bushùwà, bóbò mbenzèjìibwe ku bukolè. Ne Nyumà Mwímpè munène awu ùmata munkacì mwàbò mene, ne wàkula Mèyi ne wàmba bintu byàkambàYe musangu awu abi. Pashiishe bàcidi ànu . . .

¹⁴⁶ Tàngilàayi mu Californie emu ditùkù adi. Ngèèla meeji ne ndi mwà kucipeta kaaba aka; s’ki cyòci eci. Mvwa ku Cafétèria kàà Clifton, mu didyà dyà mu dindà. Nènku mwaba awu mwanèètù wa ba-Baptistes . . . paanyimà pàà mèmè mumanè kusùnsulula èkèleziyà ayi ànu tupesetupese, mbàmbila mùvwàbo bènza maalù mabi, ne bintu bìvwàbo bènza, bàbènga Nzambì. Mwanèètù wa ba-Baptistes ewu kulwayè mwaba ewu bwà kungeelayè mabòko kunshìngù, bwà kusambila. Nènku, mmwenze ànu wènza nànkù, kubangayè kwakula bu mu myakulu. Pàvwàye . . . Mpindyewu, yèyè ùvwa Baptiste, kàvwakù mumanye kantu nànsha kàmwè pa bwalu abu to. Pààkajikijàye, kwambayè . . .

¹⁴⁷ Ki muntu mukàjì mukwàbò mwimàne lwà paanyimà pààpa, wa mu Louisiane, wa ci-Français, kwambàye ne: “Acì kacivwa mwakulu mwenyi to, civwa ànu Français.” Kàdi ki mukàjì mukwàbò wa ku Suisse, mu Lausanne ewu musòmbe, ùdi wàkula Français, mvwa kuntwaku, mukàjì awu kwambayè ne mmucikùdìmùne mu cyòci. Ki nsongàalùmè ùlwàlwa ewu ùmùkila kuntwaku, kacya ncitu mwànji kumumòna to, muntu nànsha umwe kàvwakù mwànji kumumòna to, ùvwa mwandamunyi wa Français bwà ONU, kwambayè ne: “Pyòpyopyò, mmwòmò,” mwàkambàye.

¹⁴⁸ Nènku muntu ewu ùdi wàmba ne, nènku nudi bamanye muntu ewu, nenteelè dìnà dyèndè mu katancì emu. Dìnà dyèndè ùvwa Henry. Nèmpetè dìnà dyèndè dyà bunungu mu katancì kakesè emu, ngèèla meeji ne ndifùnda kaaba aka. Ncyèna mumanye to. Dìdì mu Dìyi dyà Beena Kantu-ku-byanza, byòbì kabìyi nànkù to. Kàdi yèyè . . . Kaa, èyowà’s: “Ngàmba ne n’Danny Henry.” Mpindyewu aci cidi . . . Ncyèna mwà kuvùluka

mwenji wa bikàsà mu sèndemâ awu to. [Mwanèètù wa balùme kampàndà ùdi wàmba ne: “Marilyn Monroe?”—Muf.] To, kí m’Marilyn to. Meda, nganyì...? Jane Russell, mwànà wa tatwèndè mukwàbò wa Jane Russell. Ki kulwayè kungela mabòko ku nshìngù, bwà kuntwà makùmbù, ne ki mèyì àkambàye ngwòwò aa. Yèyè ne: “Diyiisha adi’s ndifwànyine kutèèkiibwa mu Mukàndà wà Bwàkabuulwibwà.” Yèyè ne: “Ncyà bushùwà.” Yèyè ne: “Ndi muswè nkusambìdìlè, Mwanèètù Branham.” Kungeelayè mabòko ku nshìngù, kubangayè kwakula mu Français, pèndè kàyì muyìmanyè nànsha mikesè to.

¹⁴⁹ Kàdi ki dyandamuna ndyòdì edì, ùdi naadì difùnda ànu mùvwà mukàndà mulwè, mu mbùngakeenu, ne bikwàbò. Mbambe ne: “Mémè, Victor D-e-D-o-w-x,” dìnà dyà mu Français, “ndi mwena France,” ne bikwàbò, “ne mvwa mwaba awu dībà òvwà—dībà òvwà Danny” *ni-mbishi-apa*, “Danny Henry, mmufile eci bu mukenji kùdì Mwanèètù Branham, mu matùkù dikumi ne òmwè à ngondo wa lwìshì, cidimu cyà 1961.” Mmusòmbèle mu 809 Njila wà North Kings, mu Los Angeles 64. Tèelejàayi di—tèelejàayi dibala:

Bwalu udi musungùle kajila kabùmbàkàne . . .

Mpindyewu, nudi numòna’s, ndi muumvwe aci bìmpè. Kùdi citùpà cyà ku cyòci cìndì ncìyì muumvwè to.

Bwalu udi musungùle kajila kabùmbàkàne, njila mutàmbe bukolè, udi mwendèlemù ku disungula dyèbè sungasunga . . .

¹⁵⁰ Ndi mwà kuumvwa aci bìmpè, nwamònu’s. Nwamònu’s, wèwè udi mudisungwìleyì. Mòsà wàkenza disungula dyèndè yèyè mwìnè, kabìvwa bikèngela bwà kudyènzayè to. Anyì kabìvwa bikèngela bwà mémè kulonda kajila aka to. Mvwa mwà kwikala ne nzùbu minène kuntu kwàka bu mùdì bàmwè bàà ku bòbò naayi amu. Mvwa mwà kwikala byònsò bìpìcila ku ntèlèvizìyò. Kàdi nganyì uvwa mufwànyine kuntùdìla mfrangà bwà—bwà dipandulula dyà cishìmikidi ciinè? Kàdi cintu cimwèpelè, kabyèna bikèngela bwà mémè kutwìla muntu nànsha umwe binù to ànu Mukalenge Yesù Kilistò. Ncyà bushùwà. Èyowà. Mémè ndi nyiisha cidì Bible wàmba. Kabyèna bikèngela mémè kudyà cibanga pàmwè ne malongolodi àbò awu to, bwalu ncitu wa ku òwò awu to. Mémè ngakenza disungula. Ànu mwàkambàYe kuntu kwàka ne: “Ànu mùmvwà ne Mòsà amu, ki muNgìikalà kàbidì neebè.” Ne Yèyè wàkapèsha Mòsà bimanyinu bibidì byà dishìndika, bwà kujaadika. Ne Mòsà wàkenza disungula dyèndè sungasunga. Nwamònu’s, Mòsà wàkenza disungula dyèndè sungasunga. Pa nàнку mbipeepèle bwà kuumvwa aci, nwamònu’s: “Wèwè udi musungùle . . .”

Bwalu udi musungùle kajila kabùmbàkàne, njila mutàmbe bukolè, udi mwendèlemu ku disungula dyèbè sungasunga . . .

Mpindyewu apa, mpindyewu muntu ewu, mpindyewu tàngiláayi mùdici cifunda, nudi mwà kumòna ne ncifundiibwe mu—mu mēyì à ku baabèndè.

...wèwè udi mwangate dipàngadika ànu dyôdi menemene ne dijaalàme, ne dyôdi ki NJILA WANYÌ.

Nzambì àbèneshiibwè's wè! “Ki NJILA WANYÌ,” mwàkambàYe.

Bwà dipàngadika edi dyà mushinga mukolè, citùpà cinènaanènàlè cyà Dyulu ncikwindile.

Kacya kavwaku mwànji kuumvwa pa bìdi bitàngila cikèèna-kumòna aci to, nwamònu's, cyà dyôdi edi, nudi bavùlùke cikèèna-kumòna aci.

...citupa cinènaanènàlè cyà Dyulu ncikwindile. Dipàngadika kaayi dyà butumbi dyùdi mwangate's wè! (Nwamònu anyi?)

Eci, mu cyôci ciinè . . .

Mpindyewu eci, kuumukila apa, ki cindi ncìyi ngùumvwa to.

Eci, mu cyôci ciinè, ncyôci aci (Tubòku tunène tucijìngila.) ncyàfilà, ne kwenzejaci, bucìmunyi bunène mu Dinanga dyà Nzambì.

¹⁵¹ Ncyènà mumanyè cìdìci cyùmvwija to ne: “eci necyènzejè.” Pàmwápa mu kaa ntentà kakesè aka òmwè dyà ku matùkù àdi panshì aa, musòmbè paanyimà pààpa, Yèyè neàcimanyishè.

¹⁵² Bwà cinyì? Kì ne mbwalu twètù tuvwa ne cyà kucyènza to. Kì ne mbwà ne—ne cidi—ne—cidi ànu njila mupeepèle to. Udi mwà kwikala mumanyìke, udi mufwànyine kwikala ne bantu bònsò bakutuuta cyanza paanyimà, mfrangà yìtuuta nkòkà mu myaba yònsò bwà tudyòmbà anyi ntèlèviziyò, ne bikwàbò. Bàvwa bàmba ne nebàcyàngàtè ne kucileeya ku ntèlèviziyò. Ncìtu ngiitabuuja bwà kwangata bintu byà Nzambì kubipàtula pambèlu ku bintàkanyì byà busenji byà pa buloba mùshindù awu nànsha. Mémè ncyènà ngiitabuuja ditùpikatupika dyònsò edi ne kwenza cintu kampànda cìdi kaciyìku to. Ndi ngiitabuuja dicilekela cyanààna, kwindila. Nzambì, Yèyè ùdi Nzambì, Yèyè ènzè naaci cìdiYe muswè kwenza aci. Twètù tudi basadidi, tudi ànu tusadila Mukalenge, twenzà ànu mùdi Nzambì mwàmbè amu. Muntu, munkaci mwà biine byònsò abi, nànsha nànkù, mmwenzèjìibwe bwà kwangata dipàngadika.

¹⁵³ Bàvwa benzèjìibwe ku bukolè bwà kwangata dipàngadika pàvwà Kilistò pànu pa buloba, bwalu Yèyè wàkabàjaadikila ne Yèyè nguvwa Maasiyà awu. Ncyà bushùwà anyi? Ne bàvwa benzèjìibwe ku bukolè, ne bààkaMubiikila ne cinyì? “Beelèzèbùlà, mwena lubùkù.” Dìbà adi Dyèndè...ku cimanyinu Cyèndè, Cìtampì, ku Paasàkà, Nzambì wàkacìjaadika ne, Yèyè wàkaMubiisha ku bafwè. Paanyimà pàà bintu bikwàbò byònsò ebi, Yèyè wàkaMubiisha ku bafwè!

154 Mpindyewu êkèleeziyà udi wamba mùdiye ne Nyumà Mwimpè awu, cijaadiki cyàci cyà Nzambi, cyà ne udi muumùke ku lufù muyè ku Mwoyi, bwalu bintu byà kale bikaadi bipite, ne bintu bikaadi bilwè bipyabìpyà kùdi. Ki cileeki cyà Nzambi cyà dibìikà dyà ku lufù ncyôci aci. Kwèna múvwà kale wàwa to, udi mushintùlùke! Mwaba wúvwà ne ciibidilu cyà kwela Dîyi dyà Nzambi mpatà awu; Dîyi dyônsò ditù Dîyi dyà Nzambi dyakula, wèwè udi wamba ne: “Amen!” Nwamònu’s, kùdi cintu kampànda cidì cikwenzèkèle. Ki mùshindù wà kumpàla wà dibìishiibwa dyà ku lufù ngwôwò awu, Nyumà udi munda awu.

155 Mpindyewu Mpenta. Paanyimà pàà Mpenta, pàakapetà bantu aba Nyumà Mwimpè, muntu wàkenzejiibwa ku bukòlè bwà kwangata dipàngadika ne: “Aci ncyà kùdi Nzambi anyi kî n’Cyà kùdi Nzambi?” Kàdi cyàkambabò ncinyi? “Mbaabuludyanganyi. Aci’s ndipaala. Bàdi mu didyèlela dyà byejeeji.” Nànsha Agrippa mwinè wàkambila Pòlò ne: “Udi mupàle.” *Mupàle* mbwena kwamba ne “mubùlùke.”

156 Kàdi cyàkambà Pòlò ncinyi? “Mu Njila udibò bàbìikila ne ndipàmbuka awu, ki mùshindù wùndi nkuukwila Nzambi.” Yèyè nguvwa ne Cítampì cyà Paasàkà! Yèyè úvwakù pàvwa cintu kampànda cyenzèke apu. Ndi ne disànkà dyà kutwilangana nendè mu dindà emu, mu mwoyi, ne kwamba ne: “Pòlò!” Bwà cinyi? Bìvwa bìkèngela bwà twètù kuyiisha Dîyi dimwèdimwè adi. Pòlò wàkabàtùmina dîyi bwà kubàtìijiibwabò cyàkàbìdi, mu Dìna dyà Yesù, paanyimà pàà bamanè kubàtìijiibwa mu ngaakwilù mukwàbò. Yèyè kwamba ne: “Mwanjèlò wa mu Dyulu yèyè mwàmbè cintu cikwàbò nànsha cìmwè, èdiibwè mulawu.” Yèyè wàkayiiisha Dyondopa dyà kùdi Nzambi. Wàkayiiisha bukòlè bwà dibìikà dyà ku lufù. Wàkayiiisha Yesù Kìlistò, umweumwe awu makèèlèlè, leelù, too ne kashidi. Bìkèènà-kumòna, ne makòlè ne dimwèneshiibwa dyà Nyumà byàkamulonda.

157 Nebikèngele wikalè ne Mukenji ùmwèùmwe awu, cintu cìmwècìmwè aci. Kî ntèlòlòjî to, kî mbyenzedi byà êkèleeziyà kampànda to; kàdi Bukòlè bwà Nzambi, Mpenta, ne Cítampì cìmwècìmwè aci. Cítampì cyà Nyumà Mwimpè, Cítampì cilelèlè cyà Paasàkà wa Nzambi ki bijaadiki byà muntu. Cyà bushùwà! Ki bwèbè bukenji bwà bwanàabutè. Ncishindiki cyà ne udi muumùke ku lufù muyè ku Mwoyi, ne Nzambi ùdi úkwàcila mudimu kùdi mùshindù wùmweùmwe wàkawàcilaYè mu Mukalenge Yesù awu, bwalu kî mukàndà wèbè wà dijaadikiibwa. “Bimanyinu ebi nebìfilè bàdi bìitabuujà. Ndáyi pa buloba bujimà,” paanyimà pàà Paasàkà, paanyimà pàà Mpenta, paanyimà pàà Cítampì cyà Paasàkà cimanè kufidiibwa, cyà dibìikà dyà ku lufù. Cìvwa ncinyi? Mwoyi wúvwà munda mwà Kìlistò wàkabiishiibwa awu, mmulwè ne mufuùlùlùle Êkèleeziyà Wendè, ne mwikàle ne mwoyi mu Êkèleeziyà bwà kwenza bimanyinu bimwèbimwè abi.

158 Ndi ntèkemena ne kacyèna cinùpicila pa mitù yènu apu to. Ndi ntèkemena ne ncyèna nnùlama ntàntà mupite bule byà nwènu—kanùciyi—kanùciyi mwa kupeta disànka dyà cìndi muswè kwamba aci to, nwamònu's. Ndi mumanyè ne mbikolè, nwènu bàdì biimàne kuulu aba. Bu nwènu mwà kuswà, ànu—ànu tusunsa tukesè cyanààna, nùteetè ní nudikù mwà kwimana kuulu. Nwamònu's, ndi muswè ùfundèku bwalu ebu, wèwè mulundà wanyì. Ndi muswè bwà nùmonè cìdì munda mwà mwoyi wànyì, cìtù mwab'ewu kùkaadi bidimu makumi àsàtù ne cìmwè, kacya ngatèeka dibwe dikesè dyà mu ditumba adi lwà mu ditumba mwàmwa. Nwamònu's, kùdi Bulelèlà, ndi muteetè bwà kuBwimanyina. Kùwva bintu byà mishindù yònsò byàkapàtukilà ku Bwòbò ebu, bìdì bilelèlà, kàdi bitu kwònsò eku ànu mùshindù awu.

159 Mvwa mbala pa Martin Luther, bàmba ne: “Cìwva cintu cikolè bwà kwitabuujà ne yèyè ùwva mwà kutontolola èkèleeziyà wa Kàtòlikè ne kucifùdisha. Aci cìwva ncintu cinène. Kàdi cintu citàmbe bunène, cìwva ncyà mùshindù ùwwaye mwà kushààla mulamè bulelèlè kumutù kwà dikolesha dyònsò dyà maalu dyàkalondà ditàbuluja dyèndè adi, ne kushààla ne lulamatu ku Bible.” Kwamba ànu cìdì Nzambì wàmba, ne kubènga kwamba cìngà cintu nànsha. Kushààla ànu naaCì, kwenda ànu mu dipangadika dyà buludì, dijaalàme dyà Nzambì. Pamutù pàà . . . Pìikalàbi ne Nzambì ngudi mupàngadike bwà kwikalaci mùshindù ewu, tùshaalàayi ànu naaCì. Kì dipàngadika Dyèndè ndyòdi adi. Amen. Èyowà's, mukalenge. Èyowà's, mukalenge.

160 Cì—Cìtampì cyà Mpenta ndijaadikiibwa dyà mwena kwiitabuujà dyà ne yèyè mmuumùke ku lufù muyè ku Mwoyi, bwalu mmupetè Dibènesha dyà mpenta, Cìtampì cyà Paasàka cyà Nzambì kùdi Mwàn'Èndè. Wàkatwà Mwan'Èndè wa balùme wa kumpàla cìtampì cyà Nyumà Mwìmpè. Ncyà bushùwà anyì? Bulelèlè. Ne Yèyè wàkatwà bânà Bèndè bakwàbò bònsò cìtampì cyà Nyumà Mwìmpè.

161 Mpindyewu, tudi tujandula kaaba aka ne mu dicitwà dyà cìtampì mpindyewu mu cikondo eci, pàdì cikondo cyà nshìikidilu cyènda ciseemena apa, ke mwaba kampànda ewu mwab'ewu ùwvwa ùkèngela bwà mèmè kulenga, pa bìdì bitàngila bânà bàà balùme, bânà bàà balùme bàà Kaayinà kuntwaku mpindyewu, bàkaadi benzèjiibwe ku bukolè mu mùshindù wà bikèngela bwà kwangatabò dipàngadika. Nwamònu's, mbikolè bwà bòbò kucyènta, bwalu, bòbò bacyènzè, bikèngela bàlekelelè makenji àbò à cyena màngumba awu. Nwamònu anyì? Kì mwàkènzà pèndè Mùfaalèsà awu. Nudi bamanyè's, Bàfaalèsà bààkangacila Yèsù dipàngadika, pàakajaadikàYe ne Yèyè nguvwa Maasiyà awu. Ne pàdì Nyumà Mwìmpè mujaadike Njila ewu udibò bàbìikila ne ndipàmbuka ewu, aci ncijaadikiibwe ne Cìdì Nyumà Mwìmpè, bikèngela bwà muntu kwangatayè dipàngadika. Kèna mwà kushààla mupùwe to.

¹⁶² Mwab'ewu dilòòlò adi, mvwa mupàtùke, nsambidila inábànzà kampànda usaama mu lùpitaadi mwàmwa. Nènku pàngààkapwekàku, mèmè kuumvwa muntu kampànda wela lubila ne: “Billy!” Ki mèmè kukènzakana. Ûvwa umwe wa ku bânà bèètù kaaba aka, ùtu ulwa mwaba ewu, Roy Slaughter. Ûvwa mwimànyine lwà kwìnshì kwà lutanda ne mwaba ùmvwà awu, ntàntà mukèsè, nènku yèyè kwamba ne: “Mukàji wa mwanèètù ùdi ùsaama. Udikù mwà kubwela bwà kumusambidila anyi, Billy?”

Ki mèmè ne: “Èyowà.”

¹⁶³ Mèmè kubwelamù. Nènku kùvwa inábànzà mukwàbò mukùlákàji, wa bidimu bitwè ku makùmi àsambòmbò, mulààdika mwaba awu, bimwèka bu ne mwanèndè wa balùme ùvwa musòmbe ku luseke aku. Paanyimà pàà mèmè mumanè kuyiikila naabò katancì kakesè, mèmè kwamba ne: “Tudikù mwà . . . Netwikalè mwà kwenza mwàkù wà disambila.”

Yèyè ne: “Pwekèsha ridô awu!”

Ki mèmè ne: “Èyo.” Mèmè ne: “Udi mwena kwitabuuja anyi?”

Yèyè ne: “Mèmè ndi Méthodiste.”

Mèmè ne: “Kî ng'aci cîndi mukukonke to.” Mèmè ne: “Udi mwena kwitabuuja anyi?”

Yèyè ne: “Mèmè ndi Méthodiste. Twètù tudi ba-Méthodistes. Pwekèsha ànu ridô awu!”

¹⁶⁴ Ncyàkamupwekèsha to. Mèmè kusambila, nànsha bìshi, ne kumusambidila, ki mèmè kusambila bwà Nzambì àmusùngile. Kàdi's ki cyòci aci, nwamònu's, kwèna mwena Kilistò to, udi Méthodiste. Nwamònu's, kwèna—kwèna mwena kwitabuuja to, udi Méthodiste. Bujaadiki bwèbè wèwè mwinè mbùdi bùcyàmbe. Nzambì, fwàku luse, ntàntà bule kaayi ùdi mwà kukùluka kule ne Bible nànkù?

Beena kwitabuuja! “Ne bimanyinu ebi nebifilè bàdi bìtabuuja!”

¹⁶⁵ Wèwè udi mwena Kilistò anyi? “Mèmè ndi Méthodiste.” Aci's cidi cileeva ne kwèna mwena Kilistò to. Udi mwena Kilistò anyi? “Mèmè ndi Èkèleeziyà wa Kilistò.” Aci's cidi cileeva ne kwèna mwena Kilistò to.

¹⁶⁶ Wèwè udi mwena Kilistò bwalu udi mwena kwitabuuja. Ne pawikalà mwena kwitabuuja, Yesù ngwákamba mu Maakò, nshapità wa 16 ne: “Bimanyinu ebi nebifilè aba bàdi bapeté Citampì cyà Paasàkà, too ne ku ndekeelu kwà buloba.” Ncyà bushùwà, wèwè udi mwena kwitabuuja.

¹⁶⁷ Nènku bantu mbenzèjìibwe ku bukolè, mbenzèjìibwe ku bukolè mpindyewu. Cintu cidi munkaci mwà kukwàta mudimu, nènku mbenzèjìibwe ku bukolè anyi bwà kuCyàkidila peeshì

kuCìpiisha. Ncinyi cìdìbo munkaci mwà kwenza? Munkaci mwà kuCìpiisha.

¹⁶⁸ Kàdi yêyè kàvwa mwà kucyènza kale wàwa mu cikondo cyà Mpenta to, bwalu Mpenta ùdi munkaci mwà kwalukila buludi ne kudyènza bulongolodi, bàlwa, badyènza nkàâyabù bulongolodi mu cintu cimwècimwè civwàbo bapàtùkemù aci. Mpenta kupàtukayè. Mpenta kî mbulongolodi to, Mpenta ndilabula didi dilwa kùdi mwena kwitabuuja. Kàdi bàakapàtulamù bulongolodi, ne mbenze cintu cimwècimwè aci cyàkalwishàbo bwà kupàtukamù aci.

¹⁶⁹ Cintu cimwècimwè cyàkenzà ditunga ne cìdiidi aci, ncilwè kaaba aka ku budìshikaminyi bwà ntèdeleelu, cyùmukila kùdi dilongesha dyà Kàtòlikè ndumbà wa kale adi; ne dyàlukila kàbidi, ne ku bufofo bwà cìdiidi, kusungulabò mwe wa kubantu bààbò bàà mushinga, kantùntù kàà bintu ku mapangu, muvwijijibwe kantùntù kàà bintu ku mapangu kùdi wiskí ne kùdi tòmòla, ne bintàkanyi byà pa buloba, mwàkalwàye kantùntù kàà bintu ku mapangu, ne kumutèeka pa nkwasà wa bumfùmù wa ku Maison Blanche, ne ndongolwelu wa cyena Kàtòlikè paanyimà pèndè. Wa bwalu, kàyì nànsha mwanji kwenzamu ngondo yisambòmbò to, ùdi ùjaadika ne bidi nànkù.

¹⁷⁰ Ki èkèleeziyà wa beena Mpenta kupàtukayè mu bulongolodi abu, ne kubàbiikilayè ne: “bakwàte mashika ne maalu à kwísùkwísù; ne bakàji bààbò, mùshindù ùvwàbo benza awu; ne balùme, mùshindù ùvwàbo benza maalu.” Ki Mpenta kudivwijayè bulongolodi, ne kwangata nyumà ne kwalukilayè buludi mwómò amu. Bwà cinyi? Bwà Èkèleeziyà mulelèlè wa Nzambi wàmòna mwà kuleejijibwa mu bukòlè Bwèndè ne mu butùmbi Bwèndè. Wèwè udi mwenzèjijibwe ku bukòlè bwà kuCìtabuuja. Udi mwenzèjijibwe ku bukòlè bwà kuCìtaba anyi kuCìvila. Butùmbi kùdi Nzambi’s wè! Cìdi kumpàla kwèbè, kàdi kwèna mwà kuCìvila to. Bikèngela wèwè kwamba ne “èyowà” anyi “to.” Kakwèna mùshindù wà kupàtukamù to. Èyowà’s, mukalenge. Èyowà, mbenzèjijibwe ku bukòlè. Kakwèna mwaba wà pankaci to. Buloba bujimà bùdi ne cyà kuCyàkidila ànyì kuCìvila. Nènku aci ke mùshindù ùdibi leelù ewu.

¹⁷¹ Mpindyewu tudi tujandula ne paanyimà pàà Paasàkà, Yesù, mu Maakò 16, wàkabambila ne: “Ndàyi pa buloba bujimà nùkayiishè Èvànjeeliyò, bimanyinu ebi nebìlondè.” Nènku muntu. . . Nzambi dìbà adi wàkatwisha bantu abu ku cibùngùbùngù. Bìvwa bikèngela bwà kumònabo ne bantu abu bàvwa ne Cintu kampànda! Nènku aci cyàkashàala munda mwà bidimu nkàmà yisàtù ne bisambòmbò paanyimà pàà lufù lwà Kilistò. Dìbà adi cyàkabwela mu Èkèleeziyà ncinyi? Bàvwa beena kàtòlikè, ncyà bushùwà menemene, kàtòlikè kàà ku mpenta. Mwakù *kàtòlikè* wùdi wùmvwija ne “wa buloba bujimà.” Èkèleeziyà mujimà ngwa buloba bujimà. Ne bòbò abu bàvwa beena mpenta.

Kàdi cyàkenzàbo ncinyi? Bàkabweja beena kantu ku byanza, bàkùdimwisha bakwàbò micima, kubàbwejamù. Nènku bàvwa ne cisumbu cinène cyà beena ngènyi.

¹⁷² Nènku katancì aka, nudi bamanyè, mu Bible, tudi bajandùle mu dilongesha dyètù patwàlongèshì *Bikondo Byà Èkèleeziyà*, ne Yesù wàkamwambila kumpàla kwà kwenzekaci, bidimu bitwè ku nkàmà yibìdi, ne kùvwa mwà kwikala dilongesha, anyi dyàmbedi ncifwànyine kwikala byenzedi byà beena Nikàlàwù, ne pashiishe ndekeelu wa byònsò kulwaci dilongesha. Ne pashiishe pààkenzàci nàнку, Yèyè wàkamba ne: “Ndi mucikine!” Kadi cyàkenzà beena Mpenta ncinyi? Banène bàà beena Mpeta, musùmbà muumìnyine, kudìlongololawu ne kwenza èkèleeziyà wa beena Kàtòlikè, bulongolodi bwà kumpàla bùdi bulelè ònsò.

¹⁷³ Banyààbanyà bakesè kwenzèjiibwabo bwà kuya ku luseke. Nènku bìvwa ànu mùshindù awu kwònsò eku. Bàakapìcila mu bidimu cinunu ne nkàmà yitaanu, kàdi banyààbanyà bakesè abu kubipàndukabò. Amen!

¹⁷⁴ Muntu kampànda ùvwa wàmba ditùkù adi, wàmba ne: “Anji elàayi meeji ku èkèleeziyà wa Kàtòlikè, mmvità búngì kaayi yikaadiye mupàndùke.” Mvità minène? Bushùwà, mwikale ne—mwikale ne mikenji mitwè ku cyèndè, ne ditùnga ditwè ku cyèndè, ne cidiidi citwè ku cyèndè!

¹⁷⁵ Elàayibi meeji ku Mpenta mukèsè uvwa kàyì ne cintu nànsha cimwè pa kuumusha Nyumà Mwìmpè awu, kàdi Yèyè kupànduka. Ne apa mene ne dindà emu, pàdi cilleji cidi ne mwoyi cyà ne Yèyè ùcidi ànu ne mwoyi, ne Yèyè neikalè ne mwoyi kashidi. Kì mbulongolodi to; beena kwitabuuja bàà beena Mpenta, bàà balelèlè abu! Ncyà bushùwà.

¹⁷⁶ Mpindyewu, paanyimà pàà Paasàkà, eci cyàkenjiibwa, kwenzèjiibwabò ku bukolè bwà kwangata dipàngadika. Muntu ùdi ne cyà kwangata dipàngadika, ùdi ne cyà kudyàngata mpindyewu. (Ndi munkaci mwà kwela nsèkè eyi yàbùngì.) Kakùyì byà kushàala munkàcinkaci abi to!

¹⁷⁷ Ne bàna bàà Sàtaanà nebàtwibwè citampì mu matùkù à ndekeelu aa. Eci cikondo eci mpindyewu, cidi Bible mwakulè, cyà ne bwònsò bàvwà kabàyi ne Citampì cyà Nzambi bààkangata cimanyinu cyà nyama wa lwonji. Ne tudi bamanyè ne cimanyinu cyà nyama wa lwonji nkubènga kwitabuuja. Musangu wà kumpàla. . . “Èè, nkwèpì kùdi mufwànyine kwamba ne ke kwàkabangila cimanyinu cyà nyama wa lwonji?” Mu budimi bwà Edènà. Cimanyinu cyà nyama wa lwonji ne Citampì cyà Nzambi byàkenjiibwa mu budimi bwà Edènà. Menemene. Mbyenza kùdi Paasàkà, bwalu lufù lwà Abèlè lwàkatwàla Setè. Ncyà bushùwà. Mònaayi.

¹⁷⁸ Kaayinà ùvwa mwànà wa Sàtaanà. Ùvwa mwànà wa nyama wa lwonji wàkaseeswisha Evà awu. Udi mwà kuciinyika

dîna dyônsò dyûdi muswè kwinyika adi. Yêyè ùwva mwâna wa Sâtaanà. Kàdi cyàkenzàye ncinyi? Nzambi wàkamutwa cimanyinu, ne wàkamwipata mu Bwikadi bwà Nzambi. Ncyà bushùwà anyi? Ki kumupetelayè mukàji, kàyi wa mu bumpyànyi bwà Nzambi to; kàdi kumupetèlayè mukàji ùfùmina ku buloba bwà Nodà, buloba bukwàbò.

179 Kàdi ncinyi cyàkenza bulongolodi? Bwàkalekela diitabuuja dyà Mpenta dilelèlè dîbà dyàkadivwijàbo bulongolodi adi, ne kupeta mukàji wa mu bulongolodi amu. Ncyà bushùwà menemene. Mpindyewu cyàkenzàye: Tàngilàayi mùdi—tàngilàayi mùdi mukàji wa beena Mpenta mubange kwenza maalu, ne cidiyè wàmba ne cidiyè wënza, tàngilàayi numòne byenzedi byèndè. Nènku mwimàne ànu lwà paanyimà apu, ùteeta bwà kushimbula mpindyewu. Cintu mene cìvwàye ùtwa mpàndà kumpàla aci, ùdi munkaci mwà kuteeta bwà kuCishimbula, KuCijima, bwalu Cìdi cìbèngangana ne twitabàayi yèndè. Ànu mwàkadibi amu. Kàdi mmwenzèjiiibwe cyàkàbidi ku bukolè bwà kwangata dipàngadika. Bikèngela àcyenzè. Bikèngela àcyenzè.

180 Nzambi, ngambùlwisheku ne bânà bèètù biikalà mwà kwimana naanyi pàmwè. Ngambùlwisheku, Nzambi, twambùlwisheku bwà twètù kwimana ne bukitù. Nànsha byòbi bikèngela kwela mashi panshi bu bafwile diitabuuja, kwimana ànu mwaba awu! “Ndi ne cyà kulwangana mvità, mèmè ne cyà kukòokesha, bândisha bukitù bwànyi, Mukalenge.”

181 Pàndi mmòna Nyumà Mwîmpè Wendè ùkwàta mudimu munkaci mwà bantu ne wënza bintu bimwèbimwè abi, Ndi mumanyè ne Yêyè ùdi Yesù Kilistò umweumwe wàkabiika ku lufù awu! Amen. Aci ncikòse bwalu, bwà ku dyànyi dimòna. Nwamònu anyi? Amen. Mu Loomò 4.25, ku ndekeelu, bàmba bwà Abraham. “Wàkafidiibwa bwà mapanga ètù, ne wàkabiika kàbidi ku lufù bwà dibingishiibwa dyètù.”

182 Efèsò 4.30, Nyumà Mwîmpè ki Cìtampì cyà Paasàka cyà Nzambi cidi cìtùtwà cìtampì bwà Cyendèlèlè. Amen. Tùtwekù cìtampì bwà Cyendèlèlè, Nyumà Mwîmpè wa Nzambi! Kaa, nudi—nudi ne disànkà anyi? Nudi ne disànkà bwà Paasàka anyi? Nudi ne disànkà bwà dilabula edi anyi? Batwibwe cìtampì, bakàngila munda ne Nzambi mu mwaba musokòme, bakàngila munda ne Nzambi ku ngàsà Wendè wa Bunzambi, batwibwe cìtampì too ne ku ditùkù dyà bupikudi bwètù. Ki Cìtampì cilelèlè, cilelèlè cyà Paasàka ncyòci aci.

183 Tudi dîbà kaayi? Nkànkala, tusunsa tùtaanu kumpàla kwà dîbà nkànkala. Nudi nwtabuuja anyi? [Disangisha didi dyàmba ne: “Amen.”—Muf.] Nudi nwtabuuja anyi? Twinyikàayi mitù yètù bwà katanci.

184 Taatù wetù wa mu Dyulu, cìndi mufwànyine kwamba nànsha ciikàle cinyi, kàdi pààbi bidi bikèngela bwà muntu

kwitabuujayè Dìyi edi bwalu nDifùndiibwe apa. Ndi ndòmba bwà bantu myaba yònsò bàKwakidilè mpindyewu bu Cìtampì cyèndè cyà Paasàkà, mamuma à Dyàmbedi à dibìikà dyà ku lufù, bamanyè ne mbumùùke ku lufù bayè ku Mwoyi; mwaba ùwwa lufù lwèndakana musangu kampànda awu, mpindyewu Mwoyi mmwangàte kaaba kààlù. Ndi ndombamba bwà Wèwè kuleeja disangisha edi, mu dindà emu, ne Wèwè ucidi ànu Yesù, ne Wèwè ucidi ànu Ewu Udi wenza bishimà ne wènzà cintu aci. Nèku pa kumanya ne, ànu mungáfùmi ku dyamba ne, ànu mùvwàbì bishindikila taatù Abraham amu, ne Mwanjèlò awu uvwa mwimàne ne nyimà Wendè mukoma ku batèeleji, anyi kùdì Sarah's wè, kàdì kwamba civwàye wàmba ne wèla meeji. Éyi Nzambì, tukàadi bacimòne ku cikondo ne ku cikondo! Tukàadi bamòne dishindika, dishikikiibwa dyà Mwànà, difila dyà Dìnà. Tudi bamòne bintu byònsò ebi byènzeka, Mukalenge, ne tudi bamanyè ne tukàadi ku cikondo cyà nshìikidilu. Ewu m'Paasàkà. Bàabùngì nyèwù biimàne kuulu, mikòlò mibàfùle ne tukùlájàji.

¹⁸⁵ Nèku mpindyewu, Taatù, cyònsò cìndì mufwanyine kwamba kì ncifwanyine kumvwija cintu nànsha cimwè to paanyimà pàà Wèwè mumanè kwakula, àmbà ànu byòbì bipetangana ne cyùdì Wèwè mwàmbè. Nèku piikalàbì ne ndi mwakulè Dìyi Dyèbè, dībà adi, Taatù, ndi ngùitabuuja ne Wèwè udi Nzambì wàshindika Dìyi adi. Ndi ndòmba bwà Wèwè kwenza nàнку. Swàkù bwà Nyumà Webè, Mukalenge, àlwekù munkaci mwà bantu, ne àshindikilè bantu cyòci eci.

¹⁸⁶ Bu mutùdì ne mitù yètù miinyika, myaba yònsò, kùdì pàmwàpa bubèèdì mwab'ewu. Kakwèna mpatà nànsha mikesè mwab'ewu kàdì kùdì bubèèdì munkaci mwà bantu. Ndi muswè kumanya ne, mbanganyì muneemu emu bàdì bàà pambèlù pàà cimenga, bàdì bàsaamà? Ela cyanza cyèbè muulu; pambèlù pàà cimenga. Èè, bàdì ànu myaba yònsò.

¹⁸⁷ Èyo. Nudi mwà kubàndulula mutù. Nèndombè nàнку bwà nwamònakù. Bònsò bàdì pambèlù pàà cimenga bándìku nciyi mumanyè abu to, bàdì pambèlù pàà cimenga kàdì nciyi munùmanyè to, ela cyanza cyèbè muulu, wamba ne: "Ndi nsaama." Elàayi byanza byènù muulu myaba yònsò mpindyewu, bwà ngààmòna ànu mwà kupeta mmwènenu wa byònsò. Kuumukila apa, apa, ne mu ditumba emu, too ne lwà paanyimà pààpa. Èyo. Mpindyewu, ki kadyòmbò nkòkù aka: Eci mbulelèlè cìngàyiishi eci anyi? Byòbì nàнку, Nzambì mmwenzèjìibwe bwà kucikùmbaja.

¹⁸⁸ Yèyè kàyì mushààle mukwàte eci to, kakwèna dibìikà dyà ku lufù to. Yèyè mucilamè, cidi ditwishiiibwa dyà dibìikà dyà ku lufù. Bidi bileeja ne Cìtampì cyà Paasàkà, ne Yèyè kì mmufwè to, kàdì Ùdi ne mwoyi. Dībà adi kupiisha aci nkufwanyine kwikala cipendu kùdì Nyumà Mwímpè, ne kacyèna mwà kufwidiibwa luse to. Mpindyewu, bu Nyumà Mwímpè mwà kubwela mu disangisha edi . . .

189 Mwya... ndyàmbedila ne pàmwǎpa tudi bafwǎnyine ànu kujuula bantu kuulu, kàdi katwèna mwà kwenza mulongo wà babèèdi to. Tàngilàayi kùneeku, ànu difimpakana muneemu emu, bânà bakesè mu byoshelu byònsò, ne myaba yònsò. Katwèna mwà kwenzaku mulongo wa babèèdi to.

190 Kàdi, tàngilàayi, ndi muswè nnùkonkèku cintu kampànda. Yèyè ùdi ànu mu mwaba wùmwèpelè cyanààna, anyì Ùdi kwònsòkwònsò? Yèyè ùdi myaba yònsò. Mpindyewu mmunyì mûndiku mufwǎnyine kunùmanya, pèènu nuwva mwelè byanza byèbè muulu ne ncyèna munùmanyè to, ne nwènù nudi beenyi mwab'ewu anyì? Ncyèna muswè nànsha umwe wa ku beena tabernacle to, nènnumònè nwènù pashìishe, nwamònu's. Kàdi ànu bantu, bwà nwamòna ne mbantu bàà pambèlù pàà cimenga bândi nciyì mumanyè to. Nyumà Mwîmpè àkulè ne mmwòmò anyì kî mmwòmò. Yèyè àkule mèyì awu, díbà adi mèyì àànyì neikalè cintu pa bule; ne cyòcì ciikàle Díyì dyà Nzambì, Nzambì neàshaalè mukwàte ku Díyì adi.

191 Mpindyewu vùlukàayi ne, beena Mpenta, beena kwitabuuja balelèlè bàà Nzambì abu, bàtu misangu yònsò ànu mu banyàabanyà. Ne bôbò mene mmusumbà ùdìbo bàseka ne bèèlulwila; ne bantu kî mbaswè kulonda njila awu to. Pàvwàbo ba-Luthériens, Nzambì wàkabàpèèsha dibingishiibwa ne bàakàkèngeshiibwa, kwelulwidiibwabò, ne bàakashipiibwa mene bwà diitabuuja.

192 Kàdi bàà Luther bàakabwela buludì, kucìvwijabò bulongolodi paanyimà pàà lufù lwà Martin Luther. To, Luther kàakavwija èkèleeziyà nànsha umwe bulongolodi to. To, mukalenge. Kàdi bantu bàvwa paanyimà pèndè ke bàakacyènzà, èkèleeziyà awu. Wesley kàakavwijakù cintu nànsha cimwè bulongolodi to. To, mukalenge. Cìvwa mbantu bàakalonda paanyimà pèndè. Nènku mpindyewu, paanyimà pàà beena—beena Mpenta, kubwelabò, kwenzabò bulongolodi bwine bùvwàbo bapàtùkamu abu. Nwamònu anyì?

193 Kàdi mwòmò amu ki mutùdi tukafika, nwamònu's, kwalukila buludì mu twitabàayi yètù, ne Nzambì... Mu kasunsa mene (Ndi mwà kucijaadikila ku Bible.), ne èkèleeziyà kanà yònsò udi wàngata bulongolodi, ùdi wàngata cimanyinu cyà nyama wa lwonji. Kî mbantu-nkààya bàdi mu èkèleeziyà to, kàdi ndongolwelu wa èkèleeziyà, bwalu ndongolwelu wa èkèleeziyà ncyena Kàtòlikè. Kàtòlikè: bàcìvwija cyònsò cyà buloba bujimà, bàcìbwejamù, cintu cyònsò. Nwamònu anyì? Ndi mwà kujaadikila ku nshapità wa 17 wa Bwàkabuulwibwà ne yèyè uvwa mukàji wa masandi ne bânà bèndè bàà bakàji bàvwa bandumbà, bandumbà. Bulongolodi bwònsò mbutùngùnùke... Bùdi bùlonda ndongamu wa ndumbà; nènku tàngilàayi menemene cidìye mwenze ànu mùvwà mamwèndè mwènzè menemene. Pa nànkù ùdi ne lùkàsà lwònsò... Kî mbantu bàà

mu èkèleeziyà to, mpindyewu. Ba-Méthodistes mbantu bàà cyà bushùwà.

¹⁹⁴ Ndi ntèkemena ne nudi bùmvwè mukàbà wà mèyì uvwa Mukalenge mwakùle ne muleeje civwà mwà kwenzekela èkèleeziyà awu mu cikondo cinène citùdi bakùngàmàngane naaci mpindyewu eci, pàdi cilumbulwidi cyàmba kukwàta buloba apa. Kàdi tàngilàayi nùmonè cùikalà mwà kwenzekela èkèleeziyà.

¹⁹⁵ Kàdi bàyendè awu wàkafwà, nudi bamanyè's. Kàdi pàvwà...Yèyè uvwa mukàjì mukàmba pààkaalukilà Eliyà mu lwendu lwèndè lwà mu cipèlèlè; uvwa mukàjì mukàmba. Eliyà uvwa mutùmibwe kùdiye, uvwa ne disànkà dya kuumvwa mupròfetà awu dîbà adi, paanyimà pàà bàyendè wèndè awu mumanè kufwà. Nwamònu's. Bulongolodi bwèndè bwàkatèèkiibwa mu Nsangilu wa Maèkèleeziyà, wàkamòna mwaba uvwaye ùsanganyiibwa, ne civwà mupròfetà awu mwàmbè cyàkùla, uvwa ne dìjinga. Nzambì ùcivwa ànu mumunange ne mupròfetà wàkapweka kuntwaku ne kumulama ne mwoyi too ne mwà kasabukàye Yadènà ne ciyòòlè cyà nzala civwa cijikè. Èyowà, mbulelèlè.

¹⁹⁶ Cimfwànyì cilenga kaayi cyà Dilwa dya Mukalenge mwaba awu mene mu Eliyà. Cipwàngàne. Nènku vùlukàayi ne, Mukenji ewu mu matùkù à ndekeelu newikalè ne cyà kufidiibwa kùdi Eliyà, mupròfetà; nyumà wèndè pa èkèleeziyà. Cyà bushùwà. Cyà bushùwà. Nudi bamanyè cidi mwakù Eliyà wùmwiya anyi? Èyo. Mpindyewu, túsambilàayi. Nènku swàkù bwà Nyumà Mwimpè... .

¹⁹⁷ Ndi muswè kunùkonkakù cintu kampànda. Mpindyewu, nwamònu's, Nzambì n'Nzambì udi ne mwoyi anyi? Yèyè ùdi kaaba aka anyi? Dîbà adi pùikalàbi ne Yèyè ùdikù, ndi muswè nkukonkèku cintu kampànda. Mpindyewu, paanyimà pàà mèmè mumanè kwakula, mbanganyì mwab'ewu bàdi... .bàdi bìtabuuja ne aci m'bulelèlè? Kùdiku muntu mwab'ewu ewu udi muswè kwamba ne: "Mèmè ncyèna mwena Kilistò to, Mwanèètù Branham. Ndi muswè kwikala nànkù. Ùnsambidilekù"? Ncyèna mwà kubiikila bantu ku cyoshelu eku to, bwalu ncyèna—ncyèna mwà kucyènta to. Elà ànu cyanza cyèbè muulu cyanààna, wamba ne: "Nsambidileku." Kùdiku muntu mu nzùbu emu anyi? Nzambì àkùbènèshè, wèwè, wèwè, wèwè. Abi's mbimpè. Èyo. Nzambì àkùbènèshè, myaba yònsò, myaba yònsò. Èyo, bimpè. Èyo.

¹⁹⁸ Mpindyewu, wèwè udi ne bukenji, paanyimà pàà diyiiisha bu nùnkù ewu, udi ne bukenji bwà kuntwisha, kwamba ne: "Mwanèètù Branham, wèwè's udi mutùyiishè cintu kampànda, ne mu matùkù à ndekeelu aa wèwè wàkamba ne cimanyinu cyà ndekeelu mpààkenzàYe, kuleeja ne Yèyè uvwa Nzambì."

¹⁹⁹ Nènku mvwa muumvwa muyiishi wa beena Yudà ditùkù adi, uvwa ufuminaku ku... .Mvwa... .Ku diyiiisha dyànyì pa—

pa mulàmbù wà lukùngùlù lwà ngombe mukùnze, muntu awu kulwayè kwakidila Kilistò, kupàtukilayè mu èkèleeziyà mùvwàye mukolèshìibwe mu mulongo wà baa-laabì munda mwà bidimu ne bidimu ne bidimu, munda mwà—munda mwà bidimu nkàmà yinaayi anyi nkàmà yitaanu, lwà paanyimà menemene apu, baa-laabì bònsò. Ki muntu awu kuumvwayè mukenji wànyì, kudifindayè mu disangisha ne kuumvwayè bwà “ngombe mukùnze wà lukùngùlù awu,” ne cyòci kumukùdimwishaci ku bwena Kilistò. Ne mvwa mwimàne mu èkèleeziyà kampànda ditùkù adi, ngàmba ne: “Muntu kanà yònsò udi kàyì mufwànyine kwitabuuja awu bwà ne kùvwa Nzambi yìsatu pamutù pàà Umwe. . .” Ûvwa witabuuja Nzambi umwe kacya ànu kwònsò kwònsò aku. Wàkatwà cìmpingà, pamutù pàà kwenza ní ncinyi cikwàbò cyònsò. Yèyè wàkamba dìbà dìvwà Abraham, pàakalwà bàsàtù abu, bònsò abu bàvwa Taatù, Mwànà, ne Nyumà Mwìmpè balwè kùdì Abraham.

²⁰⁰ Mpindyewu, ndi muswè kucitàngila, kunùtwàdila ànu cintu kampànda cinùdì bavùlùke. Pàakamòna Abraham bàsàtù Abu pàmwè, wàkamba, kí nne bakalenge bàànyì to, kàdì ne: “Mukalenge Wanyì.” Kàdì pàvwà Lotà, mwanàabò wa cyena màngumba awu, pàakamònaye bàbìdì abò, kwambayè ne: “Bakalenge bàànyì.” Aci’s cìdì cìleeja mwaba wùdì. Nwamònu anyi? Lotà kubàbìikilayè ne bakalenge bèndè. Abraham wàkabiikila bàsàtù Abo ne: “Mukalenge Wanyì.” Kùvwa ànu umwe Wabò kuntwaku, uvwa Mukalenge. Ncyà bushùwà. Elohim.

²⁰¹ Ki pashiise Banjèlò bàbìdì abu, bàvwà ànu baamisànjeelà bèètù aba, bàakapwekà muntwamu; ne Lotà, mwanèètù wa b-trinitaires awu, ùvwa muswè kubàbìikila ne bakalenge bèndè. Nudi bamanye’s: “Bwelàayi ànu buludi.” Nudi numòna ne mmu ngiikàdìlù kaayi mùvwàye ùsangidiibwa bwalu ùvwa kuntwaku ne bintu byà pa buloba anyi? Mukàjèndè, ne bânà bèndè bònsò bàà bakàjì kuntwaku ànu mùdì bakwàbò bàà pa buloba amu, ne èkèleeziyà wabò mukwàte mashika, wa mmwènekelu wa kwisùkwisù awu. Ki mùshindù wùdì ushààla ngwòwò awu.

²⁰² Cyàkenzà Mwanjèlò ncinyi? Wàkajaadika ne Yèyè ùvwa Mukalenge Nzambi. Mpindyewu, Nyumà Mwìmpè ùndì ngamba ewu mpindyewu ewu, Yèyè àjaadikeku ne Yèyè ùcìdì ànu Mukalenge Nzambi. Àjaadikeku ne Ûvwa n’Yèyè’s.

²⁰³ Mpindyewu, sambilaayi. Mpindyewu, nudikù mwà...? Ngànjì nkonkèku cyàkàbìdì. Mbanganyì mwab’ewu, twànjàayi kwangata ànu katùpà kakesè ku musangu, mbanganyì mwab’ewu, bàdì bàmba, munda emu ne—ne nudi nusaama, kàdì ncyèna munùmanyè—nciyì munumanye to, nudi beenyì, nènku udi muswè bwà Nzambi àkwondòpè anyi? Elà cyanza cyèbè muulu. Mpindyewu, tütangilàayi mu musumbà wà bantu ewu. Èyo. Èyo. Mpindyewu, pwekèshaayi byanza bwà katancì kakesè.

204 Nzambì àkulè. Mpindyewu, nyèwù mbàndisha cyanza cyànyì muulu, ncyèna mubàmanyè to; ncyèna mubàmanyè to. Mpindyewu, pìikalàYe ùcìdi ànu Nzambì, Yèyè kààkwenza cintu cìmwècìmwè aci anyi? Mukàjì wàkalenga civwàlù Cyèndè awu. . .

205 Bàmwè bàà ku nwènù bakàjì, anyi bàmwè bàà kunùdì bàdì beelè cyanza muulu abu, kùdì mukàjì mwaba kampànda, ngèèla meeji. Mpenyi? Inàbànzà mutekète udi ku ndekeelu awu. Udikù mwà, kwela cyanza muulu anyi? Èyo. Uvwa nànkù anyi? Èyo, ndi mwenyi kùdì anyi? Ncyèna mukumanyè to? Èyo.

206 Nudi ànu numòna ne ní Ùcìdi ànu Mwakwidi Munène udi mwà kulengiibwa kùdì dyumvwa dyà mateketa èbè awu. Kacya ncìtukù mwànji kukumònakù to kacya bàndela. Wèwè udi mwenyi kùndì. Ncyèna mumanyè kantu nànsha kàmwè pa bidì bikutàngila to. Nzambì mmukumanyè bulelèlè. Nènku bu Yèyè mwà kunsokolwela ku Nyumà Mwímpè Wendè, Kilistò mubiike ku lufù awu Udi mulwè kaaba aka awu, ne mumpèèshe dibìishiibwa dyà ku lufù dyà citùpà cìpi ku nyumà wanyi, dyà ne nyumà wanyi ùdì ùpàtuka mpindyewu ne Nyumà Wendè ùdì ùbwela, dîbà adi bwà kukumanyisha ne Yèyè ùdì ne mwoyi anyi to. Mpindyewu, ncyèna mukumanyè to. Ki mèmè awu, mèmè ne nyumà wanyi, katwèna bakumanyè to. Kàdi Yèyè mmukumanyè. Kàdi Yèyè mmuswè kusomba mubidi wanyi bwà kujaadika ne Yèyè n'Kilistò udi mubiishiibwe ku lufù awu. Ndi ne disànka dyà kuMusombeshawù, kuMupèeshawù, cintu kanà cyònsò cìdìYe mwà kwenza nawù aci.

207 Bu Nzambì mwà kungambila cyùdì muvwile kaaba aka, neùngiitabùùje anyi? [Mwanèètù wa bakàjì awu ùdì wàmba ne: “Èyo.”—Muf.] Neùcyènzè. Udi ne disaamà dyà mijilu. Aci ní ncyà bushùwà, elà cyanza cyèbè muulu. Udi ne byàbùngi bipite abi; udi ne kààmunda. Ncyà bushùwà. Kwèna wa mu cimenga eci to. Udi wa mu Lima, mu Ohio. Dìna dyèbè m'Mandamu Stoddard. Ncyà bushùwà. Bàyèbè mmusòmbe paanyimà pèèbè apu. Ncyà bushùwà. Udi witabuujà ne Nzambì ùdì mwà kungambila cìdì lutàtù lwèndè anyi? Ùdì ne lutàtù lwà nyimà wendè, ùdì ùsaama nyimà wendè. Aci ní ncyà bushùwà, elà cyanza cyèbè muulu, mukalenge. Udi witabuujà anyi?

208 Muntu kampànda mukwàbò kwinshì eku mmwelè cyanza cyèndè muulu, ne lwà kwinshì eku mwab'ewu. Mwab'ewu, inàbànzà wàwa. Èyo. Ncyèna mukumanyè to. Udi musòmbe ku luseke lwèbè awu's mbàyèbè. Cintu cyùdì uringa ndibàtiiza dyà Nyumà Mwímpè. Aci ní ncyà bushùwà, elà cyanza cyèbè muulu. Ncyà bushùwà. Èyo, itàbùùjà Mukalenge, kwèdikù mpatà nànsha mikesè to.

209 Ndi mumòne muntu kampànda ùlwa ntàntà, kàdi ncìvwa mwà kwamba ne pàvwa mpenyi to. Èyowà, mmuntu mulùme udi musòmbe ànu kaaba aka mene, nyèwù mmumòna mpindyewu.

Mmwenyi kúndi, yéyè pèndè. Udi ne disaamà dyà kanyonga, disaamà dyà mutù wà kapàla. Kwèna wa muneemu to. Udi wa ku Georgie, kaaba kàdi kabìikidiibwa bu ne Hubbermill, mu Georgie. Eyo, itàbùùjà mpindyewu, ne alùkilaaku kumbèlu ne wikale mwondòpiibwe.

²¹⁰ Udi witabuuja ne mwoyi wèbè wònsò anyi? Kùdi kampànda musòmbe lwà paanyimà apa, paanyimà, Bukènkè abu mbwimàne kumutù kwà muntu awu. Udi ùsambidila munanga wendè kampànda udi ne kànsèrè, kî mmusùngidìibwe to. Itàbùùjà, ikàlà ne diitabuuja, ne kwèdikù mpatà to.

²¹¹ Ndi ànu munkaci mwà kutàngila. Um-hum. S'ki Bwóbù ebu lwà apa nùнку. Inábànzà udi ne mutù wèndè mwinyika awu, ùsambila. Udi ùsaama makàsà èndè ne binù byèndè. Ncyèna mukumanyè to, kî mmwòmò anyi? Tudi beenyi, ela cyanza muulu. Udi walukila ku . . . nzùbù webè ùdi mu New Hampshire mwàmwa, ki mùdì mufùmìne's. Itàbùùjà, nènku Mukalenge neàkusàngàjè.

²¹² Inábànzà udi musòmbe pààpa wàwa ne mwànà mukesè wa bakàji ewu, ùmusambidila; mwikàle ne disaamà dyà twonyi, musòmbe ànu lwà paanyimà pààpa. Ngwa ku Géorgie, yéyè pèndè. Ms. Cason, wèwè mwitàbùùje ne mwoyi wèbè wònsò! Udi uCìitaba anyi? Eyo, díbà adi alùkila kumbèlu, ùsangalè. Ncyèna mumanyè mukàji ewu to, ncitu mwanji kumumònakù to kacya bándela. Patwikalà beenyi muntu ne mukwèndè, nyungisha cyanza cyèbè, inábànzà. Ncyà bushùwà.

²¹³ Mukwàbò nyéyè ewu musòmbe lwà paanyimà apa, muntu mulùme. Ngwa ku Georgie, yéyè pèndè. Ncyèna mumumanyè to, kacya ncitu mwànji kumumònakù to. Kàdi mémè kumumòna mufùmìne ku ditungà dyà mici yà péches adi. Cyà bushùwà. Udi ne disaamà dyà mucìma, ncyà bushùwà, ne binyòka. Mmusòmbe ànu pa nkwasà wa paanyimà. Udi witabuuja ne mwoyi wèbè wònsò anyi, mukalenge? Eyo, alùkilaaku òndopiibwè.

²¹⁴ Kùdi muntu kampànda musòmbe ku luseke lwèbè aku, inábànzà kampànda, lwà mundekeelu menemene mwà mulongo amu. To, kî mbwà mukàji awu to. Udi ùsambidila mwanèndè wa balùme. Ncyà bushùwà. Udi witabuuja ne Nzambi ùdi mwà kungambila cidì citàcishà mwanèbè wa balùme anyi, inábànzà? Mémè ndi mwenyi kùdì, kàdi Nzambi mmukumanyè. Byùjà, ne dinyunguluka dyà mutù. Ne yéyè kèna muneemu to; mu Dayton, mu Ohio. Aci ní ncyà bushùwà, elà cyanza cyèbè muulu. Mpindyewu itàbùùjà.

²¹⁵ Nudi bamanyè ne Yéyè ùdi ne mwoyi anyi? Yéyè ùdi Yesù umweumwe awu makèlèlèlè, leelù, too ne kashidi anyi? S'ki bantu abu bóbò bakesè mmwandamukùlù anyi dikumi bántù ncìyi mwànji kumòna to kacya bándela. Nènku ncilelèlè anyi? Mpindyewu Nzambi wa mu Dyulu, Udi kaaba aka awu, ondòpèku ne asàngajè, aba nùнку. Èè, cidì cifùmìna ku

dilaabiibwa dyà Nyumà Mwímpè, kî mmémè to. Nzambi udi mwà kujingulula meeji à mu mutù awu, ne kujaadika ne Yèyè mwinè ùdi Yesù Kilistò umweumwe awu makèèlèlè, leelù, too ne kashidi, Yèyè àpitèku kumpàla òndopè babèèdi. Yèyè ùdi Nzambi bwà kashidi! Nudi nwitabuuja nàнку anyi? Mpindyewu mbanganyi bàdi baswè kuMwitabuuja mpindyewu mene, ne kuMwitaba bu Musùngidi ne Mwondopi, ne bu Mubàtiijanganyi ne Mfùmù ulwàlwa awu? Mu Dìna dyà Yesù! Kaa, Àlèluuyàh! Cinyi? Cìtampì cyà Paasàkà, Cìtampì cyà Paasàkà cidi kacyi mwà kupangila aci!

216 Cintu cidi cìlondà ncinyi? Dikùdimuka dyà mubidi ewu, bwà kutwilangana ne Mwànà ulwàlwa awu. Netùshintuluke mu katancì kakesè, mu mubùnì wà disù. Ikàlà ne bitampì byèbè byònsò byà pa mabèji byùdi muswè abi; kàdi Cìtampì cilelèlè cyà Paasàkà n'Nyumà Mwímpè mu mwoyi wà muntu! Udi uCìitaba anyi? Udi witabuuja dibìikà Dyèndè dyà ku lufù anyi? Udi witabuuja ne Yèyè ùdi ne mwoyi bwà kashidi anyi? Nudi nwitabuuja ne Yèyè ùdi kaaba aka anyi? Udi mpindyewu uMwitaba bu Musùngidi webè, bu Mwondopi webè, bu Nzambi webè, bu Mfùmù webè ulwàlwa awu anyi? Itàbùùjà ne mwoyi wèbè wònsò!

217 Bu mìshwalà eyi, ìndì munkacì mwà kusambidila. Nzambi, mu Dìna dyà Yesù Kilistò! Bantu bàabùngì bàtu bàyilaaba maanyi. Ndi ngiitabuuja ne bàvwa bàngata pambidi pàà Pòlò, mìshwalà ne tulùlù, ne bàvwa bòndapiibwa. Nudi nwitabuuja nàнку anyi?

218 Mpindyewu mbanganyi kàbìdi bàdi kaaba aka, babèèdi? Mpindyewu beena mu tabenacle, ne bantu bàdi pabwìpì apa, bàdi mu nyùngulukilu emu, mpindyewu elàayi byanza byènu muulu, kuumukila apa. Mpindyewu nudi nwitabuuja ne Yèyè ùdi kaaba aka anyi? Nudi nwitabuuja ne Nyumà Mwímpè ùdi kaaba aka anyi? Mpindyewu, indìlaayi, bwà cinyi tudi twindila ní ncinyi cikwàbò? Yèyè udi kaaba aka, pa nàнку túbwelàayi mu cyenzi pa bwalu abu! Charlie, nudi nwela meeji bìshi? Amen. Àlèluuyàh! Kaa, cidi ne cyà kwenzeka!

219 Ncyèna mwà kwondopa muntu nànsha umwe to. Ncyèna mwà kucyènta to. Kakwèna cintu nànsha cìmwè munda mwànyì cyà kwondopangana naaci to. Kàdi bu wèwè mwà kwitaba Nyumà udi pambidi pàanyi mpindyewu ewu, kî nkufwànyineku kwikala démons bùngì bukùmbàne mu ifernò yidì mwà kukweleshaDì mpatà kàbìdi nànsha, ne udi ne cyà kwondopiibwa. Mémè ncyèna Mwondopi to; Yèyè ki Mwondopi. Ncyèna mwà kumòna bikèèna-kumòna to; Yèyè ki Udi wakula. Cidi ànu mubidi wànyì cyanààna wùdiYe ùkwàta naawù mudimu.

220 Mpindyewu Nzambi umweumwe awu wàkamba ne: “Bimanyinu ebi nebifilè bàdi bìitabuuja.” Mbanganyi bàdi

beena kwitabuuja kaaba aka? Udi mutwishiibwe ne udi mwena kwitabuuja anyi? Èè, Yèyè wàkamba ne: “Bimanyinu ebi nebibilè aba bàdi biitabuuja. Bòbò batentèkèle babèèdi byanza, babèèdi nebasàngalè.” Ncyà bushùwà anyi? Mpindyewu tentèkèlàngànaayi byanza muntu ne mukwèndè, nènku swàyi nsambidilèkù muntu ne muntu wa kunùdi. Éyi Nzambi wa yààya! Kaa, mwanèètù! Bikèngela bwà cintu kampànda kwenzekaci. Bikèngela bwà cintu kampànda kwenzekaci ànu.

²²¹ Éyi Cìtampì cinènè cyà Paasàkà, kî mbata mu lwesu to, kàdi Mbata mu Cibanda. Wèwè, Wakaakwila ku nsongàalùmè awu ditùkù adi, Udi mulwìlè ku Díyi Dyèbè. Wèwè wàkamwèneshiibwa ne Wèwè udi Bulelèlè. Wèwè udi Bulelèlè, Mukalenge. Wèwè udi Dibìikà dyà ku lufù. Wèwè wàkamba ne: “Mèmè ndi Dibìikà dyà ku lufù, ne Mwoyi: ewu udi ungiitabuuja Mèmè, nànsha byòbì ne mmufwè, kàdi nànsha nànkù neikalè ne mwoyi: ewu yònsò udi ne mwoyi ne ùngiitabuuja Mèmè kàadyàkufwàku nànsha. Mèmè ndi Dibìikà dyà ku lufù, ne Mwoyi.” “Ndi”; kî nne “Nèngiikalè, Mwva to”; “Ndi mpindyewu, Dibìikà dyà ku lufù ne Mwoyi.”

²²² Ewu udi mwènzè bishimà ebi n’Yèyè umweumwe Wàyiishi Díyi edi awu. Bible kî mmwàmbekù ne Díyi dyà Mukalenge dyàkalwa kùdi mupròfetà anyi? Nganyi ùwva mu matùkù awu, wàkayabò kùdiye, bwà kusanganabò kùwà dibuulula dilelèlè dyà Nzambi disanganyibwa? Ùwva mupròfetà. Kàdi bàakamanya bishi ne yèyè ùwva mupròfetà? Bwalu yèyè ùwva ne cimanyinu cyà mupròfetà, citampì cyà mupròfetà. Mupròfetà awu nganyi díbà adi? Nyumà Mwímpè.

²²³ Nyumà Mwímpè ngwàkafùnda Díyi, Nyumà Mwímpè. Kî mmèmè to! Yèyè! Yèyè’s ki Yèyè awu! S’ngafumu ku dinwàmbila, Yèyè mmwangàte ànu mubidi wànyì. Yèyè ùdi ànu wàngata ludimì lwànyì, wàngata mèsù àànyì, bwalu Yèyè ùwva mumanyè ne mwva mwà kuMulekeleelabi, pa nànkù Yèyè kulwa ànu cyanàànà ne kumfikisha ku dyenza cyòci aci. Pa nànkù kî mmèmè to! N’Yèyè! Kàdi kî mmèmè udi neenù kuntu aku to, n’Yèyè udi neenù kuntu aku. Yèyè ùdi Dibìika dyà ku lufù ne Mwoyi. Kaa, Nzambi, Nzambi; cìtabùùjè. Kaa, nwènù bantu: Mwitàbùùjaayi. Mwitàbùùjaayi. Yèyè ùdi kaaba aka.

²²⁴ Mpindyewu, ndi muswè bwà muntu ne muntu wa kunùdi nwènù bàdi biimane mwaba awu abu, ikàle ne diitabuuja mu disambila dyènù nwènù biinè. Ndi muswè bwà nwikalè ne diitabuuja mu cìndi muswè kwamba eci. Nèmmulòmbè bwà kunwòndopayè. Nèmmulòmbè bwà kunùfwila luse ku mpèkaatù ne mpèkaatù yònsò. Mpèkaatù awu ncinyi? Bupidyà.

²²⁵ Panwikalà nwènù, bàmwè bàà kunùdi kaaba aka kacya kabàyikù bânjì kubàtijiibwa mu Dìna dyà Yesù Kilistò to; ciinà cyà màyi ncilongolola. Nènku pawikalà kùyi mwànji kubàtijiibwa to, cintu cimwèpelè cidi cikulamìne paanyimà

mbupidyà. Bwà cinyi kutungunuka ne kubwitaba? Imànshà cintu aci. Kanwènakù mwà kumòna Nyumà wa Nzambi anyi? Kanwènakù mwà kumòna byenzenedi byà Nzambi anyi?

226 Pàtukàayi mu malongolodi amu. Bwelàku mu Mukalenge Yesù, pashìshe wàlukilè mu bulongolodi bwèbè, ne utangalajè ànu Bukènkè cyanààna. Kanùtácishi meeji to, kanwàkushàalamù ntàntà mule menemene to. Nebànwenzèlè. . . Cyènzàci ncinyi? Nebikèngele bwà èkèleeziyà wèbè kufikayè mu cipidi cyà wàngata dipàngadika kampànda.

227 Pangàakuumukà mu èkèleeziyà wa ba-Baptistes ne kwimana kaaba aka, bìvwa bikèngela bwà—bwà maèkèkèleeziyà kwangatawù dipàngadika kampànda, ki bóbò kungiipata. Ncyà bushùwà. Ndi mwindile diipaciibwa, dyènda ànu ditungunuka, ànu kutungunuka. Kàdi dīngà ditùkù, nebàngaakidile, pangàsabuka Yadènà. Mmwómò. Newipaciibwè, kàdi pawàsabuka Yadènà, “Kùdi meeji àmwè àdi ànkàkamika ne ènza mwoyi wányi disànka, Kabyàkukèngela bwà mème kusabuka musulu awu nkààyani to.” Kì cintu cimwèpelè ncyòci aci. Dīngà ditùkù nēmpwekè ku musulu, Ncyàkwikala. . . Yèyè neikale Kampànda kuntwaku mwindile. . . ùngeela mwoyi. Nèngìikalè ànu ne lulamatu.

228 Apa Yèyè wàkaakwila ku Dìyì Dyèndè, Yèyè ùdi wàkwila ku bintu byònsò, byònsò bìdi ànu bikwàcila mudimu mu bupwàngàne bwònsò ku Dìyì. Kakwèna muntu nànsha umwe udi mwà kwamba cintu nànsha cìmwè cyà cìbèngangana naaci to. Ncitèèkiibwe kumpàla kwà bantu. Àbìdi aa dìyì edi nebàdìpùwishè, bantu wa yàaya. Ntèèlèjaayi. Ntèèlèjaayi. Matùkù makèsè aa kadyàdyàkwikalakù kàbìdi to, apa nūku. KaDyàkwakudiibwa to, dībà adi newikalè udyèla nkonko. Kàdi paucìdi mwà kuumvwa apa, tùmikilà.

229 Éyì Nzambi, Wàkafùka mauulu ne buloba awu, bantu aba bàdi munkaci mwà kusambidilangana muntu ne mukwèndè. Pawàkabiikà mu dīndà dyà Paasàkà, Wèwè wàkajaadika ne Wèwè uvwa Maasiyà. Wàkajaadika ne Wèwè uvwa Maasiyà kumpàla kwà Wèwè kubiika. Wàkajaadika ne Wèwè uvwa Maasiyà, ku cimanyinu cyà Maasiyà, Cìtampì cyà Nzambi cìvwa munda Mwèbè. Wèwè uvwa Mutwibwe citampì kùdi Nzambi bwà kubènga kwenza cintu nànsha cìmwè pa kuumusha cyàkambàYe. Wèwè uvwa mwambe ne: “Ntu ngenza misangu yònsò ànu cìdi cìsànkisha Taatù.” Aci’s nkulama Dìyì Dyèndè. Bwà kusànkisha Nzambi, tudi ne cyà kwitabuuja Dìyì Dyèndè ne kulama Dìyì Dyèndè. Ne pashìshe, Taatù, ki mùdìbi kàbìdi leelù ewu ne, mwànà wa balùme yònsò. . . wa Nzambi, anyi mwànà wa bakàjì yònsò wa Nzambi, bwà kusànkisha Nzambi, ùdi ne cyà kushààla mukwàte ku Dìyì dyà Nzambi. Nènku, Nzambi, tudi balame Dìyì Dyèbè mpindyewu ku ditentekelangana dyà byanza muntu ne mukwèndè. Nènku ndi nsambidila batèèleji aba.

²³⁰ Paanyimà pàà twètù bamanè kuumvwa Diyì diyiishìibwa, ne bamòne beenyi beelè byanza byàbò muulu, kumòna Nyumà Mwimpè munène awu ùpàtuka kwàka ùbàmbila meeji menemene à mu mwoyi wàbò, ne ménà àbò, kùdìbo báfùmina, cìdì munkaci mwà kwenzeka, ne byònsò bìdì bicitàngila, mmunyi mùdì bantu mwà kwela kàbìdì mpatà? Nzambi, aci's ndifutu dinène bwà bàdì biimàne mu dìndà emu banyùngùlùkile bimanu byà èkèleeziyà munène ewu kaaba aka.


²³¹ Ne bidimba byènu bìsansakana, ne baamaamù batekète ne bânà bààbò bàà mu mabòko, ne ba-papa, ne bashindàme, ne bònsò, bindile, bàtàngila, bàtàngila bwà kumòna cimanyinu cìmwèpelè cyà Nzambi udi ne mwoyi. Dìbà adi tuMumòna ùbwela mu cyalu, ne ùjaadika ne Yèyè ùdì Yèhowàh, ne Yèyè ùdì Yesù, mubiishìibwe ku lufù Awu. “Ndi ne mwoyi bwà kashidi, ne ndi ne nsapì yà lufù ne yà ifernò,” bwalu Yèyè wàkakòsa cìtampì cyàlù. Yèyè wàkakòsa cìtampì cyà lufù. Wàkakòsa cìtampì cyà lukità. Wàkakòsa cìtampì cyà ifernò. Wàkakòsa cìtampì cyà lukità. Ki kukàngulayè cìtampì cyà ku Muci wà Mwoyi, ne kutùbàtiiza ku Nyumà Mwimpè Wendè mu Muci wà Mwoyi awu, ne kutùvwijayè bânà bàà balùme ne bàà bakàjì bàà Nzambi, ne mmutùtùme ne mudimu wà kutentekelangana byanza muntu ne mukwèndè: “Ne bimanyinu ebi nebifilè aba bàdì biitabuujà; bóbò batentèkèle babèèdì byanza, babèèdì nebàsangalè.” Taatù Nzambi, bìkèngela bìikalè nànkù.

²³² Ndi nshindumuna ku bukòlè bwà Èvànjeeliyò, ku Nzambi wa mu Dyulu Wàkanjìdila ne kuntùma bwà kuyiisha Èvànjeeliyò, ku Nzambi Wàkafùnda Diyì, ku Mwanjèlò Udi kaaba aka bwà kushindika Diyì awu, Ndi ngàmba nùnkù bwà diitabuujà dìndì naadi mu bantu aba ne, dyabùlù neikalè ne cyà kushìya mubèèdì yònsò mwab'ewu, muntu yònsò udi ne ntàtu, ne bukòlè bwà Nzambi nebùbàjuulè kubàtuma ku mubidi tumatuma ne makàndà kàbìdì, bu civùlùkìlu cyà mudimu wà Paasàkà ewu. Pàtukà, Sàtaanà. Udi mucimùnyìibwe. Yesù mmukucimùne kùkaadi bidimu cinunu ne nkàmà citèemà, ne udi mucimùnyìibwe. Pàtukà munda mwà bantu, mu Dinà dyà Yesù Kilistò.

Èyo, Docteur Neville. Amen.

²³³ Èyo, Mwanèètù Neville. Mbanganyi bàà kunùdì bàdì biitabuujà? Elàayi byanza byènu muulu. Mbanganyi bàdì bàmba, bàmba ne eci ne: “Ndi mpindyewu ngiitaba ne Yesù Kilistò, bu Mwànà wa Nzambi mubiishìibwe ku lufù, Yèyè m'Musùngidi wanyi, Yèyè ke wanyi Mfùmù, Yèyè ke wanyi Mwondopi. Ndi mpindyewu mwondopiibwe. Ndi musùngidiibwe. Nèngiikalè ne mwoyi bwà Yèyè Wàkamfwila awu. Nènjukè mwab'ewu mu bupyabùpyà bwà mwoyi, bwà kuya kenza ne mwànyì mwònsò Udi. . . Bwèndè Yèyè Wàkabiika ku lufù bwànyì awu. Àlèluuyàh!” Butùmbi bwikalè kùdì Nzambi udi ne mwoyi.

²³⁴ Mpindyewu, udi witabuuja ne mwoyi wèbè wònsò anyì? Bònsò bàdi baswè kwitaba aci pa cishimikidi cyà Difuta dyà cibawu...Mpindyewu vùlukàayi ne, musangu kampànda Sàtaanà wàkakupàtakaja, kàdi Yesù wàkapwekesha cintàkanyì aci byenze bu kuuwula cizubu ku mulungu wà ditalà. Wàkacyùvula; ne cyàkenzàYe aci, Wàkeela Sàtaanà patòòke. Ne pàakabiikàYe ku lufù mu dindà dyà Paasàkà (Àlèluuyàh!) Wàkacimuna dyabùlù, disaamà, lufù, bukolè bwònsò bwà mwena lukunà, ne mwena lukunà kèna kàbìdi ne bukolè to. Ùdi ànu ne mikaaka. Bu yèyè mwà kukwenza mikaaka, mbìmpè. Kàdi yèyè kàyì mwà kukwenzelaku mikaaka to, dībà adi kwàkutwàla mikaaka yèndè ayi to.

²³⁵ Mpindyewu mene udi mwà kupeta Nyumà Mwìmpè. Mpindyewu mene udi mwà kùjiibwa tètè ne Nyumà Wendè. Mpindyewu mene udi mwà kwondopiibwa, pawikala kùyì muswè kwangata mikaaka yèndè ayi. “Ewu yònsò udi muswè, àlwe bwà wàmòna mwà kunwà Màyì à ku Mpokolo wa Mwoyi cyanàànà.” Nwènù nucìitabuuja, imànyinaayi kuulu, muntu ne muntu wa kunùdi. Elàayi byanza byènù muulu nùpetàayi Nyumà Mwìmpè ne bukolè bwà dyondopa Dyèndè, mu Dìnà dyà Yesù. 

61-0402 Citampi Cilelèlà Cyà Paasàkà
Branham Tabernacle
Jeffersonville, Indiana États-Unis

CILUBA

©2024 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyì dya bwena-cintu

Makenji ònsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiyi bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyì wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org